

# রাণীর বাজার

সমরেশ বসু



বিংশ শতাব্দী প্রকাশনী

এই লেখকের অন্ত্যন্ত বই

০

গঙ্গা, পুতুলের খেলা, বট ঝড়, তৃদা, উদ্ভরঙ্গ, বি, টি, রোডের ধানে, শ্রীমতি কাফে,  
পদারিণী, মনোমুকুর, সপ্তাঙ্গর, দেওয়াললিপি, অকালবৃষ্টি, মরুত্বের একদিন, নয়নপুরের মাটি  
ভাহুমতী, ত্রিধারা ।

রাণীর বাজার। নাম যার নেই ইতিহাসে।

কোন ইতিবৃত্ত রচিত হয়নি যে-নগরীকে নিয়ে, কিংবা কোন নাগর নাগরীকে ঘিরে। 'কোন দুর্জয় চেঙ্গিস কিংবা খোঁড়া তৈমুর যে মাটি কাঁপিয়ে যায় নি তাদের দস্যু পদ ভরে, অশ্ববাহিনীর ঝটিকাগতি ও অসির ঝনঝনায়, হত্যা ধ্বংস ও লুটের উল্লাস ও আতর্নাদে যার বাতাস কখনো শিউরে ওঠেনি, আকাশে আঁকা হয়নি ইতিহাসের গৌরব-তিলক, এ সেই রাণীর বাজার। বাঙলা ও বাঙালীর ইতিহাসের কোথাও যদি, সত্যি যদি কোথাও কোন এক কোণে রাণীর বাজারের নাম চোখে পড়ে থাকে, তবে জানবে, সে শুধুই ভৌগলিক সীমারেখা বোঝাবার জন্তে। নিতান্তই ভৌগলিক সীমারেখা।

ভূ-চিত্রের স্কেলের, এক ইঞ্চি যেখানে চল্লিশ মাইলের সর্পিলাকৃতি পথ ধরে অগ্রসর হয়েছে, তারই কোন এক কোণে একটি কালো কিংবা লাল ফুটকি চোখে না পড়ার মত অনেক ভিড়ের মধ্যে আত্মগোপন করে থাকবে বড় বড় হরফে লেখা অনেক নগর বন্দরের ভিড়ে। হয় তো খুব ছোট ছোট অক্ষরে লেখা থাকবে 'রাণীর বাজার', যা চালসে না-পড়া চোখেও ধরা পড়ার মত নয়। আকাশের অনেক নাম করা নক্ষত্রের ভিড়ে যেমন অগ্ন্যন্তরা চিক্চিক করে, ঠিক তেমনি একটি সূক্ষ্ম অভ্রকুটির মত, শুধুই মাত্র জেলার অনেকগুলি থানার প্রতীক চিহ্নের একটি বিন্দু। যে বিন্দুটিকে লক্ষ্য করে দেখলে বোঝা যাবে গঙ্গা নদী কোন জনপদের বুক ভাসিয়ে সাগর সঙ্গমে মিলেছে, কোন রেলওয়ের কোন লাইন কোন কোন নগর ও গ্রামের বুক পিষে সন্ধানী সাপের মত চলে গেছে সূদূরে।

কারণ রেল লাইন ও গঙ্গার জলের ঝাপটা খাওয়া ও লৌহাবর্তের কঠিন সীমানার মধ্যবর্তী এক ছোট ভূমিখণ্ড কোন এক কাল থেকে রাণীর বাজার নাম বহন করে আসছে।

কিন্তু রাজা শশাঙ্কের কিংবা নবাব সিরাজ-উদ্-দৌলার কোন সেনাবাহিনী রাণীর বাজারের ধূলি উড়িয়ে যায়নি, যাতে ইতিহাসের পাতায় তার নাম একেবারের জগ্গেও উল্লেখ করা যেতে পারে। কোন রাজা-বাদশা-জর্জ-লডের পদাঙ্গণ কখনো হয়নি যে, কোন ফাঁক দিয়ে নামটা একবার এক মুহূর্তের জন্য ইতিহাসের সন্ধানী আলোকে পারে বলকে উঠতে। বাংলার যে অজস্র জনপদ চৈতন্যের চরণ স্পর্শে ব্যাকুল ও উদ্বেল হয়েছে, তাঁর ছায়াও কোনদিন পড়েনি রাণীর বাজারে। তা হলেও হয় তো বা শ্যেন চক্ষু কোনও চৈতন্যচরিতকারের সঙ্গীত-মুখর ভাষায় একবার রাণীর বাজারের নাম মহা অলৌকিক পুরুষের চির-চরণাশ্রিত হয়ে থাকতে পারত। পুরাণের কোনো ঐতিহ্য নিয়ে, কোথাও এক টুকরো পাথরও যদি পড়ে থাকত, আর তার পাষাণ গায়ে যদি দুটি পায়ের মত দাগ পড়ত, বা কোন চিহ্ন থাকত মুগ্ধর—ধমুকের, তা হলেও, নেতা ধোপানীর পাট বলে, কাব্যের নায়িকা বেহুলার দক্ষিণ যাত্রার পথে কোথাও রাণীর বাজারের নাম একবার দেখা যেত, কিংবা ‘পুরাণ-বর্ণিত এই সেই দেশ’ ভেবেও প্রাচীনের মহিমা পেতে পারত।

কিন্তু সে সব কিছুই নেই রাণীর বাজারের। তাই আর্কীওলজি বিভাগের টনক কখনো নড়েনি রাণীর বাজারকে নিয়ে। ইতিহাসবেত্তার মাথা কোনদিন ব্যথা করে না রাণীর বাজারের জন্য।

না, কোন ঐতিহাসিক পাঠানের কাম-লালসা এখানে পাষাণে মাথা কুটে মরেনি। কোন রাজপুতানী ঝাঁপ দিয়ে মরেনি চিতায়। কোন পৃথ্বীরাজ কখনো সংযুক্তা হরণ করে রাজ্য ছারখার করে, প্রেমের বেদীতে আত্মবলিদান দেননি রাণীর বাজারে। তা হলেও, জগদ-বিখ্যাত কোন প্রেমের ইতিহাসে রাণীর বাজারের নাম চির উজ্জ্বল হয়ে থাকত। লালসার প্রতিবাদে চিরপবিত্র ঘৃণার শুদ্ধিতে এক ভীর্ণক্ষেত্র নামে রাণীর বাজার ইতিহাসের পাতায় থাকত চিরমুদ্রিত হয়ে। নিদেন কোন ঐতিহাসিক রজকিনীর লাঞ্ছনায় কোন সাধক যদি এখানে ‘সবার উপরে মানুষ সত্য’ বাণী গেয়ে উঠতে পারত কিংবা কোন রাণী



লহ্মীর বাসনা শুভ্র প্রেমের শতদল ফোটাতে পারত কোন কবি, তা হলে, রাণীর বাজারের নাম ত্রজবুলি বা পদাবলীর কোন পোকায় কাটা পুঁথিতে থাকত লেখা।

এই সেই রাণীর বাজার। .ইতিহাসে যার নাম নেই শুধু নয়, ইতিবৃত্ত রচিত হওয়ার কোন যোগ্যতাই যার নেই।

কোন সাম্রাজ্যের ঐতিহাসিক ভাঙাগড়া, যুদ্ধ ও শান্তি, প্রেম ও ঘৃণা, লালসা ও পরিত্রতা, পাপ ও পুণ্য, লোভ ও মহানুভবতা, অধর্ম ও ত্যাগ রাণীর বাজারে ঘটেনি। আধুনিকতম ইতিহাস রচয়িতার খুঁটিয়ে দেখা চোখেও রাণীর বাজারের কোন বৈশিষ্ট্য চোখে পড়েনি।

তাই রাণীর বাজারে যদি কেউ কখনো আসে, তবে সে আমারই মত দেখতে পাবে ছোট এক মফঃস্বল শহর, চৌহদ্দি যার এই গোটা মহকুমায় সংক্ষিপ্ততম। যদি কেউ আসে, (এখানো যারা আসেনি) তবে তারা জেনে রেখো, কোন আবিস্কারের কন্ট স্বীকার করে কোন দুর্লভ্য পথ তাকে অতিক্রম করতে হবে না। বহুদূরের কোন এক অজানা দেশের সন্ধান পেয়ে, নিশ্চিত অনিশ্চিতের আশা নিরাশায় দোলা খেতে হবে না তাকে। রাজধানী থেকে খুব বেশী দূরে নয়, খুব বেশি কাছেও নয়, এই রাণীর বাজারে আসতে বার দু'য়েক মোটর বাস বদলাতে হতে পারে। রেলগাড়িতে না বদলেও আসা সম্ভব। চোখ বুজে থাকলেও, রাণীর বাজারের নির্ধাৎ পথ হারাবার কোন ভয় নেই। কেন না, পথ গ্রাম্য নয়, কোন এক অতীতকালে ফেলে যাওয়া পরিত্যক্ত গ্রাম কিংবা নগর নয় রাণীর বাজার। স্মৃতরাৎ ভুতুড়ে অরণ্য ও বর্ষার জলে বেড়ে ওঠা মানুষ-সমান আগাছার মাঝখান দিয়ে, দিনের বেলাতেও অন্ধকার সুরু সূড়ংএর মত পথ দিয়ে, প্রাগৈতিহাসিক ভয় ভয় কোন চেতনা নিয়ে, কেবলি পথের জটায় জড়িয়ে মরার কোন সম্ভাবনা নেই।

পথ সোজা, কতগুলি বাঁক থাকতে পারে। কিন্তু প্রশস্ত পরিষ্কার।

যদি কেউ আসে তবে তাকে আসতে হবে, আমি যেখানে দাঁড়িয়ে আছি, সেখানেই। কিন্তু তারপর তাকে থামতে হবে। কারণ

বে প্রশস্ত পথে সে এসেছে, রাণীর বাজারের সীমানায় পড়ে পথের আর সেই ঢালাও রাজকীয়তা নেই। এবার হারিয়ে যাবার ভয় প্রতি পদে পদে। হয় তো তাকে, আমাকেই জিজ্ঞেস করতে হবে, ‘অমুক পাড়ায় যাবার রাস্তাটা কোন্ দিকে, বলতে পারেন?’

আগেই বলে রাখা ভাল, আমি সন্দেহজনক দৃষ্টিতে তাকাব প্রশ্নকর্তার দিকে। তীক্ষ্ণ চোখে দেখব তার আপদমস্তক। অনুমান করার চেষ্টা করব, কি উদ্দেশ্য নিয়ে লোকটা রাণীর বাজারে এসেছে। যদিও আমার ভদ্রতায় বাঁধবে সেকথা সরাসরি জিজ্ঞেস করতে, তবু অমুকপাড়ায় কার বাড়িতে সে যেতে চায়, সেটা জিজ্ঞেস করতে আমি ছাড়ব না।

কেন? কারণ, রাণীর বাজারের বিচিত্র অপক্লপ রূপ আমি নিয়ত দেখছি, তাই। সেখান থেকে রাণীর বাজারের কোন রূপান্তর গোপন থাকেনি।

রাণীর বাজারের জংশন স্টেশনের সামনেটিতে দাঁড়িয়ে থাকি আমি। প্রতিদিন দাঁড়িয়ে থাকি, প্রতিক্ষণে, সকালে-দুপুরে-বিকেলে-সন্ধ্যায়-রাত্রে-মধ্যরাত্রে। কখনো সম্মানে থাকি, কখনো নিশির টানে। কিন্তু না থেকে আমি কখনো পারিনি।

এইখানে, রাণীর বাজারের হাল-আমলের সদর দেউড়ি এই জংশন স্টেশনের সামনে, যত রাজ্যের যাওয়া আসার পথের ধারে, যত চেনা অচেনার ভিড়ে। এখন এইখান দিয়েই রাণীর বাজারে নতুন মানুষেরা আসে, পুরনো মানুষেরা যায়। এখান থেকেই দেখা যায় রাণীর-বাজারের যত অনন্দ ও অন্ধকারের ঘটনা। প্রকাশ্যে যা ঘটে, কিংবা ঘটনার পর প্রকাশ পায়, অতীত ও বর্তমানের সব কিছুই আছড়ে এসে পড়ে এখানে, এই সদর দেউড়ির চত্বরে। যেখানে জনতা হাততালি দেবার জন্যে, নিষ্ঠুর হেসে উপহাস করার জন্যে সর্বদাই ভিড় করে আছে প্রস্তুত হয়ে। যেখানে লোকেরা ক্রুদ্ধ হয়ে প্রতিবিধান করবার জন্যে, অন্যায়ের প্রতিবাদ আর কারুর দুঃখে কাঁদবার জন্যে ছড়িয়ে আছে।

এইখান থেকেই শোনা যায়, রাণীর বাজারের স্ফুট অস্ফুট যত কলকাকলা। যত হাসি-কান্না-গান, জুজু হংকার, ষড়যন্ত্রের ফিস-ফিসানি, হত্যার যন্ত্রণা, দীর্ঘশ্বাসের হাহাকার আর সম্পূর্ণ চুপচবুকের নিঃশব্দ ঝংকার।

যদি কোন সন্দেহে প্রশ্ন ওঠে, ‘শোনা যায় কেমন করে?’ তবে প্রশ্নকর্তাকে আসতে হবে এখানে, যেখানে আজ আমি ছায়াহীন অদৃশ্য আত্মার মত বন্দী হয়ে আছি। আমার সেই সর্বোচ্চ চিলেকোঠায়।

চিলেকোঠা-ই। ইঁট নয়, পাথর নয়, তবু রাণীর বাজার যেন এক অদৃশ্য পাঁচিলের ঘেরাও-য়ে আবদ্ধ হয়ে আছে। আর সদর দেউড়িতে আমার অবস্থানটি যেন এক স্ফুট চিলেকোঠা। যেখানে আছে অজস্র ঘুলঘুলি।

এই চিলেকোঠাখানি কোন এক কালে ছিল আমার খেলাঘর। এর অগুনতি ঘুলঘুলিতে আমি সকৌতুক অস্থির চোখ নিয়ে ছুটে বেড়াতাম। এখনও বেড়াই। কেন না রাণীর বাজারের সকল খেলার সঙ্গে আমার সকল দেখাদেখির খেলা এখন একাকার হয়ে গেছে। এখন না দেখিয়ে আর আমাকে রেহাই দেবে না রাণীর বাজার। কারণ রাণীর বাজারেরও ভয়ংকর আর হুন্দর বাঁধন আছে যে-বাঁধন মহামায়ার পাশের মত।

কৌতুকে হেসে খেলা দেখতে দেখতে যে-দিন ভয়ে ও ঘৃণায় শিউরে উঠেছিলাম, পালাতে চেয়েছিলাম সেইদিন। পালাতে গিয়ে দেখলাম, কার দুটি হাত আমাকে জড়িয়ে রেখেছে ধরে। ফিরে দেখলাম, ভালবাসা। উন্মুক্ত পানি পায়োঁধরে যার বাসনার উদ্ভাল-সমুদ্রে ডেউ আবর্তিত, ঠোঁটে যার পতঙ্গের ঝাঁপ খেয়ে পড়ার ঘূর্ণী আকর্ষণের আগুন, চোখের আবেশে যার রক্ত-রংমহলের খোলা দরজায় এক বিচিত্র অন্ধকারের ইশারা। দেখলাম, রাণীর বাজারের মুক্তিহীন সর্বনাশী প্রেমের দুই বাহুর ভুজঙ্গে আমি বাঁধা।

অপরিমেয় ঘৃণা ও দুর্জয় ভালবাসার এই ভয়ংকর কয়েদখানায় আটকা পড়েছি আমি। আমি রাণীর বাজারকে দেখছি।

যে রাণীর বাজারের নাম ইতিহাসে নেই কিন্তু ইতিহাস যার আছে । যার আছে পতন ও উত্থান । সংঘর্ষ-দ্বন্দ্ব-জিঘাংসা, পীড়ন-লুণ্ঠন-হত্যা, প্রেম-ফুললানো-হরণ, বীর্য-বিদ্যা-মহানুভবতা, রাণীর বাজারের ইতিহাসের স্তরে স্তরে আছে । আছে অনেক রোমাঞ্চ, রক্ত নিয়ে অনেক নিষ্ঠুর লীলা রঙ্গ ।

কিন্তু এই চিলেকোঠার ঘুলঘুলি দিয়ে, দূর রক্ষে, রক্ষে দৃষ্টি চালনা করে যেটা আমার চোখে আজো অনাবিস্কৃত রয়ে গেছে, সেটা হল কোন যুগের কোন রাণীকে ঘিরে রাণীর বাজার নাম হয়েছে । কে সেই রাণী, কোন এক কালে যে এই ভূমিখণ্ড শাসন করেছিল ।

শুধু রাণী, রাজার নাম করে না যে দেশের লোকেরা । জানা যায় না, সে-রাণীর কোন রাজা ছিল কিনা । রাজাহীন এ রাজ্যের পথে পথে কি শুধু কোন এক রাণীরই ধীর-চরণ গতি নুপুর নিকন বেজেছে ? কে সেই রাণী, এদেশের প্রজারা গুণমুগ্ধ বংশধরদের মত যে নারীর চরণ বন্দনা করেছে ? যে রাণীকে সর্বক্ষণ স্মরণের জন্য, আদর করে তারা তাদের দেশের নাম দিয়েছে রাণীর বাজার ?

এ প্রশ্নের জবাবে উচ্চকিত হয়ে ওঠে শতকর্প, ‘তবে শোন বলি ।’

‘তবে শোন বলি’ বলে রকমারি কণ্ঠের রকমারি কাহিনী শুনে বোঝা যায়, কোন এক কালের সেই রাণী এখন অনেক কিংবদন্তীর রহস্যে ধরা বিচিত্রময়ী এক যাদুকরী নারী । রূপের তুলনা যার ছিল না, গুণে যার জুড়ি মেলা ছিল ভার ।

কিন্তু পরিচয় তার নানান রকম, রাণীর বাজারের অধিবাসীরা তার নাম নিয়ে টানাটানি করে । সবাই নিজের বংশ ও গোত্রভুক্ত করে, রাণীর নিকটতম ঘনিষ্ঠতমের গৌরব করে ।

কিন্তু যে রাণীর কোন সঠিক কাল নেই, সময়ের সংক্ষিপ্ত বাঁধাধরার মধ্যে উত্থান ও পতন নেই, মহাকালের রথচক্র যার গায়ে জরা ও বার্দ্ধিকোর অঙ্কন লিখতে পারেনি, এ রাণী তেমনি এক নারী, সুরসভার অনির্বাক্ত যৌবনবতী উর্বশীর মত, মৃত্যু যার কোন কালে হয় না ।

চিরদিন ধরে যে, 'কোন এক কালে ছিল', কালের ধ্বনিতে সে  
চিরদিন রাজে ও বাজে ।

আমি সেই রাণীর বাজারকে দেখছি ।

রাণীর বাজার যেন সত্যি এক অদৃশ্য পাঁচিলে ঘেরা, ছয়ছাড়া  
আত্মিকালের নগরী । সবই তার পুরনো, প্রায় প্রাচীরের পর্যায়ে  
গিয়ে পড়ে । বাড়িঘর, রাস্তাঘাট, তাবৎ বাসাড়ে-বাসিন্দে-অধিবাসী,  
মন্দির বিগ্রহ ধর্মশালা, সবই । সরু সরু রাস্তাগুলিতে পীচ ঢেলেও  
তাকে কিছুতেই যেন আধুনিক করা যায় না । পুরোনো বাড়িগুলিকে  
কুল ফিরিয়েও তার প্রাচীন বর্ণ ও গন্ধ যায় না দূর করা । যত  
চওড়া নদর্মা, তত চওড়া রাস্তার কোণে কোণে, কেওরা পাড়ার  
শুয়োরেরা আজো বংশপরম্পরায় জটলা করে । মনে হয়, সেই একই  
ষাড়ের বংশধরেরা নগরপিতার ভূমিকায় স্থপ্তিরক্ষা করে ফিরছে অলিতে  
গলিতে মাঠে ঘাটে । তে-রাস্তার মোড়ে সেই পুরানো বটের ঝুড়ি এখনো  
স্বাধীনভাবেই নামে । ঠাকুর ত্রিনাথ সেখানে আছেন অচল হ'য়ে ।  
চলে যাওয়া দূরের কথা, আলস্যে তিনি পাশও ফেরেন না । দৈনিক  
গঙ্গাজলও পরবে দুধ খেয়ে খেয়ে, দেহ তাঁর ভার । কোন এক কালে  
হয় তো নগরবাসীর পাপে, রুদ্ধ হয়ে, চলে যাবার ভয় দেখিয়ে পুণ্যাত্মাকে  
স্বপ্নে দেখা দিতেন । এখন উঠে গিয়ে আর স্বপ্নেও দেখা দিয়ে আসতে  
পারেন না । কবে, কোন এক কালে, বলাই দে'কে স্বপ্নে একটি  
গর্মীর ওষুধ দান করেছিলেন, সেই তাঁর শেষ দান রাণীর বাজারকে ।  
বলাইদে'র বংশধরেরা 'ঠাকুর ত্রিনাথের স্বপ্নাত্ম মাতুলি' দান করে  
প্রতিদানে খড়ের চালায় পাকা ছাদ ভুলে, রাণীর বাজারের অনেক  
উত্থান ও পতনের শরিক হয়েছে ।

অগুণ্ণতি গলির ভিড়ে রাণীর বাজার যেন মাকড়সার মত জাল  
ছড়িয়ে রেখেছে । অচেনাদের হারিয়ে যাবার ভয় প্রতি পদে পদে ।  
বুঝি শিকার সন্ধানের ফাঁদ ছড়ানো রয়েছে জাল বিস্তার করে ।  
বুক চাপা শ্বাপদ সহস্র বাহু বুঝি কোথায় রয়েছে ওৎ পেতে ।

কানা নয়, তবু মনে হয় চাপা অন্ধকার সুড়ংএর মত সব গলিই বুঝি বাঁকের মুখে কানা হয়ে গেছে। গলিগুলিও যেন কোন এক কাল থেকেই আছে। পুরনো এবড়ো খেবড়ো গলি। বাড়িগুলি তার সঙ্গে খাপ খেয়ে গেছে। বড় বড় চক মিলান উঁচু পাঁচিল, পলস্তারা খসানো বাড়ি, একতলা, দোতলা কিংবা টালিখোলা-খড় ছাওয়া নীচুতলায়, সবখানেই পুরনো পুরনো ছাপ।

গলি আর বাড়ি। গলিতে গলিতে মন্দির। নতুন পুরনো সব মন্দিরই যেমন পুরনো হতেই হয়, বিগ্রহের জন্মের আদি ও অন্ত থাকতে নেই, রাগীর বাজারেও তাই। যত গলি, তত ঠাকুরের ভিড়, রাগীর-বাজারের ধর্মের ধ্বজা উড়িয়ে রয়েছে, ধর্মের কল বাতাসে নড়ছে দিবানিশি।

এত গলির কোথায় লোকালয় আর কোথায় বেস্টালয়, রাগীর-বাজারের এই বৈশিষ্ট্যের আদি ও অন্ত কোনটাই নেই।

রাগীর গলি, বাসু পুরুতের গলি, মলপৌতা পাড়া, এমনি অনেক নামের অনেক গলি, সেই কোন এক কাল থেকেই বুঝি আছে রাগীর বাজারে। আছে তার শেওলা ধরা, বট অশ্বথের মাথা চাড়া দেওয়া, বেঁটে খাটো নীচু একতলা দোতলা ঘিঞ্জি বাড়িগুলি। কিংবা যখন যেমন খুশি ছড়িয়ে ভরিয়ে অনিয়মিত চালাঘরের হাট, হালে যাদের নাম হয়েছে বস্তি। সারি সারি সেই সব বাড়ির চাপে শাসিত সরু চাপা গলি। খোপে খোপে বংশপরম্পরায় সেই সব কাক ও শালিকেরা ঘর করে, ডিম পাড়ে, আর কি করে যেন মরে, সব সেই রকমই আছে। আর আছে সেই একই গোত্রের মেয়েরা, যাদের চেহারা, নাম ও বয়স বদলায় প্রায়ই। কোন এক কাল ধরে, দলে দলে যায় আর আসে। কোথা থেকে আসে, যায় কোথায়, তার কোন হাল হদিশ নেই। পশ্চিম আকাশে যখন রক্তের ছিটা লাগে, রাগীর বাজারের মন্দিরে মন্দিরে বাজে কাঁসর ঘণ্টা, তখন সেই সব মেয়েরা রং মাখে, সাজে, এসে দাঁড়ায় রাস্তার ধারে।

মন্দিরের দেবতারা যখন চোখ বোজেন, গৃহস্থেরা দিন শেষে বন্ধ ঘরে

শয্যা নেয়, তখন তার পাশে পাশে রাণীর বাজারের বারোবাসর জাগে ।  
রাণীর বাজার দিনে ও রাত্রে সমান ।

আমি দেখি, রাণীর বাজার এক সুবৃহৎ গঞ্জ, তবু ইতিহাসে নাম  
পায় নি । গোটা মহকুমায় এত বড় গঞ্জ ও বাজার, ব্যবসা ও বাণিজ্য  
কেন্দ্র আর কোথাও এমন সুদীর্ঘকাল ধরে টিকে থাকতে পারেনি ।  
কালের কবলে পড়ে কবে মুছে গেছে । রাণীর বাজার আছে জেগে ।

সারাদিন এ শহর অনেক লোকের আনাগোনা, বেচাকেনা, লাভ  
লোকসানের বরাতের খেলায় চঞ্চল হয়ে থাকে । সজাগ-বুদ্ধি,  
শেঁনচক্ষু, কড়াক্রান্তির হিসাবে নিকেল মুদ্রার কালো দাগে হাত ভরিয়ে,  
থুথু দিয়ে কাগজের মুদ্রা গুণে গুণে রাণীর বাজারের দিন কাটে ।

দিনের হিসেব-হিস্সা-মারামারির পালা শেষ হতে না হতে, রাত্রির  
মঞ্চের পর্দা যায় উঠে । তখন রাণীর বাজার আর তার বাইরের  
লোকদের চেনা যায় না । সব একাকার হয়ে যায় ।

দিনের বাণিজ্য শেষে, রাতের বাণিজ্য শুরু হয় । তখনো  
মুদ্রার ঝনঝনা, কাগজের মুদ্রার খসখসানি, তখনো হাসি হিহু মারামারি ।  
জড় বস্তুর বদলে, জীবন্ত মাংস বেচা-কেনা চলে সারা রাত্রি ধরে । যে  
মাংস হাসিতে দোলে, কটাক্ষে জ্বলে, সেই নারী দেহের লেনদেন ।  
দেশী-বিদেশী সোনালী-রূপালী, গাঁজিয়ে ওঠা চোলাই রসের টেলখেল  
রক্তবাহী নর্দমাতে নামে কলকল করে । বিবেক জাতীয় যত ময়লা,  
সব সাফ হয়ে যায় । কুণ্ডলী পাকানো মন্তুতা, নিকুণ্ডল হয়ে মহা  
মন্তুতায় ফণা তোলে । দেহ ও রক্ত-পণ্যের চড়া বাজার রাত্রিভোর  
জমজমাট । গলিতে গলিতে পণ্যাদ্রনার ভিড়, বোঝার উপায় নেই  
কোন আলায় কার । গৃহস্থের না বারো-রামার ।

আমি দেখি, রাণীর বাজার দিনে জাগে, রাত্রে জাগে । রাণীর  
বাজারের চোখে ঘুম নেই ।

গোটা বঙ্গের যত পৌরসভা, তার সবচেয়ে ছোট পৌর এলাকা নাকি  
রাণীর বাজার । মাত্র সোয়া বর্গমাইল যার চৌহদ্দি, কিন্তু এত সংক্ষিপ্ত  
চৌহদ্দির মধ্যে এত বারোবাসর পাড়া ও বধূর ভিড় নাকি আর কোথাও

নেই। বিশ্বাস না হয়, একবার গিয়ে শহরের ম্যাপটা দেখে এলে হয়, পৌরসভার চার্টটায় চোখ বুলিয়ে নিলেই হয় একবার। ‘ব্রথেল’ চিহ্নিত জায়গার যেন কূল নেই।

কিন্তু কেন এত ভীড় ?

এই প্রশ্নটার কাছে এসে, রাণীর বাজারের আদি ইতিহাস এক অম্পর্কিত রহস্যে যেন ছুলতে থাকে। নানা মুখে কথা বলে উঠবে রাণীর বাজারের ইতিহাস।

রাণীর বাজারের গঙ্গার ওপারে, দু’শো বছর আগে সেই প্রথম যে কোম্পানীওয়ালারা এসেছিল, ফরাসী না ডেনিস, ইংরেজ না ওলন্দাজ, কে জানে কী তাদের নাম, তাদের যত মুন্সী-মুৎসুদ্দি—বাবু রাইটার মায় লুকাবরদারদের ফুঁতির জায়গা নাকি ছিল এপারের এই গণ্ডগ্রাম। মেনকা রাজ্যের মত, এ গ্রাম নাকি তখন ছিল শুধু নটীদের।

প্রবৃত্তির এ রঙমহলে এসে ভিড়ল ব্যাপারীদের পণ্য বোঝাই নৌকো ও গরুরগাড়ি। সেই থেকেই নাকি—।

ভুল, ভুল !

প্রতিবাদ ওঠে সঙ্গে সঙ্গে ! কোন এক কালে নটীরা ছিল বটে এই গ্রামে, তাদের রক্তদেহের ঘুর্ণীতে পাক খেতে আসত বটে ওপারের লোকেরা, কিন্তু এত ভিড় ছিল না গণিকাদের। গলিতে গলিতে এমন করে ছড়িয়ে পড়েনি তখন। ওই যে শহরের উত্তর পশ্চিম কোণে কায়স্থ কূল শিরোমণি ঘোষদের সেকলে ভুতুড়ে বাড়িটা দেখা যায়, খোপে খোপে কোটরে কোটরে যার এখনো বংশপরম্পরায় সেই একই মানুষ ও পায়রারা জন্ম ও মৃত্যুর লীলা খেলছে, সেই বাড়ির পিছন দিকে এখনো যে দেহোপজীবিনী পাড়াটা আছে, সেটা হয়েছিল ঘোষ-বাড়ির জন্তেই। বংশপরম্পরায় না হোক, সেই একই গোত্রের মেয়েরা দলে দলে যায় আর আসে। গোটা পাড়াটার মৌরসী সঙ্ঘ এখন তাদেরই।

পালপাড়ার কাছে যে-মেয়েপাড়াটা আছে সেই কোন মাহাত্ম্য আমল থেকে, সেখানেও প্রথম মেয়ে এনে বসিয়েছিল ব্যবসায়ী পালেরা।



খাঁয়েদের বাড়ির সংলগ্ন যে মলপোঁতা পাড়া নামে গণিকা-গলি সেটাও খাঁয়েদের পারিবারিক ছিল। তেমনি বাসু পুরোহিতের বারবধু পাড়া কোন এক কালে গজিয়ে উঠেছিল এই রাঢ়ীয় ব্রাহ্মণদের পাড়া ঘেঁষে মুখুন্ডে বাড়িকে ঘিরে।

এমনি করেই যে-পরিবারের যখন নতুন উত্থান হয়েছে, তখনই উত্থানের সব আয়োজনের প্রয়োজনে বসানো হয়েছে উপপত্নীদের আসর।

এই হল রাণীর বাজারের গলিতে গলিতে গণিকালয় বিস্তৃতির ইতিহাস। একদিন যারা ব্যক্তি বা পরিবার তোষিণী ছিল, কালের অমোঘ নিয়মে তারা গণতোষিণী হয়েছে।

শুধু শহরের মধ্যস্থলে রাণীর গলির কোন পারিবারিক ইতিহাস নেই। কোন এককালে ছিল যে রাণীর পাড়া। পাড়া ক্রমে গলি হয়েছে। তারপর পৌরসভার ওয়ার্ড বুকে ওটা রাণী রোড হয়েছিল। কিন্তু তাতেও যখন মান যুচল না, যখন খোঁজ পড়ল, রাণীর বাজারে কে আছেন নাম করা মৃত লোক? খোঁজ খোঁজ রব পড়ে গেল। দেখা গেল, গোটা রাণীর বাজারের সব পাড়া থেকেই মৃত মহাপুরুষের নাম আসছে। ব্রাহ্মণ কায়স্থ বৈষ্ণব সৎ-শূদ্রের ঘরে ঘরে মৃত পুরুষেরা সকলেই নাকি মহাপুরুষ। শেষ পর্যন্ত তখনকার চেয়ারমানের মৃত মামার নামানুসারে রাণী রোডের নাম হয়ে গেল আনন্দ ঘোষ রোড।

বাসু পুরোহিতের গলির নামকরণ করলে রাণীর বাজারের সংস্কৃত পণ্ডিত জয়শঙ্কর বিদ্যাবিনোদের নামে। জয়শঙ্কর চট্টোপাধ্যায় রাঢ়ি পাড়ারই গুণী এবং স্বনামধন্য ব্যক্তি। রাঢ়ি পাড়ার তিনি মান ও নাম ধন্য। মলপোঁতা পাড়ার নাম দিলে সূজয় খাঁ রোড। সৎ শূদ্র সূজয় খাঁ সমাজের শ্রেষ্ঠ ব্যক্তি ধনে ও মানে।

রাতারাতি নাম বদলাল বটে, কিন্তু রাণীর বাজারের মজ্জায় মজ্জায় যে নাম রেখাঙ্কিত আছে, সে লিখন যুচল না তাতে। সাধারণ মানুষ তো দূরের কথা, নামকরণ করেছেন যারা, তারাও হাজার-বার 'থুড়ি' দিয়েও পুরনো নাম ভুলতে পারেননি কোন কালে। নাম

বদলালেও জাত বদলাল না। লেবেল বদলালেও মাল বদলায় না।

শুধু সেদিন দেখলাম আমার চিলেকোঠার ঘুলঝুল থেকে রাণীর বাজারের ডাকঘরের বুড়ো পোষ্টমাষ্টার একটি পোষ্টকাড হাতে, আবিষ্কারের পরম বিশ্বাসে ঘাড় দোলাচ্ছেন। নাকের ডগায় নেমে এসেছে তার মোটা লেন্সের চশমা। পাশে দাঁড়িয়ে তার অনেক দিনের পুরনো বুড়ো পিয়ন গিরিধারীলাল।

গিরিধারীও পোষ্টকার্ডের ঠিকানা লেখার উপর ঝুঁক পড়েছে। মজার হাসিতে তার গালের ভাঁজ ঢেকে গৌফ উঠছে খাড়া হয়ে। হাসতে হাসতে বলল, ‘তাজ্জব কি বাত বোড়োবাবু, এমনটি কোথোনো গিরিধারীলাল দর্শন করে নাই। কি পঢ়লেন আর একবার পোঢ়েন বোড়োবাবু।’

পোষ্টমাষ্টার পড়লেন, ‘সুখলাল তেওয়ারি’, ‘আমবাগান নয়ী বস্তি’, ‘পোষ্ট অফিস—রাণীরবাজার’ ‘জিলা—।’ গিরিধারী তার বোড়োবাবুকে রেয়াৎ করলে না, হা হা করে হেসে মরল আবার। কিন্তু পোষ্টমাষ্টার খুবই গস্তীর। বললেন, ‘গিরিধারী হেসো না।’

গিরিধারী হাসি চেপে বলল, ‘জী বোড়োবাবু। মগর, চিট্টিটা খারাপ হইয়ে গেছে, একটা খারাপ কথা লিখিয়ে ফেলেছে।’

পোষ্টমাষ্টার গস্তীর মুখে, সর্পিল কপালে সন্ধানী রেখা ফুটিয়ে বললেন, ‘কিন্তু মিথ্যে নয়। পত্রলেখক নিশ্চয় রাণীর বাজারের ইতিহাস ঘেঁটে দেখেছে, নইলে এরকম খাঁটি নাম সে লিখলে কেমন করে? এতদিনে বুকলুম রাণীর বাজারের আসল নাম কি? কোথেকে এর উৎপত্তি।’ বলে তিনি জানালা দিয়ে যে দিকে তাকালেন, সেদিকে রাণীগলির পুকুর। রাণীগলির মেয়েরা তখন পুকুরে স্নান করছে। পোষ্ট মাষ্টারের বুড়ো চোখে সত্য সন্ধানের তীক্ষ্ণ ছটা নতুন ক’রে ঝিলিক দিয়ে উঠল। রাণীর গলির মেয়েদের উদাস অঙ্গে রঙ্গে ভঙ্গে জলকেলী অনেক দেখেছেন। দেখে দেখে আগে শিউরোতেন। যত না রক্তের আনন্দে তার চেয়ে বেশী ভয়ে! কারণ তিনি জানতেন, আসলে মেয়েগুলি মূনির ধ্যান ভাঙার চেষ্টাতেই

আছে। বিশ্বাস করতেন ঐ নিলজ্জ উলঙ্গ জলকেলী দেখে, জলের তলায় মীন রাজ্যেও নিশ্চয় উচ্ছ্বলতা দেখা দিয়েছে।

কিন্তু সেদিন তিনি ভিন্ন চোখে দেখলেন স্নানরত মেয়েদের। দৃষ্টি ফিরিয়ে পোর্টমার্শার আবার পোর্টকার্ডের দিকে তাকালেন আর তার এত দিনের সন্দেহ-ভঞ্জন করে, 'রাণির বাজার' স্থল স্থল করতে লাগল তাঁর চোখের সামনে।

ব্যাপার দেখে গিরিধারীও গস্তীর হয়ে গেল। যেন সেও বুঝল, একটা গুরুতর কিছু ধরা পড়েছে।

এবার আমারই একলা হাসির পালা। কিন্তু হাসতে গিয়ে আমিও পোর্টমার্শারের মত তাকিয়ে রইলাম রাণীর বাজারের দিকে। ভাবতে লাগলাম পত্র-লেখকের কথা। এমন তীক্ষ্ণ-বিজ্ঞপটা কে করল রাণীর বাজারকে। বিজ্ঞপ যদি নাও হয়, তবে সুখলাল তেওয়ারির এই বিদেশী আত্মীয় হয় তো রাণীর বাজারে প্রবাসকালে, এই নাম ঘনিয়ে ফিরে গিয়েছে। লিখেছে সরল বিশ্বাসেই।

রাণীর বাজার রাণির বাজার নয়। তবু রাণীর বাজারকে ওই অল্লীল নাম ধরে ডাকলে যেন তার আপাত অর্থ একটা খুঁজে পাওয়া যায়।

যে অর্থে রাণীর বাজারকে আমি দেখছি, পণ্যের হাটে তার দিনে ও রাত্রে সমান লেনদেন। দেখছি, রাণীর বাজার দিনেও জাগে, রাত্রেও জাগে।

কিন্তু সেই হিসেবে ও শহরের নাম হওয়া উচিত ছিল নটীর হাট। রাণী কোথায়?

এই প্রশ্নটাই সবচেয়ে বড় রকমের বিজ্ঞপ করেছে রাণীর বাজারের সেই সব পুরনো ঘরানা অধিবাসীদের, যারা কোন এক কালের এক রাণীকে তাদের স্বজাতি করে, ইতিহাসের পড়ে পাওয়া ঘোল আনা কুড়িয়ে নিতে চেয়েছে।

সঠিক জবাব পেতে হলে, রাণী রোডের সবচেয়ে পুরাণো বেঁটে খাটো একতলা মুম্বু জীর্ণ বাড়িটিকে খুঁজে বের করতে হবে।

ষে-বাড়িটিকে চারদিক থেকে পিষে, চলতি কথায়, 'রাণার বাড়ির লাইন' চলে গেছে স্টেশনের কাছ থেকে পশ্চিমে গঙ্গার ঘাট পর্যন্ত। রাণী রোডের এই আধ মাইল পথের ধারে যত বাড়ি, সবই এখনও রাণীর মেয়ে বিরানবুই বছরের সৌরভীবালা ভোগ করছে।

যে সৌরভীবালা এখনো সেই ভেঙেপড়া পুরণো একতলা বাড়ির মধ্যেই আছে।

আমি আমার চিলেকোঠার ঘুলঘুলি দিয়ে দেখছি, সৌরভীবালার লোলচর্ম এখন গলে গলে পড়ছে। পশ্চিমদিকের জানালা খুলে দেওয়া ছোট খুপরি ঘরে নগ্ন সৌরভীবালা গলা গলা অপলক চোখে তাকিয়ে আছে বেলা শেষের রক্তাশ্রয় আকাশের দিকে। প্রাণ তার ঠোঁটের কিনারায় এসে ঠেকেছে। কিন্তু শমনের দেখা নেই।

জীবিতদের মধ্যে, সৌরভীবালার খসে পড়া মাংসের ভাজে ভাজে রাণীর বাজারের চাক্কুস ইতিহাস অঁকা রয়েছে। সৌরভী তার মায়ের বাজার দেখেছে, সে বাজার ধ্বংস হতে দেখেছে।

সৌরভীবালার গায়ে রাণীর বাজারের মায়ামুগ্ধজীবী মানুষের কামিনী ও কাঞ্চন, প্রবৃষ্টি ও সম্পদের বিচিত্র কাহিনী রয়েছে লেখা।

ওষ্ঠাগত প্রাণ নিয়ে সৌরভীবালা অতীতদিনের কথা ভাবছে।

বাঁশীর স্বর শুনে ফিরে তাকালাম। দেখলাম, আমার সেই কালের রাখালটি এসে দাঁড়িয়েছে স্টেশনের সামনে, নর্দমার ধারে, লোহার রেলিংটার গায়ে। আর ওকে ঘিরে ধরেছে ওর সবচেয়ে নিকট বন্ধু রিকশাওয়ালারা।

নাম ওর রাজা। কবে থেকে যে রাজা এখানে এসে তার বাঁশীর স্বর তুলেছে, লক্ষ্য করিনি। আমার চিলে কোঠার ঘুলঘুলি নিয়ে বিভোর হয়েছিলাম। আর কোন কিছুই কানে যাবার কথা নয়।

কিন্তু প্রথম যেদিন আমি ওকে দেখেছিলাম, ওর বাঁশী আমার কানে গিয়েছিল, আমার মমমূল ধরে নাড়া দিয়েছিল, সেইদিনের কথা আমার মনে পড়ছে। তখন কি আমি জানতাম, রাজা বাঁশীতে তান ধরেছে। মনে করেছিলাম, যে নাটক অভিনীত হচ্ছে আমার চোখের সামনে, তারই আবহ সঙ্গীত রাগিনী বাজছে আমার বুকের অদৃশ্য পটে।

সেদিন আমি দেখছিলাম, রাগীর বাজারের দ্বিজপাড়ার নৈয়ায়িক পণ্ডিত, লোলচর্ম বৃদ্ধ ন্যায়তীর্থ চণ্ডীচরণকে তার যুবতী পৌত্রবধু তুলসী মাথায় ভাতের মাড় ঢেলে দিচ্ছে। মাড় ঠাণ্ডা। বোধহয় জল মেশানো ছিল।

ন্যায়তীর্থ চোখে দেখতে পান না। বিচার-কুটিল সেই লোমশ ক্র-জোড়া এখন কয়েকটি শাদা লোমে এসে ঠেকেছে। প্রশস্ত কপালে বুদ্ধির সেই থির-বিজুরি শিখা নেই কালের গতি তার সহস্র রেখা নিয়ে কপাল থেকে নেমে এসেছে পায়ে। বৃদ্ধ বটের নিম্নগামী ঝড়ির মত।

ন্যায়তীর্থ ভাতের মাড় তাঁর স্মৃহৎ জিহ্বা দিয়ে চেটে নিয়ে, অবাক হয়ে বললেন, ‘দুধ ? আমাকে দুধে স্নান করালি নাত্ বউ ?’

নাতবউ পিছনে দাঁড়িয়ে টিপে টিপে হাসছিল। আঁচল তার লুটিয়ে লুটিয়ে পড়ছিল হাসির দমকে। তবু তার আর্ধস্থলভ নীল চোখে একটি কুটিল রাগ ও স্ফূর্ণার বিলিক হানছিল।

আমার নড়বার ক্ষমতা ছিল না। আমি শুধু তুলসীর রূপের সঙ্গে এই দৃশ্যের সাদৃশ্য খুঁজে মরছিলাম।

রাণীর বাজারের পাশের গ্রাম, গ্রাম নয়, শহরেরই অংশ এখন, বৈদিকপাড়ার জ্যোতিষশাস্ত্রী অনন্তবিকাশের মেয়ে সর্বস্বলক্ষণা সুন্দরী মেয়ে তুলসী। সুগৌরী নয়, তার চেয়েও বেশি, টোকা মারলে বুঝি রক্ত ফুটে বেরোয়, এমনি রং তুলসীর। পিঠে এলানো সুদীর্ঘ কেশপাশ কালো নয়, পিঙ্গল নয়, তার মাঝামাঝি। অযত্ন লাঞ্চিত সেই চুলের নীচের দিকে কিছু জট পাকিয়েছে। রক্তরেখা ঠোঁট, নীল চোখ, টিকলো নাক। এই পুরনো সেকেলে নীচু ছাদ বাড়িটার অন্ধকারে তুলসীর রূপের দীপ্তিতে যেন একটি সাপিনীর মত সর্বনাশ হয়ে বেড়ায়। সর্বনাশেরই মত তার নিঃসন্তান নিটুট শরীরের উদ্ধত ধার। কী এক অজানা অপরিচিত প্রলয়ের বাসনায় যেন তার অকূল যৌবন জ্বলছে দপ্ দপ্ করে। গায়ে তার জামা নেই, সামান্য সস্তা মিলের এক ভাঁজ শাড়ি তার শাসন মানে না। কপালে নয়, সীর্ষিতে তার ডগডগে সিঁদুর,। হাতে কয়েকগাছি তামার পাতে সোনাল রং লাগান চুড়ি। মণিবন্ধে নীল দাগ হয়েছে, ঘামের সঙ্গে ভামার কষ মিশে মিশে।

একমাত্র নাতি জগদীশের সঙ্গে জ্যোতিষশাস্ত্রী যখন সম্বন্ধ করতে চাইলেন তুলসীর, মেয়েকে দেখতে চেয়েছিলেন ন্যায়তীর্থ। চোখে দেখতে পান না, তবু খুঁটিয়ে খুঁটিয়ে জিজ্ঞেস করেছিলেন, শুনে শুনে মিলিয়ে নিয়েছিলেন সমস্ত সুলক্ষণ। আকৃষিত কেশ, মণ্ডলাকার মুখ, দক্ষিণাবর্ত নাভি, সুবর্ণোজ্জ্বল রং, রক্ত পদ্মের মত হাত যদি হয়, তবে সে নারীপ্রধানা পতিব্রতা হবে। অন্যথায় মুখে চন্দ্রপ্রভা, দেহে সূর্যচ্ছটা, বিশাল চোখ, বিশ্বকল-রক্তবর্ণ ঠোঁট, তুলসীর কি সেই চির-সুখবতীর রূপ আছে? হাতে তার বহু রেখা কিংবা খুবই স্বল্প রেখা নেই তো? কিংবা হাতের রেখা কালো, গোল চোখ, রোমাবৃত স্তন, নাভিদেশ থেকে অচ্ছিন্নভাবে উদগত উর্দ্ধদিকে বৃত্তাকারে ওঠা পিঙ্গল রোমাবলী পদভারে ধরিত্রী-কম্পিত নয় তো জ্যোতিষশাস্ত্রীর

মেয়ের ? না, চক্রাকার কিংবা অঙ্কশামগুলি চিহ্নিত হাতের কোন দাবী নেই ন্যায়তীর্থের। নাতি তার কেরানী, দৈবক্রমে তার রাজা হওয়ার আশা করেন না তিনি। তবে, সে চিহ্ন থাকলে ন্যায়তীর্থ ভাগ্য বলে মানতেন। তুলসী রাজপত্নী কিংবা রাজমাতা হ'তে পারত। কিন্তু স্নেহযুক্ত পায়ের অনামিকা অঙ্গুষ্ঠাঙ্গুলি যেন মাটিতে চেপে চেপে বসে চলবার সময়। অন্যথায়, ন্যায়তীর্থের সদর দরজার পাল্লা যে সব সময় খোলা পড়ে থাকবে, বাইরের জগতে দুঃস্থের রহস্যের অন্ধকারে যে সেখান থেকে অপদেবতার হাতছানি সব সময় দেখা যাবে। ঘরের লক্ষ্মী নিশিগ্রস্তা হয়ে, অলক্ষ্মীর হাত ধরে সদর দরজা পার হ'য়ে যাবে যে।

অনেক, অনেক প্রশ্ন সেদিন করেছিলেন অন্ধ বৃদ্ধ ন্যায়তীর্থ। হয় তো একই জাতের সব স্নলক্ষণগুলি পাননি, কিন্তু সব মিলিয়ে, শাস্ত্রানুযায়ী, তুলসী অতি উত্তমা। রূপে ও গুণে সর্বস্নলক্ষণা।

এই সেই সর্ব স্নলক্ষণা, সেদিনের ঘোড়শী আজ বাইশ বছরের যুবতী তুলসী। ন্যায়তীর্থের মাথায় ও গায়ে ঠাণ্ডা ফ্যান ঢেলে, মুখে আঁচল চেপে হেসে মরছিল চুপি চুপি। তবু স্নলক্ষণ চোঁট ও নাকের কুণ্ডলে চোখের নীল ছাতিতে তীব্র ঘৃণা ও চাপা রাগ স্ফুরিত হচ্ছিল।

আর স্বাদ মরে যাওয়া জিভ দিয়ে ভাতের ফ্যান চাটতে চাটতে ভাঙা ভাঙা কিন্তু খুশি খুশি গলায় জিজ্ঞেস করছিলেন ন্যায়তীর্থ 'আমাকে দুধ-স্নান করালি রে ?'

জবাব দিচ্ছিল না তুলসী। একলা ঘরে, আল্লায়িত বেশে, নিঃশব্দে হেসে হেসে এই বিচিত্র তামাসা দেখছিল।

ন্যায়তীর্থের জিভের স্বাদ অনেকদিনই মরেছে। হাতেও বুঝি আর তেমন সাড় নেই। প্রায় উলঙ্গ বেশে, দেয়ালে ঠেস দিয়ে বসে, হাত দিয়ে মাথায় ও গায়ে অনুভব করে দেখছিলেন, তাঁর কল্পিত দুধের গাঢ়তা কত। দেখছিলেন আর হাত বুলিয়ে এনে চেটে চেটে খেতে খেতে বলছিলেন, 'সকাল থেকে কিছুই খেতে দিলি নে নাভবউ, সারা গায়ে দুধ ঢেলে দিলি ? তোর পাগলামি কি কোনকালে ঘুচল না ?'

এবার তুলসী তার স্নলক্ষণা রক্ত বিশ্বোষ্ঠের ফাঁকে, শাদা ঝকঝকে দাঁতে খিলিক হেনে বলেছিল, 'না ।'

ন্যায়তীর্থ বলেছিলেন, 'দুখটা স্কীর ক'রে ফেলেছিস রে । দুটি ভাতে মেখে যদি দিতিস্ ।'

তুলসীর গলায়ও সুরলোকেরই ঝংকার । কিছু না ব'লে খিলখিল হেসে উঠেছিল । তারপর বিক্রমে ঠোঁট বাঁকিয়ে জিভেস্তস করেছিল, 'কিন্তু এটা কী ন্যায়, তা বললেন না তো ঠাকুর্দা ?'

'ন্যায়তীর্থ হাত চাটা বন্ধ করেছিলেন । দৃষ্টিহীন চোখে, কিছুক্ষণ পলক না ফেলে খালি চোপসানো লালাসিক্ত ঠোঁটের ফাঁকে মস্ত বড় জিভটা বার করে ভাবছিলেন । তারপরে বলেছিলেন, 'এটা ? এটা বোঝার লাজাবন্ধ ন্যায় হল, কি বলিস, এ্যা ?'

তুলসী অস্বস্তিক'রে জিভেস্তস করেছিল, 'লাজাবন্ধ কেন ?'

ন্যায়তীর্থের মুখে শিশুর হাসি ফুটেছিল । অনেকক্ষণ ধরে লাজাবন্ধ জিভ নেড়ে নেড়ে বলেছিলেন, 'অর্থাৎ খৈয়াবন্ধন হ'ল আর কি । লাজাবন্ধেরই আর এক নাম । 'সুধাত' লোক থামের দু'পাশ লিঙ্গে হাত বাড়িয়ে, জোড় করে থৈ নিয়েছে । না পারে হাতভিন্ন করলে, তা হ'লে থৈ প'ড়ে যায় । এদিকে বাতাসেও উড়ে পড়ে পড়ে । খিদেও মানছে না । একে বলে লাজাবন্ধ ।'

তুলসী বলেছিল, 'তা জানি, কিন্তু বললেন কেন ?' কালো কুঞ্চিত চুলে সন্দেহ বিকিমিকি করছিল তুলসীর ।

ন্যায়তীর্থ বলেছিলেন, 'তুই যে সে রকম করলি নাভবউ । আমার জিভ পেয়েছে, তুই মাথায় ঢেলে দিলি দুধ । না আছে পাত্র, না পারি হাত দিয়ে তুলে খেতে ।' বলে আবার চাটছিলেন হাত দিয়ে তুলে এনে ।

'আমি তবু দেখছিলাম রাণীর বাজারের অতি বৃদ্ধ শেষ নৈয়ায়িকের শিশুর মত নিম'ম খেলা । আর তার সব স্নলক্ষণযুক্ত নাভবউ তুলসীকে । অপরূপ রূপসী, অঙ্গে অঙ্গে যার যৌবনের পাত্র উহ'লে পড়ছে । ন্যায়তীর্থ পিতামহ-স্বপ্নের কাছে ন্যায় সম্পর্কে অনেক কথা শিখেছে তুলসী ।

বৈদিকপাড়ার ভুজঙ্গ মাফটারের পাঠশালাতেই শুধু পড়েনি তুলসী



কিন্তু ভুলল স্বামীকে। কী রাস সিক্ত হইল। কেউ  
গণ্ডগোল হয়ে গেল। কিন্তু ভুলল। নিশ্চয়ই ভুলল।  
শশী ভুলল। ভুলল। ভুলল। ভুলল। ভুলল। ভুলল।  
ছেলে হোঁদা ভুলল। ভুলল। ভুলল। ভুলল। ভুলল।  
হাইবুলে রাস টেবিলে পড়ে। প্রথম প্রথম মজা, তারপর ভুলল।  
লাগত। কেমন যেন ব্যঙ্গকোশি ব্যঙ্গকোশি নাটকে নটকে ব্যঙ্গকোশি  
মনে হত। কিন্তু তা'বলে মোটেই মজার ব্যঙ্গকোশি নাটকে  
মনে হয়েছিল—একটা ভীষণ ব্যাপার করেছে।  
ভাবেই একটা অপরাধের মনোভাব এসে গিয়েছিল তার মনে।  
অপরাধ। সেই হেতুই গোপন করার প্রভারণা। কিন্তু ভুলল।  
ফক পরা জ্যোতিষশাস্ত্রীর বাড়িতে আটের মধ্যেই খতম।  
পড়তেই তুলসী বেশ ছেয়ালো ছেয়ালো লম্বা হ'য়ে উঠেছিল।  
পরে তাকে তখন বেশ বড় সড়ই দেখাত। কিন্তু দশ হ'লে ভুলল।  
তুলসী মনে কবত, তিন দশে তিরিশের মত ভারী ব্যাপার ঘটছে তার  
জীবনে। হোঁদা অনেক নাটক নভেল পায় হয়েছে। ও টুক ক'রে  
একদিন এক চিঠি ফেলে দিল। মা গো! কী ভয় তুলসীর। মনে  
হয়েছিল, সারা বৈদিকপাড়ার লোক ব্যাপারটাকে লক্ষ্য করছে। গলিতে  
গিজ গিজ করছে লোক। যদিও, বৈদিকপাড়ার নিরামিষাশী ঘি খাওয়া

ঘেয়ো কুকুরটা ছাড়া, আর কেউই কাছাকাছি ছিল না। চিঠিটাকে খাবার মনে করে কুকুরটা ল্যাজ নেড়েছিল। তুলসী চোখ কান বুজে কুড়িয়ে নিয়েছিল সেটা। অপকপ সেই চিঠির ভাষা। বাড়ি ফিবে, লুকিয়ে ছাদে বসে সেই চিঠি পড়েছিল তুলসী। আব তার বুকেব শব্দ বোধহয়, নীচে রান্নাঘরে মা'য়েব কানেও যাচ্ছিল। হোঁদা চুশ্বন জানিয়েছিল, জবাব চেয়েছিল মাথাব দিবি দিয়ে।

কী লজ্জা। হে ভগবান, ক্ষমা কর। চুষন, মানে মনে মনে হোঁদা  
আমাকে চুমো খেয়েচে? আ ছি ছি ছি!

কিন্তু মাথার দিবা দিয়েছে জবাবের জন্য। কি লিখবে তুলসী ? সে তো এসে ক'থা লিখতে পারবে না। তার মাথায় আসবে না। হাঁদাটা কি ভিত্তি রাখল তুল করেছো। ওমা, বাগানটার মতো অনেক বানান তুল করা হয়েছে।

হাঁদা বললেন তিনিমিনি। বোল হাঁদা, কীভাবে জবাবের জন্য। হাঁদা বলল কী ক'থা বলত না। বাধ্য হয়ে হাঁদা আবার পত্র ছুঁড়ে ফেলল অনেক কাকুতি মিনতি। 'দেবী', 'দয়াময়ী' কি লেখেনি হাঁদা। হাঁদা বলল না লিখলে চলে না। হাঁদাটা ক্লাস টেনে পড়ে। তবু হাঁদা বলল তুল। 'তুলসী জবাব দিয়েছিল, 'আমি তোমাব মত অত ভাল লিখতে পারি না। আর তোমাব অনেক বানান তুল আছে।

হাঁদা বলল ? আব তোমাব ক্রিয়াপদ তুল হয়। আমাব খুব ভয় হয় যে কাকা দেখিলে মরিয়া যাইব। আব বাবাকে বলিলে মা মরিয়া কাটিয়া ফেলিবে।'

কী চূৰ্ভাগ্য। প্রেমিকা দু'লাইন জবাব দিয়েছে, তাব মধ্যে  
ভুল ভয়। আর এক লাইন ভুল ধবা।

কারণ তুলসীব মেধা ছিল। আয়ত্ব কবাব ক্ষমতা ছিল। ভূজঙ্গ  
মাষ্টারের স্কুলে সে ছিল ছাত্রী। তর্কবত্ত জ্যাঠাব সে ছিল প'ডো  
ভাইঝি। জ্যাঠামশায়েব সঙ্গে সংস্কৃতে তাকে কথোপকথনও করতে  
হ'ত। সংস্কৃত লেখা এবং পড়াও দিতে হত।

তবে কোন বাধা বাধকতা ছিল না। সম্পূর্ণ স্বাধীন প'ড়ে তুলসী।



তর্করত্ন টিমটিমে টোল নিয়ে ব্যস্ত। ভাইঝিকে নিজে ডাকতেন না। ভাইঝি এলে খুশী হ'য়ে, খানিকটা খেলাচ্ছিলেই নিয়ে বসতেন। • কিন্তু নিয়ে বসার মধ্যে কিছু নিয়ম নীতি ছিল। বসতেই যখন হবে, তখন আর ফাঁকি দিলে চলবে না।

হৌদার পত্রপ্রসঙ্গটা শেষ পর্যন্ত গড়াল অনেকদূর। জবাব পেয়ে হৌদা আবার একটা বিরাট পত্র ছুঁড়ে দিয়েছিল। তুলসী সেগুলি প্রাণ ধরে ধ্বংস করতে পারেনি। তা কখনও পারা যায়! কতবড় একটা ব্যাপার। কী ভীষণ স্তূতরাং পত্র রাখার জায়গাটাও সে সেইরকম খুঁজে বার করেছিল। জ্যোতিষশাস্ত্রীর প্রাচীন থেকে আধুনিক কয়েক হাজার পঞ্জিকা ছিল একটি কুটুরিতে। খুবই প্রয়োজনীয় এবং যত্নের বস্তু সেগুলি। সেই পঞ্জির আগুলির একটি নির্দিষ্ট তারিখের বর্ণিত ছিল তার নিষিদ্ধ গুপ্ত সম্পত্তি। আর ঠিক সেই সময় জ্যোতিষশাস্ত্রীর হাত পড়েছিল সেখানে। প্রথমটা উনি বুঝতেই পারেননি, অর্বাচীন হস্তাক্ষরে এবং ভাষায় কথাগুলি কী লেখা ছিল। কিন্তু না দেখেই বা কেলে দেন কী করে? কত লোকে কত জন্ম ঠিকুজি কুষ্টির বৃত্তান্ত লিখে দিয়ে যান। তবে চোখে ছানি তো পড়েনি। 'ওগো প্রিয়তমা তুলসি রাণি'র কথা কী? মানে একমাত্র গৃহিণীর কাছে উদ্ধৃতিস্বাস গমন এবং পত্রাবলী আর তৎক্ষণাৎ গৃহিণীর প্রথম নির্দেশ, 'ইস্কুল যাওয়া বন্ধ।' • জ্যোতিষশাস্ত্রীর 'মুরোদ' সম্পর্কে তাঁর অভিজ্ঞতা বর্ণন এবং 'নিষেধ' যাবার নির্দেশ। তারপরেই তুলসীর কেশাকর্ষণ, বিশেষভাবে রাণী টেনে নিয়ে প্রহার এবং গর্ভজাতার সম্পর্কে তার 'অনেক আগেই' সব বিশেষণ দান, কুলাঙ্গার, রাক্কুসি, সর্বনাশী, কালকুটী। শেখ কড়া হুকুম, 'বাড়ি থেকে বেরুনো, একেবারে নিষেধ।' নিষেধ তো নিষেধই। কয়েকটা দিন বুঝি মনটা আনচান করেছিল তুলসীর। তারপর কবে যে ভুলে গিয়েছিল, তুলসীরও আর মনে নেই। স্কুলে যাওয়া বন্ধ হয়েছিল সেই থেকে, এইটুকুই মনে আছে। কিন্তু তর্করত্ন জ্যাঠার কাছে যাওয়া আসা বন্ধ হয়নি। একই বাড়ির পাচিলের এপাশে ওপাশে। শরিকানা বাড়ি, মাঝখানে দরজা। প্রথম প্রথম তাতেও মা খোঁজ

নির্ভর। কারণ জ্যোতিষশাস্ত্রীর দরজা বন্ধ থাকলে কি হবে। তর্ক-  
শত্রুর কপাটে তো কোন পাহারা নেই।

কিন্তু তার দরকারই ছিল না। মায়ের সংসারের কাজ অনেক।  
স্কুলে না গেলেও বাড়িতে বাস্তবীর ভিড় কিছু কম ছিল না। তার ওপরে  
তর্করত্ব জ্যাঠা তো ছিলেনই। সময় কোনখান দিয়ে, কেটে যেত টের  
পাওয়া যেত না। জীবনে একটি মস্ত বড় ঘটনা ঘটছিল বলে যে মনে  
হচ্ছিল তুলসীর তা কবে কখন তুচ্ছ হ'য়ে মিলিয়ে গেছে, মনেও ছিল না।

ভূজঙ্গ মাস্টার এসেছিলেন থপথপিয়ে জ্যোতিষশাস্ত্রীর কাছে।  
অমন মেধাবিনী মেয়ে আর দ্বিতীয় নেই। এভাবে তাকে স্কুল ছাড়ানো  
একেবারেই কর্তব্যের কথা নয়। এ মেয়ের মাইনের বৃত্তি কেউ আটকাতে  
পারে না। জীব জন্তিভাবকের সহসা এরকম সিদ্ধান্ত কেন ?

সিদ্ধান্ত হচ্ছে সিদ্ধান্ত। এর ওপরে আর কথা নেই। স্কুলে আর  
পড়াশোনা হবে না।

কিছুকাল হোঁদা অনেকদিন বিরহ ব্যাকুল চোখ নিয়ে দাঁড়িয়েছিল।  
তুলসী আর আসেনি। বেচারী কিছুই জানতে পারেনি।  
ছটকট করত। কে জানে, বানান আর ক্রিয়াপদের ভুলই এত  
কিছু ঘটিয়ে দিচ্ছে না। সাহস করে কয়েকদিন জ্যোতিষশাস্ত্রীর  
দরজা দিয়ে ঘুরে এসেছিল। কা-কস্তু পরিবেদনা।

মোহন বহুর বয়স পর্যন্ত সংসারের কাজ আর তর্করত্ব জ্যাঠার  
কেটেছে তুলসীর। তর্করত্ব জ্যাঠা বলতেন, তুলসীর মেধা  
ইচ্ছে করলে ও সব শিখতে পারে।

কিন্তু জ্যোতিষশাস্ত্রী নিজে যে ঠিকুজি কুষ্টি মিলিয়ে দেখেছিলেন  
সেইরকম। ষোড়শ বর্ষে বিবাহ। স্বামী এবং বিপুল বিদ্যুত তুলসীর কপালে  
লেখা ছিল।

ঘুগায় ও শ্লেষে আগুনের মত দপদপিয়ে ওঠে তুলসীর সারা মুখ। কী  
অপূর্ব স্বামী আর বিদ্যুৎ সে ভোগ করছে। আহা জ্যোতিষশাস্ত্রের কী  
মহিমা ! দেখুক, জ্যোতিষশাস্ত্র দেখে লজ্জায় মাথা নামাক, কী পেয়েছে  
তুলসী জীবনে।

কিন্তু পিতামহ খশুর স্বয়ং নৈয়ায়িকও বলেন, ভুলসী ইচ্ছে করলে নৈয়ায়িক হতে পারে। তার তীক্ষ্ণ বিচার বুদ্ধি তিনি উপলব্ধি করেছেন নাকি।

সে কথা মনে করে ভুলসীর হাসি আরো বিদ্রূপাত্মক হয়ে ওঠে।

সেদিন লাজাবদ্ধ স্ত্রীর কথা শুনে, ভুলসী তীব্র হেসে বলেছিল, ‘কী ভাগ্যি বকাণ্ড প্রত্যাশা স্ত্রায় বলেননি ঠাকুর্দা।’

ছি! ছি ছি ছি! আজকাল কোন কথাই আটকায় না ভুলসীর মুখে। বয়োবৃদ্ধ পণ্ডিতের মতই, যা মুখে আসে, তাই বলে দেয়।

কিন্তু সহসা পুলকে ছ’মাসের শিশু যেমন মায়ের কোলে হেসে ওঠে, গোড়া স্বরে তেমনি ক’রে চোপসানো ঠোটে হেসে উঠেছিলেন চণ্ডীচরণ। হাসির বেগে, লাল গড়িয়ে পড়েছিল ঠোটের কষ বেয়ে। বলেছিলেন, ‘তুই বড় দুটু নাত বউ। বকের মত বুঝি আমি ষাঁড়াগুকোষের লোভে ছুটব?’

কিন্তু ভুলসী আর হাসছিল না। বিশাল দুই চোখে অপরিণীত স্নান ও রাগ নিয়ে নিঃশব্দে তাকিয়েছিল ন্যায়তীর্থের দিকে।

কেন? কিসের এত রাগ আর স্নান। অশক্ত জড় পদার্থের মত সেই অতীত তীক্ষ্ণবী নৈয়ায়িকের ওপর রূপসী নাতবউ ভুলসীর এ প্রতিশোধ?

আরো দেখেছি, সুন্দ-উপসুন্দের, সৌন্দর্যের তিলে তিলে গিলোস্তমা ভুলসী, হাতের ব্রোঞ্চার চুড়ি থেকে সেফটিপিসকে মন ক’রে ন্যায়তীর্থের গায়ে খুঁচিয়েছিল। নিঃশব্দে, খুঁচিয়েছিল। ন্যায়তীর্থের এমনি সাড় নেই, কিন্তু এ অনুভূতিটুকু ছিল। চোখে দেখতে পান না। মনে করেছিল, কাঠপিপড়ে গায়ে উঠে কামড়াচ্ছে তাঁকে। তাঁর স্ববির হাত সহজে পৌঁছুচ্ছিল না পিপড়েকাটা জায়গায়। ন্যায়তীর্থ শিশুর মত চীৎকার করছিলেন, ‘নাতবউ, ও নাতবউ, ওরে ভাই শীগগির আয়, কাঠ পিপড়ে না কিসে আমাকে কামড় মেরে ফেলছে।’

আমি দেখছিলাম, সর্বনাশী কাঠপিপড়ের চাপা হাসিতে মুখে রক্ত ফেটে পড়ছে। হল তার নির্ভুর ও নির্মম। রক্তরেখা ঠোটের

কোণ তবু কুঁচকে রয়েছে, চোখে তবু চক্চক্ করছে একটি চাপা রোষ।

না, কাঠপিপড়ে নয়। তার হল ফোটাবার মধ্যেও একটি সততা আছে। সে জীবনের ভয়ে ফোটায়। কিন্তু তুলসী? থাকে আমি দেখেছিলাম, সর্বস্বলক্ষণযুক্তা যুবতী, নিঃসাড়ে সেফ্টিপিন ফোটাতে গিয়ে যার আঁচল নেই বুকে, চুল এলিয়ে পড়েছে মাটিতে আর মাঝে মাঝে সরে গিয়ে দূরত্ব বজায় রেখে, রক্তবিশ্বোষ্ঠ ঘরের মেঝেয় চেপে রাখছিল শব্দ চাপবার জন্যে। সে কে? কোন জীব?

ন্যায়তীর্থ পরিত্রাহি চীৎকার করছিলেন, 'ওরে জগুর বউ, মারা গেলুম রে ভাই।'

তুলসী চলে গিয়েছিল নিঃশব্দে। পাশের ঘর থেকে জবাব দিয়েছিল তার সুর ঝংকৃত গলায়, 'কি বলছেন ঠাকুর্দা?'

বলতে বলতে ছুটে এসেছিল তুলসী। নৈয়ায়িকের দৃষ্টিহীন চোখের জল তখন তাঁর মুখের কালের সহস্র রেখা বেয়ে টপ্‌টপ্‌ করে পড়ছে। বলেছিলেন, 'এসেছি, ভাই? কই, আয়। এই ছাখ্, ছাখ্ তো আমাকে কিসে হল ফোটাচ্ছে? পাছাটা আর রাখেনি কামড়ে কামড়ে।'

হাসি ছিল না, রাগও বুঝি ছিল না তখন তুলসীর সুন্দর মুখে। সে পদ্য-রং সুলক্ষণ হাতে ন্যায়তীর্থের গায়ে হাত বুলিয়ে দিয়েছিল। চোখ বুজে, ভাঙা ভাঙা চাপা আত্মস্বরে, অসহায়ের মত বলছিলেন, 'হে ভগবান, হে পতিতপাবন, মুক্তি দাও! মুক্তি দাও!' তখন বৃদ্ধ নৈয়ায়িককে বুকের ওপরে টেনে নিয়েছিল। হাত বুলিয়ে দিয়েছিল, আর ন্যায়তীর্থের মনে হয়েছিল, কালের কক্ষ হয়ে গেছে। তিনি যেন সত্যি মায়ের কোলে শিশু। কেশোর ও বলিষ্ঠ যৌবন তার ভবিষ্যতে।

তিনি তুলসীর স্নেহের আলিঙ্গন অনুভব করছিলেন। বলেছিলেন, 'মা, তুলসী মা আমার, সংসার বড় অন্ধকার রে।'

তুলসীর কি কোন ভাবাস্তর হয়েছিল বৃদ্ধ চণ্ডীচরণের যজ্ঞনা ও যজ্ঞ-কামনা দেখে? বুঝতে পারিনি। কারণ ছোট্ট মেয়েটির মত কৌতুহল নিয়ে জিজ্ঞেস করেছিল তুলসী, 'কি হয়েছিল ঠাকুর্দা?'

নায়তীরে চোখে তখনো জলের দাগ। যেন ক্রন্দনরত শিশু মায়ের কোল পেয়ে শান্ত হয়েছে। বলেছিলেন, ‘কি জানি, যেন মনে হচ্ছিল কয়েকটা কাঠপিঁপড়ে।’

তুলসী বলেছিল, ‘কিন্তু আমি তৌ একটাও দেখতে পাচ্ছি নে, বলতে বলতে আবার হাসি চম্কে উঠেছিল তুলসীর মুখে, বলেছিল, ‘এটো কিন্তু ঠাকুর্দা, অন্ধহস্তি-ন্যায় হ’য়ে গেল।’

শোনা মাত্র নৈয়ায়িকের অন্ধ চোখে স্পন্দ চিস্তা ফুটে উঠেছিল। বলেছিলেন, ‘যথা ?’ ব্যথা বেদনা ভুলে হঠাৎ ঝঙ্কু হয়ে উঠেছিলেন।

তুলসী বলেছিল, ‘যথা, আপনার আন্দাজ দেখে বলছি। কাকে কি ভেবে বসে আছেন। হয় তো বিছের জালি উঠেছিল আপনারা গায়ে, আপনি তাকেই কাঠপিঁপড়ে বলছেন।’

বুশিকের চিন্তায় একবার বুঝি কাঁটা দিয়ে উঠেছিল নায়তীরে গায়ে। বলেছিলেন, ‘তা হবে। তবে সেটা কিন্তু অন্ধ-হস্তি ন্যায় হল না। এটা এখন কি ন্যায় হল জানিস্ না ত বউ ? এটা হল দন্ধ পত্র ন্যায়।’

‘কেন ?’

নায়তীরে সারা মুখে গাঢ় ছায়া পড়েছিল। বলেছিলেন, ‘তাই নাকি ? পাতা পুড়ে গেলে, পাতার আকারই থাকে। তবু সে পাতা পোড়া।’ বলে একটি দীর্ঘশ্বাস ফেলে বলেছিলেন, ‘হে পরমেশ্বর, জগদীশ্বর, মুক্তি দাও, মুক্তি দাও।’

আবার নাসারন্ধ্র স্ফীত হ’য়ে উঠেছিল তুলসীর। বলেছিল, ‘কিন্তু মুক্তি আপনার কেমন করে হবে ঠাকুর্দা ?’

‘কেনরে ?’

‘শুনেছি, যথের কখনো মুক্তি হয় না।’ বলে তুলসী যেন সরোষে উঠে পড়েছিল চণ্ডীচরণকে ছেড়ে। যেন তীব্র বিষ উপহুঁছে পড়েছিল তার স্তন্দর ঠোট বেয়ে। বলেছিল আবার, ‘আপনারও মুক্তি নেই, আমিও কোন দিন মুক্তি পাব না। তার চেয়ে আমি গলায় দড়ি দেব, আপনার ব্যবস্থা করবে ন’কু ঠাকুরপো।’

নায়তীর চমকাননি। একথা অনেকবার শুনেছেন তুলসীর মুখে।

জন্তুহীন মাড়িতে শিশুর মত হেসে বলেছিলেন, ‘পাগলি আর কাকে বলে !’

বিষ আরো ছিল তুলসীর রক্ত ঠোঁটের কোণে। তীব্র চাপা গলায় বলেছিল, ‘থাক, আর শাক দিয়ে আপনি মাছ ঢাকবেন না। আপনার ওসব চালাকি আমার ঢের জানা আছে। ছ’বছর ধরে তো দেখছি।’

ন্যায়তীর্থ তেমনি হেসেই বলেছিলেন, ‘ছ’বছর ধরে কি দেখলি লো ?’

রাগে ও ঘৃণায় তখন যেন ফেটে পড়ছিল তুলসী। বলেছিল, ‘দেখলাম আপনার ভণ্ডামি।’

নৈয়ায়িক ডেকে উঠেছিলেন, ‘হে ভগবান !’

তুলসী তখনো বলেছিল, ‘আপনার মরণ দেখলাম। আপনার ঠাই কোনদিন নরকেও হবে না জেনে রাখবেন।’

চণ্ডীচরণ আত্মস্বরে ডাকছিলেন, ‘মা জগদম্বে !’

অকস্মাৎ অগ্নি-মূর্তি ধরে দাঁড়িয়েছিল তুলসী। এলো চলে, বিস্ময় বশে বাসে, সেই তুলসী যত সুন্দরী ততই ভয়ংকরী। যেন দু’হাত তুলে সে আঘাত করতে আসতে গিয়ে, থেমে বলেছিল, ‘কোন মা জগদম্বে আপনাকে রক্ষা করতে পারবে না। যে আপনার গায়ের পোকা খেয়ে, নোংরা ধুয়ে সব করছে, তার হাতেই আপনাকে থাকতে বলে রাখলাম।’ বলে চলে গিয়েছিল তুলসী। সারাদিন আর চণ্ডীচরণের ঘরে ঢোকেনি, খেতেও দেয়নি। ন্যায়তীর্থ সারাদিন অনেক চিন্তা কারণ দেখিয়ে চীৎকার করে তুলসীকে ডেকে ডেকে কেঁদেছিলেন। তুলসী আসে নি। কেবল, চণ্ডীচরণের চীৎকার বাইরে থেকে শোনা বাবে, সেই জন্তু সশব্দে দরজা টেনে, শিকল তুলে দিয়ে গিয়েছিল।

কেন, কিসের এত ঘৃণা ও রাগ তুলসীর এই বৃদ্ধ শিশু পণ্ডিতের ওপরে ?

সেদিনও, মাথায় মাড় ঢেলে, ন্যায়-পরিহাসের পর, দু’চোখ ভরে ঘৃণার আগুন নিয়ে তাকিয়ে ছিল তুলসী। ভাতের ক্যানকে দুধ মনে করে তৃপ্ত হ’তে দেখে, তার বুঝি আকশোস্ হচ্ছিল। ভাবছিল, এ জড়পদার্থের ওপর ক্যান ঢেলেও ক্ষতি। কিংবা, অতীতের সেই



বুন্ধিমান নৈয়ায়িক, সব বুঝেও ছলনা করেছে না তো তুলসীর সঙ্গে ? সে সন্দেহও ছিল যেন তুলসীর ।

মুখ তুলে ডেকেছিলেন চণ্ডীচরণ, ‘চলে গেলি নাত বউ ?’

জবাব না দিয়ে নিঃশব্দে দাঁড়িয়েছিল তুলসী ।

শ্রায়তীর্থ ডাকছিলেন, ‘ও নাতবউ, আমাকে মুছিয়ে দিয়ে যা রে, গায়ে যে বড় চট্‌চট করছে ।’

কিন্তু কোন সাড়া শব্দ ছিল না তুলসীর । সে তীক্ষ্ণ চোখে তাকিয়েছিল দাদাশ্বশুরের দিকে । তারপরে হঠাৎ বলেছিল, ‘জমিদারি প্রথা কিন্তু উচ্ছেদ হ’য়ে গেছে ঠাকুর্দা ।’

শ্রায়তীর্থ চমকে উঠেছিলেন । শব্দ ক’রে উঠেছিলেন, ‘অ্যা ?’

তুলসীর চোখ দপদপিয়ে উঠেছিল । বলেছিল, ‘হ্যাঁ, শ্বশুরের কাগজে বেরিয়েছে জমিদারি প্রথা উচ্ছেদ হ’য়ে গেছে । আপনার পাঁচশুলি পরগণার জমিদারির কি গতি হবে ?’

পর মুহূর্তেই কিন্তু চণ্ডীচরণ শাস্ত হ’য়ে গিয়েছিলেন । বলেছিলেন, ‘ও, হ্যাঁ, শুনেছি ন’কড়ির মুখে । সে জন্মে আমার ভাবনা কিরে নাতবউ । পাঁচশুলিতে আমার কি আছে ? আমার তো জমিদারি নেই ।’

তুলসী তীব্র গলায় বলেছিল, ‘তা’ নেই । কারণ, আপনি তো ন’কুঠাকুরপোকে দিয়ে গেছেন দানপত্র লিখে ।’ বলে, শ্রায়তীর্থ মুখের প্রত্যেকটি ভাঁজ তীক্ষ্ণ চোখে দেখছিল তুলসী । চণ্ডীচরণ শঙ্কিত গলায় জিজ্ঞেস করেছিলেন, ‘কে বলেছে ? ন’কড়ি ?’

‘তা’ বলব কেন আপনাকে ?’

ক্ষণে মেঘ ক্ষণে রোদ নৈয়ায়িকের রেখাবহুল লোল মুখে । মুখের রেখা কাঁপিয়ে, আশ্বস্ত গলায় বলেছিলেন, ‘তুই একটা পাগল নাত বউ ।’

তৎক্ষণাৎ সাপিনীর মত লকলকিয়ে উঠেছিল তুলসীর জিভ, ‘আমি পাগল না হলে, আপনি এ বুড়ো বয়সে এত চতুরালি খেলছেন কি করে ?’

চণ্ডীচরণ ভাঙা গলায় শীৎকার দিয়ে উঠেছিলেন, ‘হে নারায়ণ ।’

তুলসী যেন উন্মাদিনী হয়ে উঠেছিল । তার তখনকার স্মৃতিত নাসারন্ধ্র, বহ্নিশিখা চোখ, আলুলায়িত প্রায় পিঙ্গল চুল আর বসন বিস্তৃত অটুট

উদ্ধত শরীরের দিকে তাকিয়ে কত পতঙ্গ পুড়ে মরতে পারত। দ্বিজ-  
পাড়ার যে পতঙ্গের দল, পঙ্গপালের মত গ্রায়তীর্থের বিশাল শরিক-  
ভাগ বাড়ির আনাচে কানাচে বেড়ায় ঘুরে, পুড়ে মরবারই আশায়।  
কিন্তু নৈয়ায়িকের নোনা ইটের ভাঙা পাঁচিল তারা ডিঙাতে পারে না।  
তুলসীর ক্রুদ্ধকণ্ঠেও দীপক রাগিণীরই ঝঙ্কার। তাতে আগুন ঝগসে  
ওঠে। বলেছিল, ‘আপনি মনে করেন, আমি কিছু বুঝিনে, না ?  
আমার ছেলেপিলে হচ্ছে না দেখে, আপনার যে এত দুঃখ, তার  
কারণ আমি জানিনে ভেবেছেন, না ? আমার ছেলেপিলে না হ’লে  
আপনি আমাকে কিছুই দেবেন না, জানি আমি, বুঝেছেন ? জানি  
জানি জানি। ন’কু ঠাকুরপো’র সঙ্গে দরজা বন্ধ ক’রে কি এত কথা হয়  
আপনাদের দুজনের ?’

দুঃখে নয়, দারুণ ক্রোধেরই বাষ্পে গলার স্বর রুদ্ধ হ’য়ে আসছিল  
তুলসীর। ঘন ঘন নিঃশ্বাসে ফুলে ফুলে উঠেছিল তার উদ্ধত উদ্ভূঙ্গ  
বুক। সে মূর্তি বাঘিনীর চেয়েও যেন ভয়ংকরী।

গ্রায়তীর্থ যেন বিস্ময়ে বেদনায় স্তব্ধ হ’য়ে গিয়েছিলেন। তার ছানি  
পুড়া চোখের ঘষা ঘষা মণিচুটি যেন কোন স্তূপের নিবদ্ধ স্থির।  
মুখের দড়ির মত তার নড়বড়ে গলার শিরগুলি, আর সারা মুখের  
শিরগুলি কাঁপছিল থরথর ক’রে। কিংবা বুঝি ভয় তাঁর সারা মুখে।  
অশ্রুভব করতে পারছিলেন তুলসীর ওই ভয়ংকরী মূর্তি। আশঙ্কা  
করাছিলেন, বুঝি এই পুরনো অন্ধ কুঠরী ঘরটায় তাঁর ওপর তুলসী  
কাঁপিয়ে প’ড়ে টুকরো টুকরো ক’রে ছিঁড়ে ফেলবে তাঁকে। ছিঁড়বে  
তার শাস্ত্র স্থলঙ্গ চাকচিক্যশালী দাঁতে, রক্তাভ নখরে।

তুলসী প্রায় চীৎকার ক’রে উঠেছিল, ‘কি, কথা বলছেন না যে ?  
কোন গ্রায় বুঝি যোগাচ্ছে না এখন মুখে ?’

নৈয়ায়িকের গ্রায় বোধহয় বোধগম্য হচ্ছিল না। বলেছিলেন, ‘হে  
ভগবান ! কি বলব রে নাত বউ, তুই বোকা।’

‘হ্যাঁ, আমি বোকা। আর আপনার নাতি তো কবেই নিজের পরকাল  
করবারে ক’রে বসে আছে, তাই আপনি আমারও সর্বনাশ করতে

চান। এ বয়সে আপনার কুষ্ঠ হবে, গলে গলে পড়বে, ব'লে রাখলাম।'।

ছায়তীর্থ যেন ভয়াত' গোড়া গলায় চাঁকায় করেছিলেন, 'হে পরমেশ্বর, হে জগৎপিতা 'রক্ষা কর, মুক্তি দাও। মুক্তি দাও।'

ঐক্য বিজ্ঞপে চিবিয়ে চিবিয়ে 'বলেছিল তুলসী, 'মুক্তি? মুক্তি পাবেন আপনি? পান কত মুক্তি পাবেন।' ব'লে শিকল তুলে দিয়ে চলে গিয়েছিল সে।

সম্পত্তি চায় তুলসী। স্বামী জগদীশের কাছে কিছুই চাওয়ার নেই তার। সবাই বলে ম্যাট্রিক পাশও নাকি কবেনি জগদীশ। তবু, রাণীর বাজারের এক কারখানায় 'বাবু' কাজ করে সে। বোধহয়, কৈশোর ও যৌবনের সন্ধিক্ষণ থেকেই, রক্তে প্রথম ঘূর্ণীলাগা আবর্তে কয়েক বছর ধরে হাবুড়বু খেয়ে, জগদীশ এখন অকাল বৃদ্ধ। রক্ত মাংসের এই অপরূপ রূপবতী তুলসীকে সে এখন অর্ধেক মানবী স্ত্রীনেই বোধহয় লক্ষ্য করে। দুই চোখে অপরিসীম অক্ষম ক্ষুধা ও অশেষ বিন্ময় নিয়ে তুলসীর দিকে চেয়ে থাকা আর তুলসীর সঙ্গে এক ঘরে এক শয্যায় মরার মত শুয়ে থাকাটাই যেন ভাগের হাতে আখেরি আত্মসমর্পণ। রাণীর বাজারের ইতিবৃত্তে, পারিবারিক যে ঐতিহ্য বহন করার কথা ছিল জগদীশের, তাতে নৈয়ায়িক না হোক, কলেজের অধ্যাপক, নিদেন স্কুল মাস্টারি করার মত দিগ্গজ হতে বাধা ছিল না।

কিন্তু আপত্তি ছিল রাণীর বাজারের বিধাতার। যাদের ধনের<sup>৩</sup> গরিমায় রাণীর বাজার কোন এক কালে গব' করেছে, মানের গৌরব এখনো একেবারে ধুয়ে যায়নি কালের জলে, তাদের দিকে অনেক বছর ধরে, রাণীর বাজারের বুক চেপে চেপে চলা, আদিম স্থাপদ সর্বনাশটা খাবা বাড়িয়েছে।

কিন্তু বিশেষ সুবিধে করতে পারেনি কখনও। গৃহস্থের বাড়ি ও মন্দিরের পাশে পাশে থেকে, সেই সর্বনাশ অনেক প্রলোভন দেখিয়েছে, অনেক মাথা কুটেছে পরাজয়ের ঘানিতে।

তারপর, ধন ও মানের গৌরব যখন ফোঁপড়া ঢেঁকি হতে বসেছে, সেই সময়, প্রাচীন বাড়িটার চৌহদ্দি থেকে বেরিয়ে, দিশেহারা

জগদীশ একটা পথ খুঁজে মরছিল। শরিকভাগ বাড়ির মধ্যে অনেক জগদীশ ছিল। ওপরে না হোক, ভিতরে ভিতরে তাদের, শতাব্দীকাল ধরে ক্ষয়ের মারটা দুর্বল করেছিল অনেকখানি। হারিয়ে যাওয়া ধনগৌরবের হাহাকার, আধুনিক কালে ন্যায় স্মৃতিতে বিতৃষ্ণা, এই দু'য়ে মিলে, একটি বন্ধ জলা সৃষ্টি করেছিল জগদীশের সামনে। নীল রক্তে অনেক আগুন নিয়ে জগদীশ ঝুঁকে পড়ল রাণীর বাজারের সেই সর্বনাশেরই দিকে।

এক মুহূর্ত বিলম্ব না করে স্থাপদ থাবাটা জগদীশকে টেনে নিয়ে গেল তার আদিম কোটরে।

ন্যায়তীর্থ তখন স্ববিরতের পর্যায়ে পৌঁছেছেন। পিতৃমাতৃহীন জগদীশকে বাঁধবার কেউ ছিল না।

দ্বিজপাড়ার নৈয়ায়িকের পৌত্র গেল রাণীর গলিতে। ফানুসের খেলা আর কোথায় এত ভাল জমে? রিক্ত জীবনের ঝংকার আর কোথায় বাজে এমন করে? পথভ্রষ্ট দিশেহারা রক্তধারা তো এখানেই চঞ্চল হয়। এই আবর্তেই পড়ে গলে, লীলা সাজ করে।

গৌরব মরেও মরে না। ভাঙা জীর্ণ মন্দিরের ইঁট নিয়ে লোকে

মত ইতিহাসের কথা স্মরণ করে।

রাণীর গলিতে সাড়া পড়ে গিয়েছিল। ভাঙা মন্দিরের ইঁট পাওয়া যাচ্ছে। দ্বিজপাড়ার ধনী ও মানী পণ্ডিতের নাতি এসেছে। হালের পণ্ডিতের মত নিউকাটে ঝাঁটা বুলানো লুটনো কোঁচা না থাকতে পারে পণ্ডিতের নাতির। হাওয়াইয়ান সার্ট আর আমেরিকান পাতলুন না উঠতে পারে তার অঙ্গে। পণ্ডিতদের ট্যাংকেতেই সোনা রূপো লাখ টাকা ঘোরে। নিতে হ'লে ওখান থেকেই খুলে নিতে হবে।

জগদীশের আশেপাশে কাছাকাছি একেবারে কিছুই ছিল না, তা' নয়। যা' ছিল, সেটুকুও রাণীর গলিতে কিছু কম নয়। অতএব স্থাপদ থাবাটা মায়া বিস্তার করল সম্ভরণে, নিখুঁত করে।

নিজের এনুতেজারিতে যে নগদ টাকাটা ছিল, সেটা ফুরোতে বেশী-দিন সময় লাগল না।

ন্যায়তীর্থ পৌত্রকে ডেকে না পেয়ে ক্ষুব্ধ হ'তেন। তাঁর বিধবা মেয়ে ভবানী জবাব দিতেন, 'জগু তো এখনও বাড়ি ফেরেনি বাবা।'

নৈয়ায়িক কথা কম বলতেন। কিন্তু জগদীশের এত বেশী বাড়ি না থাকার কথা শুনে শুনে, কপালে তাঁর চিন্তার রেখা দেখা দিয়েছিল।

বুকের মধ্যে কাঁপছিল শুধু ভবানীর। কারণ তিনি তো স্ববির নন। চোখে ছানি পড়েনি। তিনি ছু চোখ ভরা ভয় ও বিস্ময় নিয়ে ভ্রাতৃপুত্র জগদীশকে দেখছিলেন।

ভবানী এসেছেন অল্পদিন। জগদীশের মা মারা গিয়েছেন তাই আসতে হয়েছে। আবার জগদীশ বিয়ে করলেই তিনি চলে যাবেন।

চণ্ডীচরণের তিনি গলগ্রহ নন। সংসার চালাবার দেখবার কেউ নেই। তাই এসেছেন সংসার চালাতে।

তিনি শুধু জগদীশের জন্ম ভয় পাচ্ছিলেন না। নিজের একমাত্র ছেলে ন'কড়ির ভাবনা তখন তাঁকে পেয়ে বসেছে। না, নকড়ি জগদীশের দ্বারা রাগীর গলিতে যাবার প্রেরণা পাবে, সেকথা একবারও ভাবেন না ভবানী। তাঁর বিশ্বাস, নকড়ি সে স্তর পার হ'য়ে এসেছে। সে তো প'ড়ে পাওয়া যোল আনা পায়নি। কানাকড়ি খুটে সে মানুষ হয়েছে। কিন্তু সংসার বড় বিচিত্র। একই বাড়িতে পৌত্র যখন মন্দ পথে যায়, দৌহিত্র তখন বিদ্বান সচ্চরিত্র হ'য়ে সেই বাড়িতেই বিরাজিত। এ ভবানীরই অপরাধ।

কিন্তু দিনে রাতে ন্যায়তীর্থ যতই জগু জগু ক'রে ডাকেন, ভবানী ততই শঙ্কিত জবাব দেন, 'জগু এখনো বাড়ি ফেরেনি বাবা।'

নগদ টাকার পরেই, জগদীশের আপাত নিজস্ব টুকরো টাকরা স্বাবর সম্পত্তি বিক্রী শুরু হল। চণ্ডীচরণ ন্যায়তীর্থের সবই তার প্রাপ্য। সুতরাং ভবিষ্যতে তার অভয় ছিল।

কিন্তু ভবানী আর অপেক্ষা করতে পারলেন না। বাপের কাছে সমস্ত কথা খুলে বললেন। ন্যায়তীর্থ অবাক হলেন না। এইটাই আশ্চর্য। মেয়ের মাথায় হাত দিয়ে বলেছিলেন, 'ভূমি অত উতলা হ'য়ো না ভবো। মিছে ভয় পেও না। আমি সব বুঝতে পারছিলাম। তোরা

কোন দোষ নেই, তাও জানি। তুই তাড়াতাড়ি নকুকে বল, বোস-পাড়ার অবনী উকিলকে সে যেন সন্ধ্যাবেলায় ডেকে নিয়ে আসে আমার কাছে। ন'কুও তখন থাকবে আমার কাছে।'

‘বাবা !’

মেয়ের কণ্ঠস্বরে চমকেই উঠেছিলেন নৈয়ায়িক। বলেছিলেন, ‘হেসে ফোগলা মাড়ি বার ক’রে বলেছিলেন, ‘ভয় নেই ভবো। তুমি ভাবছ, জগদীশকে না দিয়ে, আমি আমার সব কিছু ন’কুকে দিয়ে যাব ? তাতে লোকে তোমাকে কলঙ্ক দেবে বাপকে দিয়ে তুমি নিজের ছেলের নামে সবকিছু করে দিয়েছ, এসব কথা তোমাকে শুনতে হবে ভাবছ ? সে ভয় করো না ভবো। আমি কখনো পাপ করিনি, করব না। যা করব, তা গ্নায় ছাড়া অগ্নায় হবে না। পরে জানতে পারবি।’

কী করেছেন গ্নায়তীর্থ, কে জানে। কিন্তু জগদীশ ফিরে এসেছিল রাণীর গলি থেকে।

রাণীর বাজারে রাণীর ঋণ শোধ ক’রে যখন শেষবারের জন্ম ঘরে ফিরে এল নৈয়ায়িকের বংশধর, নিয়তির কাছে সে তখন নিজেকে সম্পূর্ণ সঁপে দিয়েছে।

একবার বুঝি গ্নায়তীর্থের যৌবনের কঠোরতা ফিরে এসেছিল। স্বাক্ষালাপ ছিল না আর জগদীশের সঙ্গে। ভবানীকে ডেকে বলেছিলেন, ‘জগদীশকে বাড়ি ছাড়া করব না। কিন্তু ওর জন্ম যেন রান্না না হয় এ বাড়িতে।

সেটা ভবানী এমনিও পারবে না, জানতেন ন্যায়তীর্থ। কিন্তু ভবানী অন্য কথা বলেছিলেন। বলেছিলেন, ‘কিন্তু বাবা, জগু বড় অন্ত্র তাতে একটু ডাক্তার দেখানো দরকার।’

চণ্ডীচরণ বলেছিলেন, ‘পাপের চিকিৎসা আমার পয়সায় ! এ বাড়িতে হবে না ভবো। জগুকে জানিয়ে দিও।’

ভবানী কিন্তু ছাড়েননি। বলেছিলেন, ‘এতো তোমার ঠিক কথা নয় বাবা।’

‘কেন ?’

‘এ বাড়ির পুরুষেরা অনেকের অনেক পাপ দূর করেছেন।

প্রায়শ্চিত্তের বিধান দিয়েছেন। সব পাপ তো এক রকম নয়। এক এক পাপের এক এক রকম চিকিৎসা। তোমরা আশীর্বাদ করো। জগুকে বাঁচাও বাবা। নইলে সে মরে যাবে।’

নৈয়ায়িকের গলার স্বর ভেঙে এসেছিল। বলেছিলেন, ‘এসব কথা তোকে বুঝি নকু শিখিয়েছে?’

‘কেন বাবা? আমি কার মেয়ে, সেটা একবার ভেবে দেখবে না?’

ন্যায়তীর্থ দু’হাতে মেয়েকে জড়িয়ে ধরেছিলেন, আর ছেলেমানুষের মত কঁদে ফেলেছিলেন। বলেছিলেন, ‘মা আমার! তুই জগুর ভগবতী। তোর কল্যাণে সে বাঁচবে।’ তারপর একটু প্রকৃতিস্থ হয়ে বলেছিলেন, ‘চিকিৎসা কর। তারপরে ওকে একটা রোজগারের রাস্তা দেখতে বল।’

চিকিৎসা হয়েছিল। প্রাণে বেঁচেছিল জগদীশ। কিন্তু আসলে, ন্যায়তীর্থের স্ববিরত্বের সঙ্গে তার কোন তফাৎ রইল না। জরা নিয়ে সে যৌবনের ছদ্মবেশ পরে রইল। তারপরে চটকলে চাকরি পেয়েছে। সেটাও বোধহয়, বংশ গোরবেই। কারণ রাণীর বাজারের চটকলে রাণীর বাজারের লোকেরাই কাজ করে, তারা চেনে জগদীশকে।

কিন্তু ন্যায়তীর্থ যেটা সব চেয়ে বড় ভুল করেছেন, সেটা হল, পৌত্রকে বিয়ে দিয়ে নতুন ক’রে ঘরে বাঁধবার পরিকল্পনা। ভুল ঠিকই, জীবনের শেষে আর একমাত্র সাধ তো ওইটুকুই ছিল। বংশরক্ষাকে রে তিনি পরম ধর্ম বলে জানেন।

তাই জ্যোতিষশাস্ত্রীর মেয়ে এল। তার হাতে সংসার বুঝিয়ে দিয়ে, ভবানী ছেলে নিয়ে পালালেন। পালিয়ে বাঁচলেন। যদিও মৃত স্বামীর সামান্য ক্ষুদ্রকুড়ো নিঃশেষ ক’রে, শিকড় গাড়লেন এই রাণীর বাজারেই।

দরিদ্র মা আর দরিদ্র সন্তান। রাণীর বাজারের পাপের চোখ ধাঁধানি আলোয় যে অশেষ পুণ্ডকে চোখে পড়ে না, সেইখানে তাদের বাস।

এল তুলসী। কিন্তু ন্যায়তীর্থের সঙ্গে নাতির মুখ দেখাদেখি, বাক্যালাপ বন্ধ হয়েছে অনেকদিন। সেই অবস্থা আজকেও আছে। জগদীশ ভুলেও কখনো চণ্ডীচরণের ঘরে আসে না। চণ্ডীচরণও কখনো জগদীশের খোঁজ খবর নেন না। মাঝখানে পড়েছে তুলসী।

তর্করত্ন জ্যাঠা আর শ্যামতীর্থ দাদাশুভ্রের কাছে যে সব শাস্ত্রে তুলসী কিছু অধিকার পেয়েছে, জীবনে তা কোনদিন কাজে লাগবে কি না কে জানে। কিন্তু আর দশটি সাধারণ মেয়েদের মতই তৈরী হয়েছে তুলসী। বিয়েকে সে বিয়ের মতই দেখেছে। যে বিয়ে স্বপ্নের মত, স্বর্গের মত। রক্ত আর জীবনের আশৈশবের নিংড়ানো রস দিয়ে লালিত সেই বিয়ে। সে পুরুষ চেয়েছে। কালিদাসের মত কবি, ধূর্জটির মত বীর সেই পুরুষ। ঐশ্বর্য চেয়েছে কুবেরের ভাণ্ডারের মত। কিন্তু সে তো হাশুকের চাওয়া। তাই আর দশজনের মত, তার ‘কিছুমিছু’ তো পাবে।

কিন্তু কোনটাই জোটেনি কপালে। তার চির সাধের রাত্রিতে, চিরবাসনার শুভরাত্রিতে সে পেয়েছিল এক নখদস্তহীন পুরুষ। শুধু চেহারায়। আর কিছু নয়। সে মানুষ কি না, সেটাও প্রশ্ন ছিল তুলসীর।

স্বামী লম্পট হয়। এই সমাজে যাকে লাম্পটটা বলা হয়, সেই রকম। তবু লাম্পটের সঙ্গে গুণ রূপ বুদ্ধি ঘৃণা ভালোবাসা দিয়ে সংগ্রাম করা যায়। জগদীশ লম্পটও নেই আর। ওইতেই সে নিজেকে নিঃশেষ করে এসেছে। তুলসী যাকে পেয়েছে, তাকে জীবজগতে ফেলা যাবে কি না তাতেও সন্দেহ।

তুলসী দেখেছে, বৈদিকপাড়া থেকে যেদিন সে প্রথম রাণীর বাজারের সন্ধ্যায়িকের ঘরে এসেছে, সেইদিন থেকেই জগদীশের কাছে তার কিছু চাওয়ার নেই।

কিন্তু জগদীশ যে ভাবে তুলসীর কাছে আত্মসমর্পন করেছে, এমনি আত্মসমর্পনের মূলে যে কলকাঠিটা দিবানিশি মনের গলিতে গলিতে কুটুর কুটুর করে, সেটা হল সন্দেহ। তুলসীর দিকে চেয়ে থাকে তার অক্ষম চোখ ক্রমেই বড় আর অপলক হ’য়ে উঠেছে। দেহের কোষে কোষে তার যত রক্ত, সব জমা হয়েছে দু’চোখে।

যেখানে সন্দেহ, সেখানেই ঘৃণা।

কিন্তু সে অধিকার তুলসীর যদিও বা ছিল, জগদীশের নেই। তার সম্বল শুধু ভয়। তুলসীর সূর্যচ্ছটা রূপ শুধু অধেক মানবী নয়, একটি অলৌকিক ভয়ও যেন জগদীশকে গ্রাস করে রেখেছে।



ন্যায়তীর্থের কাছেও তুলসীর চাওয়ার কিছু থাকত না, যদি শরিকানার চোরা দেউড়ি পার হ'য়ে টিকটিকির মত কেউ তাকে টুকে দিয়ে না যেত যে, বুড়ো তাকেও নাকি কাঁকি দেবেন। এখনো যা আছে, তুলসী যদি পায়, তবে তুলসীর আখেরের ভাবনা থাকবে না। কিন্তু বুড়োর নাকি মৃতলব স্মৃতিধের নয়। তিনি তাঁর সবকিছুই নাকি তুলসীর পিসীশাশুড়ির ছেলে, ন'কড়িকে দিয়ে যাবার মনস্থ করেছেন। তাই নকড়ির এত আনাগোনা, বন্ধ-দরজা ঘরে দাঁতুর সঙ্গে নকড়ির চুপি চুপি এত কথা। যদি তুলসীর সম্মান হত, তবু নাকি একটি রাস্তা খোলা থাকত। কিন্তু সে আশা কোনদিন মিটেবে না তার।

অতএব ?

নতুন নাটবউ নম্রলজ্জাবতী তুলসী দেখল তারই চার পাশে ঋণীদের ভিড়, কেউ তার প্রাপ্য মেটাতে চায় না। আমি আমার চিলে কোঠা থেকে দেখলাম, তুলসীর দু'কূলপ্লাবী রূপ ও যৌবনে একটি মহাপ্রলয়ের বাসনা পাক দিয়ে ফিরছে। ভয়ংকরী সর্বনাশের প্রতীক্ষা তার সর্বশূলক্ষণযুক্তা নিটুট অঙ্গে অঙ্গে।

আমি সভয়ে দেখেছি, যদিও তুলসীর স্মৃষ্টাম পায়ের অনামিকা ও অঙ্গুষ্ঠাঙ্গুলি নিপাটে চেপে বসছে মাটিতে, তবু নৈয়ায়িকের সদর দেউড়ি খোলা পড়ে আছে। অলক্ষ্যীর হাতছানি সেখানে আছে অফটপ্রহর।

তুলসীর নীলদ্রুতি বিশাল চোখ অনেকবার সেই হাতছানি দেখেছে চেয়ে চেয়ে। যত দেখেছে, ততই প্রবল স্মরণ ও রাগে, ফিরে এসেছে সে ন্যায়তীর্থের ঘরে। অন্ধ আক্রোশে, নতুন নতুন পীড়নের পন্থা খুঁজেছে সর্বনাশীর মত। নৈয়ায়িক বাড়ি নিরামিষাশী নয়। এ বাড়ির মস্ত বড় তীক্ষ্ণ আঁশবটির ধার চকচকিয়ে উঠেছে তুলসীর চোখে।

ন্যায়তীর্থের দেহ জুড়ে যত কালের গভীর রেখা সেই প্রতিটি রেখা শুধু ষড়যন্ত্রের জটিল লেখা ব'লে মনে হয়েছে তার। সে জটিল লেখা ভেদ ক'রে সম্পত্তি আদায় করতে চেয়েছে তুলসী।

কিন্তু জীবন বড় বিচিত্র। মন বিচিত্রতর। কাঁকিতে না পড়ার বাসনায় তুলসী যতই ভয়ংকরী, ততই জীবনের আর একটি জটিলতা

জড়িয়ে বেঁধে মারছে তাকে। সেই মারটাই বুঝি তুলসীর নিজেরো বিস্ময়। সবচেয়ে বেশী যাকে ঘৃণা করার কথা, সেই সম্প্রদায়ের দাবীদার ন'কড়িকে দেখাইলে, তুলসীর সব স্তম্ভাঙ্গণগুলি যেন শান্ত্রসম্মতভাবেই ফুটে ওঠে।

দীর্ঘ বলিষ্ঠ দেহ ন'কড়ি। গরীব বিধবা মায়ের, খুদ-সেদ্ধ খেয়েও কপালে তার বিশ্ববিখ্যাত জয়তিলক আঁকা। নম্র, অমায়িক কিন্তু কী একটা দৃঢ় কঠিন মানুষ ঢাকা পড়ে থাকে তার অতি সাধারণ বেশভূষায়। মুগ্ধ হ'তে যার বাঁধে না, কিন্তু বিমুগ্ধ করতেও আটকায় না যার, তেমনি আলো আঁধারের রহস্যের মত পুরুষ ন'কড়ি তুলসীর কাছে।

মহকুমার সংক্ষিপ্ততম শহর রাণীর বাজারের রাজনীতিতে ন'কড়ির বড় রকমের শরিকানা আছে। তাই সে চিরকালের বেকার। ছাত্র পড়িয়ে তাকে খেতে হয়।

নিজের ভরণপোষণ শুধু নয়, মায়েরও। কারণ রাজনীতির পরিচালনা ভাগের যে-অংশে সে স্বেচ্ছায় গিয়েছে, সে অংশকে আধুনিক ভাষায় 'নীচুতলা' বলা হয়। সেখানে যে নামহীন অগণিতদের ভিড়, আদিকাল থেকে তাদের নাম ছিল উলুখাগড়া। তারা তাদের জন্মবার কারণ জানত না। মৃত্যুর হেতু অজানা ছিল। যুগে যুগে তারা দেখেছিল, তারা জন্মায়, শ্রম করে, বাসা বাঁধে, আহার সংগ্রহ করে, মৈথুনে লিপ্ত হয়। সন্তান উৎপাদন করে। তারপর একদিন রাজারা লড়ে, আগুন লাগে, উলুখাগড়ারা উৎসর্গে যায়।

যে-দিন থেকে জীবন মৃত্যুর এই অজানা কারণের উৎস সন্ধানে যাত্রা করেছে তারা, সেই দিন থেকে তাদের নাম হয়েছে জনতা। নীচুতলার জনতা। গন্তব্যের একটি নিশানা তারা পেয়েছে। গন্তব্যস্থলের নাম, 'মানুষের মত বাঁচবার অধিকার'। কিন্তু সেখানে যেতে হলে বিস্তর বাধা। কারণ, মানুষের মত বাঁচবার অধিকার তাদের নেই। সেইজন্মে আইন, আইন রক্ষার্থে সশস্ত্র শক্তি এবং মাহুলি কবচ বশীকরণ জাতীয় কিছু অলৌকিক পরিকল্পনা, বাণী ও প্রতিনিধি সভা ছড়িয়ে রাখা হয়েছে।

এইসব বাধা যদি ওরা ডিঙাতে চায়, তা হ'লে তাদের বিদ্রোহী আখ্যা

দেওয়া হবে। আর বিদ্রোহী হলে তখন ‘মানুষের মত’ নয়, ‘তার বাঁচবার’ অধিকার-ই ছিনিয়ে নেওয়া হবে।

নীচুতলায় আজ সেই বিদ্রোহের সূচনা দেখা যাচ্ছে। নকড়ির কাছে সব দরজাই সেজ্ঞা বন্ধ।

শুধু যে সব অনিশ্চিত অবহেলিত দরজাগুলিতে আইন লটকানো নেই, তারই অগ্রতম, প্রাইভেটে ছাত্র পড়ানো।

ওপর তলার নীলামের বাজারে, চড়া দামে বিকোবার ডাক ছিল নকড়ির। কিন্তু নকড়ির পা দুটিতে শক্তি ছিল। সে ওই ডাকের মুখে শক্ত পা রেখে দাঁড়িয়েছিল। তাই সে দুর্বিনীত বলে আখ্যাত সেই সমাজে, যারা মনে করেছে, নকড়ির সবটাই দারিদ্র্যের আশ্রয়।

দুঃখ ও অনিশ্চিত জীবনের সব সময়ে দুটি পরিণতি আছে। একটি হল, সংসার মন্দ। মন্দ না হ’লে অনিশ্চিতকে নিশ্চিত করা যায় না। দূর হয় না দুঃখ। আর একটি, সংসারে ভাল আছে, মন্দও আছে। এ দু’য়ের দ্বন্দ্ব দিবানিশি। এ দু’য়ের টানাপোড়েনে মানুষ ক্ষতবিক্ষত। সেইটাই মানুষের আসল রূপ।

জীবনে যাদের এ টানাপোড়েন নেই, এ জঙ্গম পৃথিবীতে তারা স্থানু।

কিন্তু এ অনুভূতি মানুষ নিয়ত অনুশীলন ক’রে বেড়ায় না। জীবন-ধারণের প্রকৃতি তাকে গড়ে তোলে। বাতাস আছে, দেহের প্রতি রোম-কূপে তাকে অনুভব করা যায়। কিন্তু দেখা যায় না। এ অনুভূতি সেই রকম। কারণ বিবেক বাতাসের মত।

নকড়িরও সেই রকম। পুরোপুরি জেনে আর ভেবে নয়, সংসারের ভাল আর মন্দের নিরন্তর দ্বন্দ্বের স্বাভাবিক পথেরই শরিক সে শৈশব থেকে। বড় হ’য়ে যখন সেই ভাল মন্দের অর্থ সন্ধানী হ’য়ে উঠল মন, তখন সমস্তাটা দেখা দিল জীবন নিয়ে। এ জীবন নিয়ে কী করা যায়? যা ফাঁকি মনে হয়, মন্দ লাগে, তার বিরুদ্ধে সংগ্রাম করা যায়। কিন্তু কতটুকু করা যায়, প্রতিদিনের জীবনে সেইটিই নিয়ত প্রত্যক্ষের বিষয়।

কোনো উপদেশ নির্দেশের দিবানিশি বেড়াজালে মানুষ হয়নি নকড়ি। দরিদ্র, কিন্তু নির্ভা নিরহঙ্কার প্রসন্নতার মধ্যে দিন কেটেছে তার।

দক্ষিণ বাংলার নীচুতে এক বৈদিক পরিবারে তার জন্ম। জ্ঞান হ'য়ে সে দেখেছে, তার বাবা মা দু'জনেই বেশ বয়স্ক। আঁতুড়ে এক দিদি, দু' বছর বয়সে এক দাদা মারা গিয়েছিল। নকড়ি ছিল শেষতম সন্তান। যাকে ন'টি কড়ি দিয়ে, দেবতা নয়, বোধহয় শমনের হাত থেকেই কিনতে হয়েছিল। কিন্তু নকড়ির বাবা কোনদিন ছেলেকে নকড়ি বলে ডাকতেন না। তিনি ডাকতেন ধ্রুব বলে।

বাবা মা দুজনকেই ভালবাসত নকড়ি। কারণ, বাবা মা, পরস্পরকে যে নিবিড়ভাবে ভালবাসে, এটা সে দেখেছিল। সংসারে আর মানুষ ছিল না। বিহঙ্গ বিহঙ্গীর কুজন যদি কোথাও থাকে সে তাদের নিজেদের ঘরে। সে ঘরে কোনদিন উচ্ছল খিলখিল হাসি শোনা যায়নি মেয়ে গলায়। পুরুষের উল্লসিত আবেগ উচ্চ গলা কোনো কলরবে ধ্বনিত হ'য়ে ওঠেনি। কিন্তু নিঃশব্দে, নীরব হাসি, ও চোখে চোখে কথায় দুটি হৃদয়ের মিলিত মোহনায় যে কত উচ্ছ্বাস, কত বিচিত্র কলরোল, নকড়ির শিশু চোখে ও মনে কিছুই অজানা থাকেনি।

সকলের আড়ালে বাবা মা'কে ডাকত 'ভবন' বলে। সে গম্ভীর মিষ্টি ডাকের মধ্যে এমন একটি সুর বেজে উঠত যেন, আপনা থেকেই সহসা সমস্ত প্রাণে একটি নিঃশব্দ প্লাবন হ'য়ে যেত।

মাঝে মাঝে মেঘ ঘনিয়ে আসত সেই ছোট সংসারে। কাকা জ্যাঠারাই সে মেঘ নিয়ে আসতেন। বছরে একবার কি দু'বার বাবাকে নানান রকম নোটিশ, কোর্টের চিঠি পেতে হ'ত। সেগুলি আর কিছুই নয়, বাবা যে ক্রমেই নিঃশ্ব হ'চ্ছে, জমিজমা সব কিছুই শেষ পর্যন্ত কাকা জ্যাঠাদের ভোগে চলে যাচ্ছে, সে সব জানানো হ'ত। নকড়ি জানত, ব্যাপারগুলি ঘটছেন কাকা জ্যাঠারাই। বাবাকে ফাঁকি দিতে চান ওরা। কিন্তু বাবা সেগুলি চেয়েও দেখতেন না। খেতের ধান যেটুকু পেতেন তার হিসেব নিকেশ করতেন না কোনদিন। ঠাকুরবাড়ি নামে গ্রামে যে বড় বাড়িটি ছিল, সেখানে সরকারি ও বেসরকারি ব্যবস্থায় যে টোল চলত, তাতে শিক্ষকতা নিয়েই থাকতেন।

কিন্তু মায়ের মন মানত না। ভবানী উদ্বেজিত ক্রুদ্ধ হতেন।

নকড়িরও ভীষণ অপমান আর রাগ হত মনে মনে ।

নকড়ি দেখেছে, তার সামনেই বাবা মায়ের মাথায় আশীর্বাদের মত একটি হাত রেখে, আর এক হাতে মায়ের চিবুকটি তুলে ধরে বলতেন, 'ভবন, কেন মন খারাপ করছ ! যৈ-কাজ আমি করতে পারব না, সংসারে তার ফল ভোগও আমার জুটবে না । দাদা কিংবা ব্রজেন যে-সব কাজ করছে, তাতে জমিজমা সম্পত্তি ওদেরই প্রাপ্য । ওরা ওসব নিয়ে ভাবে, খাটে, ছুটোছুটি করে, কোর্টে যায়, উকিল ধরে, খরচও করে । সম্পত্তি রাখতে ও করতে গেলে, ওসবের প্রয়োজন আছে । আমি সে সব কিছুই করিনে, আমার কিসের দাবী ? রক্তের সূত্রে আমার অনেক পাওনা । দাদারা সে সব আমাকে দিতে চান না । না-ই দিলেন । সংসারের ধর্মের সূত্রে আমার যা পাওনা, তাতে ফাঁকিতে না পড়লেই হল । আমি গুরুত্ব হ'তে পারিনে, তাতে তুমি রাগ করছ কেন ?'

মায়ের চোখে তখন জল এসে পড়ত । বলতেন, 'আহা, আমি কি তোমার জন্মে রাগ করেছি নাকি ? কিন্তু গ্ৰীষ্ম পাওনা এমন করে কেড়ে নিলে রাগ হয় না ? কষ্ট হয় না বুঝি ? ন'কড়িটার কি হবে ?'

বাবা হাসতেন । বলতেন, 'ধ্রুব কি তার ঠাকুরদার সঞ্চিত সম্পত্তির আশায় সংসারে এসেছে ? ভবন, তুমি এক এক সময় বড় ছেলেমানুষ হয়ে পড়, তোমার আমার বাসনা ধ্রুব । সে বাসনাকে লালন পালন বড় করা, সে সব আমাদেরই । গরীবের ছেলে গরীবের মতই মানুষ হবে । চোখের জল মোছ ভবন ।'

ভবানী আঁচল দিয়ে চোখের জল মুছতেন । বাবা তখন ডাকতেন নকড়িকে, 'ধ্রুব, এদিকে এস ।'

নকড়ি কাছে আসত । বাবা তাকে এবং মা'কে দুজনাতেই বুকের কাছে টেনে নিতেন । বলতেন, 'ভবন, জীবনে জয় অনেক সৃষ্টি করা যায় । অবিচলিত থাকতে পারা তার চেয়ে অনেক ভাল । তাতে নিজের ভয় যায়, অপরেও একটু নিশ্চিন্ত হয় ।'

নকড়িকে বলতেন, 'ধ্রুব, মায়ের কাছে এখন থাক, গল্প কর, মায়ের কাজ করে দাও ।'

এমনি ছিলেন বাবা আর মা। মার প্রধান গল্প ছিল, তাঁর নিজের বাবা সম্পর্কে। অর্থাৎ চণ্ডীচরণ ন্যায়তীর্থের সম্পর্কে। নকড়ি জানত, রাণীর বাজারের দেশবিখ্যাত পণ্ডিত চণ্ডীচরণ ন্যায়তীর্থের সে দৌহিত্র। জানত শুধু নয়, অনেকবার রাণীর বাজারে এসেছে, দেখেছে চণ্ডীচরণকে। ন্যায়তীর্থ নকড়িকে কেবল তার বাবার কথা জিজ্ঞাসা করতেন। আর নকড়িকে বলতেন, ‘তোমার বাবা’ একজন মস্ত বড় মানুষ, এটা জানবে। খবরদার, কখনো তাঁর কথার অবাধ্য হবে না। আমাদের চেয়েও তিনি অনেক বড়।’

সেইজন্য দাদুকেও নকড়ির খুব ভাল লাগত। শুধু একটি কথাই বুঝত না। ভাবত, দাদুর নাকি অনেক বিষয় সম্পত্তি। কিন্তু নকড়িদের এত কষ্ট, কই দাদু তো কখনো তাদের কিছু দেয় না।

ছেলেমানুষ নকড়ি জানত না, তার মা কখনো তা নেবেন না। দাদু দিতে চাইলে মা বরং কষ্টই পাবেন।

বাবা মারা যাবার পর সেখানে থাকা দুর্ভাগ্য হয়ে উঠেছিল। নকড়ি তখনো ছোট। সবে কলেজে ঢুকতে যাচ্ছে। শুধু অসহায়বোধ করেই মা রাণীর বাজারে চলে এসেছিলেন। দাদু যেন তাতে কৃতজ্ঞতা বোধ করেছিলেন মায়ের কাছে। রাণীর বাজারেরই উত্তরাঞ্চলে ভবানীর নামে ছোট পুরনো একটি বাড়ী রেখেছিলেন নৈয়ায়িক। সেই বাড়িই আশ্রয় হয়েছিল। আজো সেখানেই আছে নকড়িরা।

এই পরিবেশের মধ্যে কোথায় বস্তুবাদী রাজনীতির জড় লুকিয়েছিল সেইটি বড় বিস্ময়। বাবা মা কিংবা দাদু, তাঁরা সকলেই ধার্মিক। স্নিগ্ধ স্নেহময় মানুষ। তার মধ্যে বাবা ছিলেন বিশেষ করে সত্যবাদী, নির্ভীক। ভবু সেখানে ভাববাদেরই লীলা। লোকায়তিক ধ্যানধারণার ছায়া সেখানে কবে থেকে কেমন করে পড়েছিল, নকড়িও জানত না। বোধহয়, নিক্রিয় কল্যাণ কামনা যে কোনো কাজের কথা নয়, একথা উদয় হয়েছিল নকড়ির মনে। উদয় হয়েছিল ইতিহাস পড়তে গিয়ে। ইতিহাসেই এম, এ, পাশ করেছে সে।

আমি আবার চিলেকোঠার ঘুলঘুলি দিয়ে প্রথম যেদিন দেখলাম,

বিধবা ভবানীর হাত ধরে নকড়ি এসে উঠল রাণীর বাজারে, সেদিন রাণীর বাজারের আকাশে, দলা দলা কালো মেঘ ছিঁড়ে একটি নীল স্থিরদ্ব্যুতি তীরের মত উত্তর থেকে দক্ষিণে ছুটে চলেছে। সেটা উল্কা নয়, বিদ্যুৎ নয়। কালো মেঘের মধ্যে সহস্রা ফেটে বেরিয়ে পড়া স্নিগ্ধ নীল আকাশের ফালিটাকে অমন উজ্জ্বল দেখাচ্ছিল।

আমি দেখলাম, সন্ত বিধবাবেশিনী ভবানী, আর মুণ্ডিতমস্তক রোগা ফর্সা নকড়ি। দুটি বড় বড় চোখে তার পিতৃবিয়োগের ব্যথা ও নতুন জীবনের কোঁতুহল। কেন যেন আমার চোখে সেদিন সন্ন্যাস ব্রতধারী নিমাইয়ের কথা মনে পড়ল। ভবানীকে মনে হল শচীদেবী।

রাণীর বাজারের ফেঁশনে প্রত্যাহের মতই দাঁড়িয়েছিল বিছে পাগলা। যাকে ডিঙিয়ে রাণীর বাজারের স্টেশনে, চেনা অচেনা কোনো যাত্রীই যেতে পারবে না। ভিক্ষে চাওয়ার স্বর তার গলায় থাকে না। মুখ করুণ করে হাত পেতে দাঁড়ায় না সে। বলে, ‘টিকিট বাবুকে টিকিট না দিলে বোতরগী পেরতে পার না। আর বিছের বেলায় লবডকা। সেটি হবে না। দু’চার প’সা ছেড়ে যাও দিনি বাবা।’

অন্যথায় বিছেকে ছাড়ানো মুশকিল। বিছেকে লোকে বলে পাগলা। রাণীর বাজারের লোকেরা এই পৃথিবী নামক গ্রহেরই জীব। সূত্রাং আর সকলের মত, তারাও একবার একটি কথা একজনের সম্পর্কে শুনলে, বিশ্বাস করে নিশ্চিন্ত ও সন্তুষ্ট হয়। বিছেকে পাগল ভেবে আর নিজেদের সুস্থ ভেবে আছে তারা বহাল তবিয়তে।

আমি যেন দেখেছি, মহাকালের নির্দেশে, পাগলের বেশ ধরে রাণীর বাজারের মানুষদের বিছে খুব এক চোট বিজ্রপ ক’রে নিচ্ছে।

বিছের আছে অনেক কথা। তাই এখন থাক। যে কথা বলছিলাম আমি দেখলাম, বিছে সরাসরি নকড়ির চিবুক ধরে, আদর ক’রে বলল, ‘এয়েছ আমার চাঁদ। এস। পকেটে প’সা নেই তো খোকনের ? যাও, ছেড়ে দিলুম। পরে মিটিয়ে দিও।’

আমি দেখলাম, রাণীর বাজারের সেই সর্বনেশে লড়িয়ে ষণ্ডটা দাঁড়িয়ে ফেঁশন ও রাস্তার প্রান্তনে। ভয়ে সেখানে লোকজন নেই

কাছাকাছি। নকড়ি মায়ের সঙ্গে তার পাশ দিয়ে গেল খুনী শিং  
জোড়া ছুঁয়ে। ষণ্ড মাথা নামিয়ে নিল। শুধু চীৎকার করা সার  
হল লোকের, ‘মারলে, মারলে গুঁতো।’

আমি দেখলাম, রাণীর বাজারের পথিক আর দোকানীরা বারেক না  
তাকিয়ে পারেনি সেই মা ও ছেলের দিকে।

সেই থেকে রাণীর বাজারে নকড়ির জীবন শুরু।

বিয়ের কোলাহলে ভিড়ে, নকড়িকে তুলসী যেন দেখেও দেখেনি।  
চিনেও চিনতে পারে নি। অনেকের মধ্যে খুঁজে পায়নি। কোলাহল শুধু  
বিয়ে বাড়িতে নয়। তার বৃকের মধ্যেও ছিল। বৃকের মধ্যে অনেক  
মামুষেরও ভিড় ছিল তার।

সেই কোলাহল ও ভিড় কেটেছিল ফুলশয্যা রাত্রেই। নিঃশব্দ স্তব্ধ  
বুক নিয়ে তুলসী বাপের বাড়ি গিয়েছিল। ফিরে এসে দেখেছিল, পিশি  
শাশুড়ি নেই। সংসার তুলসীর।

সেই নিঃশব্দ স্তব্ধতার মধ্যে ন’কড়িকে প্রথম যে দিন এই পুরানো  
বাড়িটা কাঁপিয়ে ঢুকতে দেখেছিল তুলসী, বাড়িটার মত তারো বৃকের  
\* মধ্যে কঁপেছিল। তার সমস্ত স্তব্ধতা খান খান হয়ে গিয়েছিল ভেঙ্গে।  
ঘোমটা টেনে সে কূল পায়নি।

তারপর লজ্জা কাটিয়ে প্রথম যে দিন তাকিয়েছিল ন’কড়ির চোখের  
দিকে, সেইদিন থেকে তার চোখের পাতায় বিচিত্র ত্রীড়া একই রয়ে  
গিয়েছে। বৃকের কাঁপুনিটা বন্ধ হয়নি কোনদিন। যে জোয়ার তার  
শরীরের কূলে কূলে মাথা কুটে মরে, ন’কড়ির সামনে যেন সেই আবর্ত  
সহসা একটি গতি পেয়ে, হারিয়ে যাবার বাসনায় স্তব্ধ হ’য়ে যায়।  
সে শান্ত হয়, হাসে, জল গড়িয়ে দেয়, কথা বলে।

আমি আমার চিলেকোঠা থেকে দেখেছি, ন’কড়ির সামনে  
তুলসী নিজের রক্ত কোষে কোষে, তার সম্ভানের কান্না শুনে পায়।  
তার মাতৃহের হাহাকার ব্যথিত চোখ, ন’কড়ির সর্বাঙ্গে, তার পায়ে,  
মাথা কুটে মরে।



কিন্তু তুলসীর মনে হয়, ন'কড়ির টানা টানা চোখ দুটিতে যেন আলো আঁধারের খেলা। হাসিতেও তার রহস্য। কথায় তার আড়ম্বর্তা নেই, রসিকতা যেন ইঙ্গিতময়। কিন্তু যখন সে চলে যায় কেমন করে যেন সব ইঙ্গিতের বাষ্প যায় উড়ে।

তখন মনে হয়, ন'কড়ির সব ইঙ্গিত, সব হাসিটুকু যেন বন্ধ দরজা ঘরের গুপ্ত আলোচনারই একটি অঙ্গ। তুলসীরই সর্বনাশের ছলনার রহস্য নিশ্চয় ন'কড়ির চোখে।

ন'কড়ি এসে যখন ঠাট্টা ক'রে বলে, 'এবাড়িটাতে, একলা ওই বুড়ো মানুষটাকে নিয়ে থাকতে তোমার ভয় করে না বউদি ?'

তখন তুলসী জবাব দেয়, 'ভয় করলেই বা আমার এ ঘরে এসে সাহস দেবে কে ঠাকুর পো ?'

তুলসীর দু' চোখের দিকে তাকিয়ে, ন'কড়ি হঠাৎ যেন চমকায়। বলে, 'তোমাকে সাহস দেবার দরকার নেই অবশ্য, বরং, তোমাকেই যেন ভয় করে।'

'আমাকে ? কেন ঠাকুর পো ?'

হেসে বলে ন'কড়ি, 'আয়নায় একবার নিজেকে দেখ।'

কথায় কথায় নিশিতে পায় তুলসীকে। বলে, 'সারাদিনই তো দেখি, কই আমার ভয় করে না তো ?'

'ভাল ক'রে দেখনি বোধ হয়।'

'দেখেছি ঠাকুর পো। কিন্তু, সে পারা লাগানো কাঁচ, তোমার চোখ তো নয়।'

অট্টহাসিতেও বুঝি ন'কড়ির জুড়ি মেলা ভার। বলে, 'ওরে বাবা, বউদি, তুমি বোধহয় রাগ করেছ।'

'না।'

'তবে ?'

তুলসী তার বিশাল চোখ দুটি নিয়ে আর তাকিয়ে থাকতে পারেনি ন'কড়ির দিকে। চোখ নামিয়ে বলে, 'শুধু ভয় পাও ঠাকুর পো, তাই ভাবি।'

একটু থেমে আবার বলে, ‘আমারো যে কত ভয় ক’রে ঠাকুর পো।’ চোখ ভুলে দেখে, ন’কড়ি তখন তার দাঁড়র ঘরে দরজা বন্ধ করেছে। যেন, শুধুই ভোলানো, শুধুই ছলনা ভুলসীকে। বন্ধ-দরজাটার গায়ে যেন ভুলসীর বন্ধনার অলিখিত ষড়যন্ত্র কাহিনী লেখা হ’তে থাকে। অসহ্য স্বগায় ও রাগে, বন্ধ দরজাটার দিকে তাকিয়ে থাকে ভুলসী। যত খাতকের দল নানান বেশে ঘিরে থাকে তাকে, কিন্তু কেউ দেনা মেটায় না।

তবু যতক্ষণ অদর্শনেও নকড়ির অবস্থিতি থাকে এ বাড়িতে, ততক্ষণ ধরেই কী একটি সুর যেন বাজতে থাকে ঘরে ঘরে সিঁড়িতে বারান্দায় দালানে। কাজ প’ড়ে থাকে। দাঁউ দাঁউ ক’রে উন্নুন্টা জ্বলতে থাকে, বোধহয় ভুলসীর বুকেরই মত। জ্বলতে থাকে, জ্বলতেই থাকে অবহেলায় ও অকাজে। কেউ ফিরেও তাকায় না।

ঘরে যায় ভুলসী। সত্যি সত্যি গিয়ে দাঁড়ায় আয়নার সামনে। পার্শ্ব লাগানো কাঁচ, নাম তার আয়না। ভুলসী প্রতিবিম্ব দেখে, চোখে তার ঈষৎ রক্তাভ। ঠোঁট যেন সছ দংশিত রক্তাক্ত। খোলা চুল, আর বুকের মধ্যে যে হিংস্র নখ থাবাটা আঁচড়াচ্ছে, সেই থাবাটাই টানা-টানি করছে তার বুকের আঁচল নিয়ে।

পালিয়ে আসে ভুলসী। সত্যি তার ভয় করে সেই মূর্তি দেখে। কিন্তু পালিয়ে এলেও, আরো একটি আয়নায় নিজেকে দেখবার জন্য বিলুলিত হ’য়ে ফেরে নৈয়ায়িকের নীচু ছাদ আঁটা নাটে। সমস্ত সংবিত যেন একটি স্তূতিমুখে জড় হয়ে পড়ে থাকে বন্ধ দরজাটার গায়ে। কখন পুরনো দরজাটা ককিয়ে উঠে খুলে যাবে।

তারপর এক সময়ে যখন দরজা খুলে যায়, তখন নকড়ির যাবার পথে ভুলসী যেন দাঁড়িয়ে থাকে আনমনে। নকড়ি বলে, ‘কি ব্যাপার সেই থেকে দাঁড়িয়ে আছ নাকি?’

ভুলসী চোখ ভুলে একবার তাকায়। মাথা ঝেঁকে পড়া চুল সরিয়ে বলে, ‘হ্যাঁ। কেন, ভয় করছে?’

নকড়ির দীপ্ত মুখে ছায়া সহজে ঘনায় না। বলে, ‘ভয় করবে কেন?’

অভিমানের একাধিক ঝিলিক দেখা যায় তুলসীর জ্বতে । বলে, ‘যদি আড়ি পেতে থাকি ?’

নকড়ি হাসে হা হা ক’রে । বলে, ‘পাত্তে পার, কিন্তু কথা বলেছি চুপি চুপি, দাছর কানে কানে । শুনবে কেমন ক’রে ?’

তুলসীর গলা যেন সহসা কঠিন শোনায় । বলে, ‘শুনতেও চাই নে !’  
নকড়ি বুঝি পেছুতে গিয়ে এগিয়ে আসে ছ’ পা । ‘বলে, তা’ জানি । কিন্তু রাগ করছ যে ?’

তাতে চিস্তিত নাকি নকড়ি ? কথার সুরে যে তারগুলি বাজে, তার মধ্যে একটিতে যেন স্নেহের আভাস বাজে । তুলসীর হাসতে ইচ্ছা করে । হাসি চেপে বলে, ‘যেন আমি রাগলে তোমার কিছু যায় আসে ?’

নকড়ি হেসে বলে, ‘একটুও কি যায় আসে না ?’

তুলসী যেন ঘুমভাঙা স্বরে বলে, ‘কতটুকু ঠাকুরপো ?’

জিজ্ঞেস ক’রে যখন তাকায় তুলসী, তখন তার চোখের পলক আর পড়তে চায় না । যে-আরশিখানির জন্ম তার প্রতীক্ষা, সেই আরশিতে যেন দেখতে থাকে নিজেকে । কিন্তু সে আয়না যেন কতদূরে । নিজেকে আবিষ্কার করতে গিয়ে, লজ্জাই যেন শিরশিরিয়ে ওঠে তার সর্বাস্ত্রে ।

নকড়ি স্বচ্ছ হেসে বলে, ‘সেটুকু মেপে দেখিনি ভাই ।’ বলে দাঁড়ায় না, পা বাড়ায় যাবার জন্তে ।

তুলসী ঘুরে দাঁড়িয়ে প্রায় পথ আগলায় । বলে, ‘সে কি, আজ তেফ্টা পায়নি বুঝি ?’

নকড়ি বলে, ‘তাও তো বটে, ভুলেই গেছি ? শীগ্গিরি জল দাও ।’

প্রথম প্রথম যখন সংকোচ করত তুলসী কাছে আসতে, তখন ওইটি অস্ত্র ছিল নকড়ির কাছে ডাকবার । কিন্তু কেন যে সংকোচ, সে খবর বোধহয় রাখেনি নকড়ি ।

তুলসী বলে তেফ্টার কথাও মনে করিয়ে দিতে হবে রোজ ? নকড়ির ছ’চোখে যেন সহসা অপার রহস্য পড়ে উপ্ছে । বলে, ‘এত বারে বারে তেফ্টা, শেষে যদি না মেটে, তাই ভুলে থাকতে চাই ।’

আয়নটা বুঝি সত্যি স্পষ্ট হয়ে ওঠে, নিজেকে আবিষ্কারের ভয়ে তখন

তুলসী আর দাঁড়াতে পারে না সামনে । দ্রুত পায়ে জল আনতে যায় সে ।

"জল খেয়েই নামতে গিয়ে, সহজে নামতে পারে না নকড়ি । সিঁড়ির মাঝখানে গিয়ে থামে ।

'কিছু বলছ ?'

'শুনতে পেয়েছ কিছু ?'

'না ।'

তুলসী চুপ । হঠাৎ নকড়ি বলে, 'যে কথটা সে কোনদিন না ব'লে পারে না, দাছকে একটু বেশী করে দেখ বোদি ।'

আবার তুলসী মুখ খোলবার আগেই নকড়ি বলে, 'রাগ করো না যেন ।'

তারপর চলে যায় সহজে স্বচ্ছন্দে, একটি বিশেষ অবাধ্য গতিতে ।

রাগ রাগ রাগ । ভয় ভয় ভয় । সত্যি যেন তুলসীর সর্বাত্মক প্রলয়ের বাসনা ওঠে দপদপিয়ে ।

তখন ন'কড়ির আর তার নিজের দেখতে পাওয়া ভয়টাই ভয়াল হ'য়ে ওঠে তুলসীর মধ্যে । প্রতিশোধের ভয়ংকরতা নিয়ে ছুটে আসে শ্রায়তীর্থের ঘরে, পীড়ণে নিপীড়ণে বিপর্যস্ত করে দেয় বুদ্ধকে ।

মাড় ঢেলে দিয়ে, সেইদিন নিজের ঘরে বিছানায় পাশ বালিশ জড়িয়ে শুয়ে পড়েছিল তুলসী ।

আমি দেখছিলাম বন্ধ ঘরে নৈয়ায়িক চীৎকার করছিলেন খিদের জ্বালায় ।

রাণীর বাজারের শেষ নৈয়ায়িক, শ্রায়তীর্থ চণ্ডীচরণ, যাঁদের ধনগৌরব তো বটেই, যাঁর মানের ও পুণ্যের গৌরব ছিল রাণীর বাজারের ধূলায় । যাঁর স্ববিরত্বের পূর্বে রাস্তায় বেরুবার শেষ দিনটিতেও রাণীর বাজারের আপামর মানুষ কপালে হাত ঠেকিয়েছে, গণিকারা দরজার আড়ালে লুকিয়েছে, মহাজন গুণতি পয়সা ফেলে, গদি থেকে নেমে প্রণাম করেছে । সেই তিনি চীৎকার করে কাঁদছিলেন শিশুর মত ।

কাঁদছিলেন আর সারা গায়ের ফ্যান চেটে চেটে তবু খাচ্ছিলেন । দুটি ভাতের জন্ম, শ্রায়তীর্থ রুগ্ন ঘ্যান্ঘনে শিশুর মত ডাকছিলেন তাঁর পৌত্রবধূকে ।

আমি মহাকাল নই। রাণীর বাজারের নানান সত্যমিথ্যায়, প্রলোভন ও ত্যাগের সঙ্গে জড়িত পাশ-বন্দী মানুষ। নির্বিকার নই, আমার বিকার আছে। ন্যায়তীর্থ রাণীর বাজারের কোন অদৃশ্য খতিয়ানের ঋণ মেটাচ্ছেন দেখে ইতিহাসের বুকে নির্ধুর পদচারণা ক'রে, অটুহাসি হাসা আমার সম্ভব ছিল না।

আমি দেখছিলাম, ন্যায়তীর্থ হাজার চাটলেও তাঁর গায়ের রেখা আর কোনদিন উঠবে না। রাণীর বাজারের বিধাতা তাই নৈয়ায়িকের গলায় গলা মিলিয়ে, কালের ধ্বনি দিয়ে, একটু নিজেকে হান্ধা করছিল। আমি কানে আঙ্গুল দিয়েছিলাম।

তবু আমার মনে হয়েছিল, অনেক কলরবের মধ্যে একটি বাঁশীর সুর যেন ধ্বনিত হচ্ছে। রাণীর বাজারের মহৎ প্রাণের শেষ ক্ষুধার কান্না আমি চেয়ে দেখতে পারিনি। তাই চোখ বুজেছিলাম। ভাবছিলাম, আমার বুকের অনুভূতি থেকে শেষ রাগিনীর সুর উঠেছে বেজে।

মনে হয়েছিল, আমি কালের বাঁশী শুনছি। ন্যায়তীর্থের কান্নার সুরে সুর মিলিয়ে, রাণীর বাজারের আকাশে কালের বাঁশীর সুর ধ্বনিত হচ্ছিল।

সম্মিত ফিরে পেয়ে যখন তাকালাম, দেখলাম রাজা কথায় বলে,

শুয়ার বেছা ষাঁড়

তিন নিয়ে রাণীর বাজার।

রাণীর বাজারের লোকেরা বলে রাগে ও দুঃখে। বাইরের লোকেরা বলে রসের র্যালা করে। কিন্তু রাণীর বাজারে যেমন ন্যায়তীর্থ আছেন, ভুলসী আছে, তেমনি অনেকে, অনেকের মত আছে রাজা বাঁশীওয়ালা। রাণীর বাজারের লোকে ওকে চেনে রাজা কেওরা বলে।

রাণীর বাজারে আমি যেমন কাঞ্চনের লালসা দেখছি, দেখছি প্রবৃষ্টির স্রোতের গাঁজলা, তেমনি দেখছি রাজা বাঁশীওয়ালার মত মানুষ, অচ্ছুতের অপমান যার ললাট লিখন, জীবনের কিছুই না পেতে যার জন্ম, সব বাধা ডিঙ্গিয়ে যে বেড়ে উঠেছে কেওরা পাড়ার শুয়ারগুলির সঙ্গে, মনে ও প্রাণে যার মরণের স্পর্শ লাগে না তবু। তাই যাত্রা গানের পালায় যেমন 'বিবেক' বিনে চলে না রাণীর বাজারের কথা বলতে গেলে তেমনি চলে না রাজা কেওয়ার কথা না বললে।

সেই ওকে আমার প্রথম দেখা। দেখেই আমার মনে হল, রাজা এই রাণীর বাজারের কালের রাখাল। ঠাঁই নিয়েছে সদর দেউরির চহরে, ফৈশনের সামনে, সিড়ির নীচে, নর্দমার ধারে। বাঁশী বিকোনের তালে বাজায় কিংবা শুধু বাজাবার তাগিদেই বাজায়, সেটা ওর বাজানো শুনে ধরার উপায় নেই। হয় তো রথ দেখতে গিয়ে যদি কলা বেচা হয়ে যায়, সেই ষোল আনার ওপরে এই বাজিয়ে ফেরার বাঁশীওয়ালা রাজা।

সেটা প্রথমে ভেবেছিলাম, যখন ওকে চিনতে পারিনি। পিঠে খলে ভরতি নানান রংএর বাঁশী, ঠিক ওর নিজের ছেঁড়া জামাটার নানান রংএর তালির মত। বয়সের ছাপটা যেন কালানুচিত হতে পারেনি ওর কাল রং শরীরে। সেই জন্ম বয়সটা বুঝে ওঠাই কঠিন। চোখে মুখে কোথাও তার বর্ণ শ্রেষ্ঠের ছাপ নেই। একেবারে নিখুঁত অষ্টক নরগোষ্ঠীর কোঁচকানো চুল, বোঁচা নাক, ছোট ছোট চোখ কুচকুচে কালো রং। হাসলে পরে চোখ মুখ কিছুই দেখা যায় না। গোটা মুখখানি ভর্তি শুধু একখানি হাসি। দেখলেই চেনা যায় কেওরাপাড়ার পাঁচি কেওরানির ছেলে এটা— রাজা কেওরা।

রাজার সঙ্গে আমি ভাব করতে গেলাম বাঁশী কেনবার ছল করে। রাজা পাশ ফিরে ওর থলিটা দিল এগিয়ে। খুবই নির্বিকার ভঙ্গিতে নিতান্ত অভ্যাসের বশে। সবাই জানে হাতে বাঁশী তুলে দেওয়া সম্ভব নয়। কেননা রাজার চোখে মুখে সেই চিরকালের বিকি রহস্যের কবিতাখানিই লেখা ছিল।

ফুলের মালাগাছি বিকাতে আসিয়াছি।

পরখ করে সবে, করে না স্নেহ।

তবু একখানি আড় বাঁশী নিয়ে ফুঁ দিলাম। সেটা আমার পক্ষে বড় লজ্জা ও সঙ্কোচের কথা। এই চেনা চোঁহদ্রির মাঝখানে ভিড়ের মধ্যে বাঁশী বাজাতে দেখলে আমাকেই লোকে কি বলবে? তা ছাড়া রাজার সামনে দাঁড়িয়ে আনাড়ির মত বাজানই বা যায় কেমন করে? কে না জানে রাণীর বাজারের গানের জলসায়

একবার রাজাকে নিয়ে কী বিশী গণ্ডগোলই না হয়েছিল। কলকাতার রেডিওতে বাজিয়ে নাম করেছে, এমনি এক বাঁশীওয়ালা এসেছিল রাণীর বাজারের এক জলসায়। ‘হাড্ডা ব্যাড্ডা’ বাজিয়ে রাজাকে আগে বাজাতে দেওয়া হয়েছিল বেতার বাঁশী বাজিয়ের অনুমতি নিয়ে। কিন্তু রাজার গুরুগম্ভীর শব্দ নিনাদের মত বাঁশীতে স্পষ্ট সুর তুলতে শুনে বেতারওয়ালার ভ্রূ গেল কঁচকে। রাজার দ্রুত তরঙ্গ যুক্ত বাঁশীর সঙ্গীতে লোকটা একেবারে খেপে বারুদ। রাজার বাঁশী মুগ্ধ জনতার সামনে বেতারওয়ালা বাজাবার মত কোন চেষ্টাই করলে না, পরিত্যক্ত বলেই দিলে তাকে অপদস্থ করার জন্য নাকি রাজাকে আগে বাজাতে দেওয়া হয়েছে।

বেতারওয়ালা শুধু রাজাকেই জিজ্ঞেস করেছিল, ‘তোমার গুরু কে?’  
‘রাণীর বাজারের নন্দ হাড়ী।’

‘হাড়ী?’

‘আজ্ঞে।’

‘করে কি?’

‘ঝুড়ি বোনে। খেয়া ঘাটে মাঝে মাঝে বদলি মাঝির কাজ করে।’

‘অ। বয়স?’

‘বুড়ো হয়েছে?’

‘হুঁ।’

বেতারওয়ালা চলে গিয়েছিল তারপর। জলসার উছোক্তারা ভাবলে যত গণ্ডগোলের আপদ এই রাজা কেওরাটা। ব্যাটাকে বাজাতে দেওয়াই ঠিক হয়নি।

সুতরাং এই রাজার সামনে বাঁশীতে সুর তুলব তেমন সাধি আমার নেই। বাঁশীটা ফিরিয়ে দিয়ে জিজ্ঞেস করলাম, ‘তুমি তো—’

‘কেওরা পাড়ায় থাকি।’

‘ও।’

‘আজ্ঞে, বাপের নাম ছেল আকু কেওরা মার নাম পাঁচি কেওরানি।’

কথায় মধ্যে বাঁজ আছে বলে ভুল হতে পারে। আসলে কথা না বলবারই ইচ্ছে।

বললাম, ‘যে সুরটা বাজাচ্ছিলে, সেটা একটু অসময়ে হয়ে গেল।’

রাজা ওর ছোট ছোট চোখে একবার আমার দিকে তাকিয়ে বললে, ‘আজ্ঞে মনের কোন সময় নেইকো। তার দিনকে রাত মনে হয়, রাতকে দিন। সাঁঝ বেলার সুর বাজাতে ইচ্ছে হল, তাই বাজিয়ে দিলুম।’

বললাম, ‘সেটা তোমার ইচ্ছেয় বোধহয় হয়নি রাজা দ্বিজ-পাড়ার গ্যায়তীর্থ মশাই বন্ধ ঘরে বসে কাঁদছিলেন, তখন তোমার বাঁশীতে ওই সুরটা বাজছিল। আমার মনে হল, তুমি যেন কালের রাখাল।’

রাজার মুখে নাক-চোখ-মুখ হীন হাসিটা দেখা গেল। বলল, ‘আজ্ঞে, কালের রাখাল বলে ফেলে দিলেন? তা’ হ’লে যে আর নিজের জন্মে বাজান যায় না বাবু।’

বললাম, ‘তোমার নিজেরটাই এখন সকলের হয়ে গেছে রাজা।’

দেখলাম, রাজার মুখের কোঁচকানো চামড়া টান টান হ’য়ে উঠল। রাণীর বাজারের পশ্চিম দিকে তাকিয়ে খালি বলল, ‘সকলের?’

রাজার এই মুখ দেখলে, সবাই রাণীর বাজারের ছাপ খুঁজে পাবে। ‘রাজা রাণীর বাজারের এক অলিখিত ঋণপত্রে টিপ সেই দেওয়া খাতক। বাজিয়ে ওকে সেই ঋণ শোধ করতে হচ্ছে।

কেওরাপাড়ার জমি আর যুবতী মেয়ে, রাণীর বাজারের চিরদিনের উত্থানপতনের খেলোয়াড়দের খেলার জিনিষ ছিল। সেই খেলার ঋণেই আফেপৃষ্ঠে বাঁধা আছে রাজা।

যেদিন রাজার বাবা আকু কেওরা মারা গেল, কালো রায় সদলবলে এল সেইদিনই। তখনো আকুর শব শ্মশানযাত্রা করেনি। ঘরের বাইরে, পাঁচি কেওরানি আকুর স্পন্দনহীন মরা বৃকে পড়ে কাঁদছিল কপাল কুটে কুটে।

কালো রায় এসে বললে পাঁচি কেওরানিকে, ‘ঘরের জিনিষ পণ্ডর বার করে নাও, ওতে আর হাত দেব না। কিন্তু ঘরটা দখল করব।’



কড়া হুকুম হল কেওরা পাড়ার জমিদার কালো রায়ের। রায় পদবী নয়, কোন এক কালের পাওয়া খেতাবটাই কালো বাঁড়ুজ্জেরা চালিয়ে আসছে। রাঢ়ীয় শ্রেণীর নৈক্য কুলীন ব্রাহ্মণ।

রাণীর বাজারের গঙ্গার নীচু পাড় জুড়েই যত অস্ত্রাজদের বাস। কেওরাপাড়ার জমিদার একজন, হাড়িপাড়ার আর একজন। মুচিপাড়ার জমিদার একজন, ডোমপাড়ার আর একজন। দেখে আর শুনে মনে হয়, রাণীর বাজার জমিদারের দেশ। মাঝে মাঝে এই সব পাড়ার রাজাদের লড়াই হয়, উলুখাগড়াদের প্রাণ যায়।

হঠাৎ হঠাৎ রব ওঠে, পাত্তাড়ি গুটোও, পাত্তাড়ি গুটোও।

ব্যাপার কি? না, রাজা বদল হয়েছে।

কোথায় যেতে হবে?

এমন কিছু দূরে নয়। এক ঘর হাড়ি যায় ডোমপাড়ায়, দু'ঘর কেওরা যায় মুচিপাড়ায়।

এখন অবশ্য সেকথাটি আর চলে না। রাণীর বাজারে জমির বড় টানাটানি। দেশ ভাগাভাগি হ'য়ে, বাড়ির অকুলান। লোকে জমি কিনতে চায়। পঁচিশ টাকা কাঠার জমি হাজার টাকায় সাধ্য সাধনা করে লোকে। স্ত্রতরাং একবার উচ্ছেদ করতে পারলে আর, কেউ পুরনো লোককে বসতে দিতে চায় না। একেবারে নতুন মানুষকে বিজী ক'রে দেয়।

সেই জন্তে, হালের রাণীর বাজারের অস্ত্রাজপাড়ায়ও দেখা যাবে, নতুন বাড়ি উঠেছে। হাল ফ্যাসানের নতুন বাড়ি, দেয়ালের চেয়ে জানালা বেশী, কাঠের চেয়ে কাঁচ বেশী। ঘরে ঘরে জ্বলে বিজলী বাতি। অষ্টপ্রহর গান আর বক্তৃতা শোনা যায় রেডিওতে।

কিন্তু কেওরাপাড়া, এখনো কেওরাপাড়াই। হাড়িপাড়া হাড়িপাড়াই। পৌরসভার নিষেধাজ্ঞা অমান্য ক'রে, এখনো মরা গরু ভেড়া ছাগল কুকুর এখানেই এনে ফেলা হয়। সেই একই শকুনেরা তাদের বংশপরম্পরা 'মোচ্ছব' ক্ষেত্র ছেড়ে পৌরসভার নির্দিষ্ট ভাগাড়ে যায় না। হেঁদো ডোম এসে এখনো ছুরি দিয়ে ছাল ছাড়াতে বসে যায় গঙ্গার ধারে। গুরোরেরা তাদের জন্ম-মৃত্যুর খেলা খেলে চলেছে ঠিকই।

আর, যদিও পৌরসভার বার্গিং ঘাট নির্দিষ্ট আছে বৈদিকপাড়ার সীমানায় হীরাপুরের খালের ধারে, তবু রাণীর বাজারে সব ঘাটই শ্মশান, কেবল, লোহার রেলিং দিয়ে ঘিরে রাখা খেয়া ঘাটের সীমানাটুকু ছাড়া। তাই রাণীর বাজারের মৃত্যুর সঠিক হিসেব যদি কারুর কাছে পেতে হয়, তবে তা এই কেওরা হাড়িডোম পাড়ারই বুড়োবুড়িদের কাছে পাওয়া যাবে।

কালো রায়ের দখল নিতে আসার মত ঘটনা নতুন নয়। আকু কেওরার গতি হয়নি? না হয়েছে তো না হয়েছে। আইন তো আইন। আকু কেওরার জীবন সহ ঠিকে, যে মুহূর্তে আকু মরেছে, সেই মুহূর্তেই তার দাবী শোধ হয়েছে। স্মৃতরাং এই মুহূর্তে ঘর খালাস করে দিতে হবে। অবশ্য ঘরটাও খুলে নিয়ে যেতে পারে পাঁচি। রাজা তখন ছোট। যদিও নন্দ হাড়ীর সাকরেদি শুরু হ'য়ে গিয়েছে তার অনেক দিন আগেই। সোজা বাঁশী নয়, প্রথম হাতেই আড় বাঁশী। যদিও বাঁশী তখনো রা কাড়েনি। শুধু ফুঁ দেবার পালা চলছিল। কখনো কখনো হঠাৎ আত'নাদের মত দো-আসলা স্বর ফুটছিল কেবল। বাপের সঙ্গে ও তখন রাজাপুরের গাঁয়ে যায় বাঁশ আনতে। বাপ আর মা বোনে চ্যাঙারি, ঝুড়ি, চুবড়ি। রাজা তলুতা বাঁশে ফুটো করে লোহার শিক গরম করে।

কিন্তু জীবন রহস্যের ভয়ংকরতা বাঁশীর কথাও ভুলিয়ে দিল যেন। হাতে বাঁশী, চোখে জল, রাজা হাঁ করে তাকিয়ে রইল কালো রায়ের দিকে।

গরু মরলে নাকি মাছি খবর দিয়ে আসে আকাশে শকুনের কাছে। একলা কালো রায় নয়, অস্ত্রাজপাড়ার জমিদারেরা সবাই এসেছে খবর নিতে। কোন সীমানায়, কার জমিতে মরল, দেখতে এসেছে সবাই। নইলে ফাঁকি প'ড়ে যাবার সম্ভাবনা। কে কোন্‌খান দিয়ে এসে কাগজ পত্রে কি লিখিয়ে, কার টিপসই নিয়ে ব'সে থাকবে, নিশ্চয়তা কি?

এই গোটা পাড়াগুলি যেন কোটকাছারির হিসেব নিকেশ মানে না। যেন যার যে-দিক দিয়ে রাজা বোরে চ'লে গেলেই হল, কিস্তীমাং?

আকু কেওরার বৃকের ওপর থেকে উঠল পাঁচি। অধ' দিগন্তরী, পাঁচির সে-মুতি ভয়ংকরী। বয়স তখন অল্পই তার। আয়েস জীবনের

লাবণ্য না থাক, রুক্ষ যৌবনের বহুতা তখনো পাঁচির সারা অঙ্গের  
ওঠানামায়। এক পিঠ সাপ কিলবিলে রুক্ষ চুল। ভর দুপুরে, খজ্ঞার  
সেই উঁচু পাড়ে, মনে হল পাঁচির ছায়া পড়ে নি মাটিতে। ভাগাড়ে  
বোধ হয় মরা ছিল, আকাশে তখন শংকুন উড়ছে। আকুর গর্ভবতী ধারী  
শুয়োরটাও সেই মূর্তি দেখে ঘোঁৎ ঘোঁৎ করে উঠল। যেন বলতে  
চাইল, আমাকে মেরোনা, আমি কোন ক্ষতি করি নি।

পাঁচি বুক চাপড়ে, চুল ছিঁড়ে কালো রায়কে গাল দিল, অভিশাপ দিল।  
কালো রায়ের লোকেরা হুকুম পেয়ে, ঘরের বেড়া দিল ভেঙ্গে।  
হয় তো কালো রায় কিছু ক্ষমা ঘেন্না করতে পারত। রাণীর  
বাজারের আদি লোক হ'লে হয়তো আজকের মত নিষ্কৃতি দিত।  
মোরসী পাট্টা গাড়বার আগে, জীবনসত্ত্ব বাতিল ক'রে নতুন করে ঠিকে  
দিতে পারত পাঁচি কেওরানির নামে। কেন না, এসব দেশবিভাগের  
আগের কথা। জমি তখন অকুলান নয়।

কিন্তু কালো রায়েরা এখানকার লোক নয়। রাণীর বাজারে সে  
দৌহিত্রের সম্পত্তি পাওয়ার সূত্র ধরে এসেছে।

রাণার বাজার তার কাছে আজও বিদেশ। যদিও স্থায়ী হ'য়ে  
বসেছে সে এখানে।

কালো রায়ের রাণীর বাজারে আসা, সে আর এক কাহিনী।  
সে কথা পরে আসবে।

মায়ের দিকে তাকিয়ে রাজার ভয় করছিল বটে। কিন্তু কালো  
রায় ভয় হচ্ছিল না, সেই ক্ষোভে সে বাঁচেনি।

পাড়ার লোকজনেরা সবাই হাতাহাতি ক'রে ঘরের জিনিষ বার  
করলে। কিছু কাঁথা, মাদুর, তেলচিটে বালিশ। গোটাকয়েক কলাই  
এলুমিনিয়মের থালা, গেলাস, আকুর সারা জীবনের সম্পত্তি।

কিন্তু ব্যাপার ঘটল অল্পরকম। কালো রায়ের ভাইপো শম্ভু।  
শম্ভু দাঁড়িয়েছিল কাছেই। খুড়ো ভাইপো চিরদিনের সাপে নেউলে  
সম্পর্ক। যে ভাইপোকে কালো বলে বেজন্মা, রাণীর বাজারে সেই তার  
প্রধান শত্রু। শুধু রাণীর বাজারে নয়। তার জীবনেই সবচেয়ে

বড় শত্রু। সেই শত্রুর জন্মেরও আগে রাণীর বাজারের নবকিশোর চাটুয্যের বিধবা মহামায়ার শেষ অবস্থার সংবাদ পেয়ে যেদিন প্রথম এল কালো, আর কালোরই পিছনে পিছনে নবীনের স্ত্রী কিরণও এল মুম্বু নবীনকে একলা ফেলে, সেইদিন থেকেই—

সে কথা পরে।

শম্ভু এল, এসে দাঁড়াল একেবারে আকুর শবের কাছাকাছি। শম্ভু বলল, 'জায়গার অভাব কি? পিটুলীতলায় ভোলা কেওয়ার জায়গাটা তো ফাঁকাই আছে। ওটা আমার সীমানার মধ্যে। ঠিকে বন্দোবস্ত লেখাপড়া ক'রে নিও, আকুর বউকে এখন ওখানেই উঠতে বল।'।

সকলের যেন সংবিত ফিরল। সবাই ফিরে তাকাল শম্ভুর দিকে। খুড়োর সঙ্গে ভাইপোর চেহারার কোন মিল নেই। কালো রায় ফর্সা মোটা বেঁটে। শম্ভু শ্যামবর্ণ, দীর্ঘ দেহ, প্রত্যাহের দেহচর্চায় কেমন একটু লুষ্ঠাম বলিষ্ঠতা কিন্তু স্নিগ্ধতা তার সঙ্গে সঙ্গে। কালো রায় যখন হিংস্র হয়ে বলে, 'রায় বংশের রক্ত মাংস কিছু নেই ওই অ-জাতের গায়ে,' শম্ভুর দিকে তাকিয়ে বংশগত চেহারা য় বিশ্বাসী মন টলে উঠতে চায়। কালো রায়ের দাদা, শম্ভুর বাবা মুম্বু নবীনকেও যারা দেখেছে রাণীর বাজারে, তারাও জানে, শম্ভুর সঙ্গে নবীনের সত্যি কোন মিল নেই। মায়ের সঙ্গেও মিল নেই শম্ভুর। শুধু কিরণের চোখ দুটি ছাড়া। সম্পূর্ণ প্রস্ফুটিত শ্বেত অপরাঞ্জিতার রেণু জুড়ে বসে থাকা ভ্রমরের মত সেই চোখ। আর আজানুলম্বিত বলিষ্ঠ দুটি হাত। অত বড় হাতও নেই রায় বংশে। যে-হাত একবার মাত্র কালো রায়কে নিষ্ঠুরভাবে আঘাত করেছিল। কালো রায়কে অনেকদিন শয্যাশায়ী থাকতে হয়েছিল। সে শম্ভুর সামনে দাঁড়িয়ে ওকে গালাগাল দিয়েছিল। সেই শেষ, আর কোনদিন কালো রায় শম্ভুর সামনে দাঁড়িয়ে গাল দেয়নি।

শম্ভুর আশ্বাসবাণীতে আড়ষ্ট মানুষগুলি সব যেন দিশা ফিরে পেল। শম্ভু রায়ের সঙ্গে তাদের কিছু যেন জানাজানি আছে।

কিন্তু তখনো পাঁচি চুপ করল না। সে গঙ্গার দিকে মুখ করে, ঢিল-গলায় যে-সমস্ত কাহিনী বিবৃত করে গেল, তার মমার্থ হল এই

যে ঘাটের মরা মিনসে (কালো) আজ তাকে আইন দেখিয়ে, মরা স্বামীসহ ঘরের বার করলে, পাঁচির কাছে তার অভিসারের কথা পাঁচি কেওরানি ভুলে যায়নি। এও ভুলবে না, রসের নাগরের সঙ্গে সে যদি ভাগাড়ের অন্ধকারে গিয়ে পীরিত করত, তবে আজ তাকে উচ্ছেদ হতে হ'ত না। যে-মেয়েমানুষদের ছায়া দেখলে কালো রায়দের স্নান করতে হয়, তাদের পা চাটতে আসতে ঘেন্না করে না। পাঁচি তাদের মুখে থু থু দেয়, তাদের গোষ্ঠির মুখে ইত্যাতি। মরা আকুকে সাক্ষী ক'রে এসব কথা সাড়ম্বরে বলল পাঁচি।

মেয়েরা এসে ধ'রে ক'রে শাস্ত করল তাকে।

আর এ ধর্মের পৃথিবীতে যদি ব্রহ্মভেজ ব'লে কোন বস্তু থাকত, কবে কালো রায়ের চোখের আগুনে তার ভাইপো শস্ত্র পুড়ে মরত।

কিন্তু শস্ত্র অগ্নান।

রাজা বুঝল, মায়ের সঙ্গে, থাকবার জন্য একটি বাসস্থান তাদের হল, তবু কালো রায়ের প্রতি ঘৃণা তার গেল না। মানুষকে ঘৃণা এবং রাগ ক'রে মেরে ফেলার মত রাগটা তার গেল না কিছুতেই। কেওরাপাড়ার কেওরা ছেলেদের মত জীবন মরণের এ খেলাকে সে আবহমান বলে স্বীকার করল না। রাজা ঘৃণা করতে শিখল।

কোথা থেকে কি হ'য়ে গেল। আকুর মরা নামিয়ে নিয়ে গেল কয়েকজন গজার ধারে। কয়েকজন মিলে, আকুর পুরনো বেড়া আর চাল দিয়েই ঘর খাড়া ক'রে ফেলল, ভোলা কেওরার পতিত ভিটেতে।

কেবল, ঘরে গেল না পাঁচি। কেওরাপাড়ার বটের তলে, মনসাতলায় প'ড়ে রইল উপুড় হ'য়ে। নন্দ হাড়ীর কাছে রইল রাজা। বাপ মরেছে, কালো রায় ঘর ভেঙে দিয়েছে, নতুন ঘর হয়েছে, মা প'ড়ে আছে গাছতলায়, তবু রাজার বাঁশীতে ফুঁ দেবার সাধ ঠোঁটের কূলে এসে কাঁপতে লাগল। নন্দ হাড়ীর কোন ঘর নেই। বচন সাধুখাঁর জমিতে তার বাস ছিল হাড়ীপাড়ায়। তার নয়, তার বিধবা মায়ের বাস ছিল। বচনের সঙ্গে তার মা নষ্ট হয়েছিল। নন্দ তখন ধরা-সরা ঘোয়ান তাই শুধু মাকে নয়, বচনকে নাকি মেরে

আধমরা ক'রে সে রেখে এসেছিল বচনের বারবাড়ির বারান্দায় ।  
ভিন রহর জেল খেটেছিল নন্দ ।

ফিরে এসে শুনেছিল, শুধু তার শোকেই মা মারা গিয়েছে ।  
নন্দ আর কোনকালে ঘর বাঁধেনি ।' দুর্ভাগ্য বলেই কুখ্যাত হয়েছিল  
সে । কিন্তু দুর্ভাগ্যের হাতের বাঁশীটা কেমন ক'রে মায়া ছড়ায়,  
সেটাই বিস্ময় । তখনকার রাণীর বাজারের খেয়াঘাটের বিরিকিলাল  
ঘাটদার সেই বাঁশী শুনেই মাঝির কাজ দিয়েছিল তাকে ।

কিন্তু কোনকালেই নন্দ একঠাই থাকবার মানুষ নয় । খুটনী  
নৌকোয় ক'রে বিদেশী মালামাদের সঙ্গে কলকাতার বন্দর আর পশ্চিম  
দেশের ঘাটে ঘাটে ঘুরেছে । এই চল্লিশ বছর বয়সে, রাণীর বাজারের  
ঘাট ছেড়ে আর কোথাও এখন যেতে ইচ্ছে করে না নন্দ হাড়ীর ।

রাত হয়েছে বুঝি অনেক ।

গঙ্গার ভাটা নামা নরম পলিমাটি কাদায় কেওরাপাড়ার শুয়োরেরা  
ফিরে এসেছে শহর পরিভ্রমণ সেরে । শকুনের মত পুরীষ-আলয়ের  
নীচুতলা, নদ'মা আর আস্তাঁকুড় ঘেঁটে বেরায় কেওরাপাড়ার  
জানোয়ারেরা । রাত্রে এসে আশ্রয় নেয় গঙ্গার ঘাটের পাঁকে ।

গায়ে গায়ে মুখে মুখ দিয়ে প'ড়ে আছে শুয়োরগুলি । শকুনেরা  
গাছে না উঠেও রাণীর বাজারের অন্ত্যজঘাটে নিরাপদে থাকে  
পালকে মুখ গুঁজে । বাতাসে দুর্গন্ধ দক্ষিণের ঝাপটায় চলেছে উত্তরে ।

গঙ্গার জলে সমুদ্রসঙ্গমের গান । তার কালো বুকে নক্ষত্রেরা  
স্রোতের দীর্ঘ ঝলক-রেখায় যাচ্ছে হারিয়ে ।

আকুর মৃত্যুতে কোন শোকের ছায়া পড়েনি কেওরাপাড়ার  
ঘাটে । সে হিসেবে, কেওরাপাড়ার ঘাট চিরশোকের তীর্থ । অবসানেরই  
ইতিবৃত্ত তার পাষাণহীন ঘাটের প্রতি স্তরে স্তরে ।

শোক শুধু মনসাতলায়, সেখানে পাড়ার বুড়িরা এখনো ভিড়  
করে আছে পাঁচিকে ঘিরে । কারণ তাদের জানা আছে, পাঁচি  
এখন আর তাদের মত এই পাপলোকে নেই । জীবিত অবস্থায়ও

পাঁচি এখন অণু সংসারের জীব। কেমন ক'রে এমন হয়, তারা জানে না, কিন্তু হয়। তাই তারা করজোড়ে ঘিরে বসে থাকবে পাঁচির কাছে, কারণ পাঁচির মধ্যেই এখন তাদের অপরিচিত বিশ্ব রহস্য এসে ঠাঁই নিয়েছে। বিশ্বরহস্যকে তারা প্রত্যক্ষ করতে চায়।

রাজা তাই নন্দহাড়ীর কাছেই এসেছে। নন্দ একটি কথাও বলে নি। গঙ্গার ধারে, আশসেওড়ার জঙ্গলের উঁচু ঢিবিতে তাড়ির ভাঁড় নিয়ে সে বসেছে, ঢোঁকে ঢোঁকে খেয়েছে।

তারপর রাজাকে বলেছে, 'হা কর, খাইয়ে দিই, নইলে বাপের জ্ঞান মন কেমন করবে খালি।'

গুরুর আদেশ। রাজা কয়েক ঢোক খেয়েছে।

নন্দ রাজার ছোট বাঁশীটি তুলে নিয়েছে। ফুঁ দিয়ে বলেছে, 'ইস্! অঁতুড় ঘরের ছেলের গলা যে রে।'

তা' হোক, তবু নন্দ বাজিয়েছে।

প্রথমে আত'কান্নার মত। তারপর কখন কান্নার আত'ধ্বনি শেষ হ'য়ে, মিষ্টি সুর বাতাস, গঙ্গা ও আকাশটাকে মাতাল ক'রে দিয়েছে টের পাওয়া যায়নি।

রাজার মনে হল, সুরটা একটি জীবন্ত প্রাণীর মত। তার মধ্যে তার বাবা আছে, মা আছে, এই সংসারের সব কিছুই যেন ওই সুরের মধ্যে ভেসে বেড়াচ্ছে। শম্ভু রায় আছে, কালো রায়ও আছে। পৃথিবীর একটি বিচিত্র রহস্য যেন সেই সুরের মধ্যে ঢুলে ঢুলে উঠছে।

তারপর বাঁশীটা নন্দ তুলে দিল রাজার হাতে। বলল, 'বাজা।'

বাজাবে? ভাল করে স্বর ফোটাতে পারে না বাঁশীর, বাজাবে কেমন করে রাজা?

নন্দ বলল, 'ফুঁ দে। ফুঁয়ের মধ্যে গান কর, গানের সঙ্গে সঙ্গে আপনি আঙ্গুলগুলো ওঠা পড়া করবে, দেখিস্। বাজা।'

য় করতে লাগল রাজার। তবু, বাজারের কাছে বসা সেই অন্ধ ছেলেটার গান তার মনে পড়ল। সেই চীৎকার ক'রে, সুর ক'রে ক'রে বলা :

আমার এই জগতে কেউ নাই গো।

রাজা ফুঁ দিল বাঁশীতে। স্বর ফুটল। তারপর যেন কোন  
যাদুস্পর্শে, তার কানে গিয়ে ঢুকল।

আমার এই জগতে কেউ নাই গো।

শুধু একটাই লাইন, একটাই 'স্বর', রাজা তার ব্যথা ধরে যাওয়া  
ঠোঁটে বাজাতে লাগল। নন্দ বলতে লাগল, 'বেশ! আচ্ছা? হুঁ।  
পেখম থেকে কান্না ধরলে বাবা? বেশ। বাঃ বাঃ, আরে বাবা। বুকে  
বেঁধে যে? বাহ্ বা বাহ্ বা। বাজা বাজা, ওই একটাই বাজা।'

সাতদিন সাত রাত্রি ধরে পড়ে রইল পাঁচি মনসাতলায়।

সবাই সংগ্রহ করে দুধ এনে খাইয়েছে পাঁচিকে। সেটা আসলে  
পুণ্য করার জায়গাই। কারণ দুধ পাঁচি খায়নি, পাঁচির অধৈতন্য  
মুখ দিয়ে আর কেউ খেয়ে বিশ্বরহস্যের এক বিচিত্রকে প্রমাণ  
করেছে। সেই রহস্যেরই এক অতল অন্ধকারের শব্দ তীক্ষ্ণ লুলু  
করে বেজে উঠেছে মেয়েদের উলুর মধ্য দিয়ে।

সাতদিন নন্দর কাছেই রাজা খেয়েছে থেকেছে। একটা ছেড়ে  
ছুটি, তিনটি চারটি লাইন বাজিয়েছে। পাঁচি খোঁজও নেয়নি।

সাতদিনের অসুস্থীন শোকের পালা শেষ করে এল পাঁচি। প্রথমে  
বলল, 'আমার ছেলে?'

ছেলে এল। রাজাকে বুকে নিয়ে স্নান করে এল পাঁচি।  
কেওড়াপাড়ার বিধবাদের থানের ঠাট্ নেই। পুরনো কাচা শাড়ি পরল  
পাঁচি। চার ইঞ্চি আয়নায় মুখ দেখে কাঠের চিরুনি দিয়ে মাথা  
আচড়াল। শব্দ রায়ের ঠিকে ঘরে বসে আকুর অসমাপ্ত বাঁশের কণ্ঠ  
আর কাটারি নিয়ে বসল। গাভীন শুয়োরীটাকে ডেকে কাছে শোয়াল।

এতদিনে শোক প্রকাশ করল শুয়োরীটা। যেন কেঁদে কেঁদে  
বললে, বাবুদের বাড়ির ফ্যান পচা পাত্কে এনে কতদিন খেতে দাওনি  
আমাকে। পেটে আমার ছা', শহরে গিয়ে, ঘুরে ফিরে আর খেয়ে  
আসতে পারিনে আমি।

পাঁচি কেওরানী আংটা লাগান টিন নিয়ে ঘুরে এল বাড়ি বাড়ি।



খাওয়াল গাভীন জানোয়ারটাকে ।

কিন্তু পাঁচির মুখে কথা নেই ।

কেন ?

মাস পেরিয়ে গেল । শুয়োর বিয়োলো । পাঁচি ঝুড়ি চুপড়ি বিকিয়ে রোজকার রোজ ছেলে নিয়ে খেল । গালে হাত দিয়ে শুনল ছেলের বাঁশী । কিন্তু রাতে ঘুমোল না, কথা বলল না কারুর সঙ্গে ।

কেন ?

শোকের ছায়া গেল, মাথার জটা তৈলাক্ত হল । সিঁদূরবিহীন সাদা সিঁথিতে, কাঁচের চুড়ি ভেঙে ফেলা খালি হাতে, শত লাজ্জনাতেও উদ্ধত নিটুট শরীরের নতুন লাভণ্যে, ত্রিশ পেরিয়ে যাওয়া পাঁচিকে মনে হয় কেওরাপাড়ার আইবুড়ো মেয়েটি কি এক ভাবে মগ্ন হয়ে রয়েছে ।

কেন ? শোক কি কাটেনি পাঁচির ?

যেন গাছপালা স্থির, কীট পতঙ্গ স্তব্ধ, সারা আকাশটা আড়ষ্ট, ধরিত্রী সহসা কঠিন নির্বাক বিমূঢ় অচেতন ।

কেন ?

তারপর একদিন আচমকা তার পায়ের শব্দ শোনা গেল । গঙ্গার ধার থেকে সেই খাবড়া খাবড়া পা দুটি, গভীর রাত্রির অন্ধকারে জঙ্গল মাড়িয়ে মাড়িয়ে গঙ্গার উঁচু পাড়ে এল উঠে । যে পায়ে, বহু দেশের ধূলি আর বিশ্ব রহস্যের ছাপ তার ফাটা ফাটা এবড়ো খেবড়ো দাগে । সেই পায়ের নিশ্চিত পদক্ষেপে ধরিত্রীর নির্বাক বিমূঢ়তা যেন শিউরে উঠল । এসে দাঁড়াল পাঁচি কেওরানির বন্ধ ঘরের দরজায় । দরজা খুলে সামনে দাঁড়াল পাঁচি । প্রত্যাশা ব্যাকুল বিস্রস্ত বেশিনী লুপ্তিত কেশিনী, বিশ্ব রহস্যের আদিম রশ্মিচ্ছটা কেওরানির জলে ভেসে যাওয়া চোখে ।

শোক গিয়েছে নতুন সাজ হয়েছে নবজন্ম হয়েছে কিন্তু বিশ্বরহস্যের প্রাণ সংলগ্নের সহজ মানবী পাঁচি রূপান্তরের কান্নাটা কাঁদতে পারেনি । পৃথিবীর মত বিশ্বরহস্যের অঙ্গ চির সত্যী পাঁচি নির্বাক বিমূঢ় হয়েছিল ।

অস্ত্রাজপাড়ার হৃদয় ও রক্তলীলা প্রকৃতির মতই চিরযৌবনের লীলায়  
অমোঘ রূপান্তরের জগৎ-সুন্দরী। পাঁচির অকূল সাগরে, সাগরের ঝড়  
বিক্ষুব্ধ তরঙ্গে নির্ভীক শক্তপ্রাণ মাঝি এসেছে পাড়ি দিতে।

আকু গেছে নন্দ হাড়ী এসেছে। এই যাওয়া আসার মাঝে স্বভাব  
লয়ে চিরবিশ্বাসী পাঁচি তাই নন্দর বুক পড়ে কাঁদছে অঝোরে। বহু,  
বহুদিন পরে নন্দর কঠিন পাষণ শিলা স্থলিত প্রস্রবনে, পাঁচি আবার  
মানবী জন্ম পেল। কাম্মার পরে পাঁচির চির রহস্যের হাসির কিঙ্কিনী  
শুনে, রূপান্তর বিলাসিনী শাস্ত্রমুর গঙ্গা ভাটার জলে ছুটে গেল  
মহাপ্রলংকর অশেষ অরূপে।

দীর্ঘশ্বাস ফেলে, নন্দর বুকোঁমুখ চেপে বলল পাঁচি, 'লোকে বোঝে না।'

নন্দ বলল, 'কোনদিন বোঝে না।'

পাঁচি বলল, 'কি যে হয়। ছাই মরণ।'

কঠিন ও বিহ্বল সোহাগে নন্দ বলল, 'সেটা কেউ জানে না।'

রাণীর বাজার দিনে জাগে, রাত্রে জাগে।

রাণীর বাজারের রাত্রি সেদিন পাঁচি কেওরানির জন্য জেগেছিল।

শুধু বিশ্বরহস্যের এই বিচিত্র লীলা দেখে রাজা প্রথমে ভয়  
পেয়েছিল। তারপর নন্দ হাড়ীর মৃত মানুষকে বাবা পেয়ে, পিতৃশোক  
ভুলে সেও পৃথিবীর চির-শিশু-সন্তানের দলে ভিড়ে গেল।

নন্দ পাঁচির ঘরে থাকে না। তবু বাকি থাকে না জানাজানি হতে।  
স্বাপদ-সমাজের মতই, বিনা ঘন্থে কেউ কারুর অধিকার কায়ম করতে  
পারে না এখানে।

কেওরাপাড়ার বুড়ি ছুঁড়িরা ধিক্কার দিতে লাগল পাঁচিকে। ঘটনা  
নতুন নয়, পুরণো। সমাজের ওপরের পাটে পাটে অনেক নতুন ভাজ  
পড়েছে, সেলাই সংস্কার হয়েছে। নীচেটা রয়ে গিয়েছে যে-কে সেই।  
পাঁচির পূর্বসূরী নায়িকার অভাব নেই পাড়ায় কিন্তু তা' বলে, মনসাতলায়  
দাঁড়িয়ে ধিক্ত কেন করবে না। নইলে পাঁচি কেওরানি নায়িকা চিহ্নিত  
হয় কেমন করে।

কেওরাপাড়ার পুরুষেরা নন্দর শাস্তি দাবী না করলে নায়ক বলে  
চেনা যায় কেমন ক'রে তাকে ?

দ্বন্দ্ব এখানে পঞ্চায়েতের লড়াই, শাস্তি জরিমানা ।

কিন্তু নন্দ জন্মক্ষণ থেকেই বোধহয়, সোজা পথ পায়নি । প্রারম্ভেই  
বঁেকে থাকার দরুন, এখানেও সে বাঁকা । জরিমানা অর্থাৎ গোটা  
পাড়াকে ভাত আর শুয়োর ভোজ দেওয়া । সে ক্ষমতা তার নেই ।  
আর পাড়ার মাঝখানে দাঁড়িয়ে সে চীৎকার করেই সব পুরুষ কেওরাদের  
আহ্বান করলে, 'কে কি বলতে চাও, বল । টাকের যুত নেই, জরিমানা  
দিতে পারব না । আর পারলেও, দেব কেন, সেটা বুঝিয়ে দাও ।'

বোঝাবার মত ইচ্ছে কারুর ছিল না । আর যে এভাবে বলতে পারে,  
তার জয় ঠেকান যায় না ।

জীবন রহস্যের আধার । নন্দ হাড়ীর সেই দুর্বিনীত মূর্তি দেখে রাজা  
খুশি হল মনে মনে, কিন্তু অপমানিত মনে হল তার নিজেকে । এ অপমান  
বোধটাও বোধ হয় বিশ্বরহস্যের মধ্যেই পড়ে । নন্দ হাড়ীকে ভালবেসেও  
রাজার ইজ্ঞতে যেন দাগ লেগে রইল ।

নন্দ নয়, জরিমানা দেবার আনন্দ থেকে নিজেকে বঞ্চিত করলে না পাঁচি  
শুয়োর ছানা বেচে, চাল ভাজা আর তাড়ি খাওয়ালে সবাইকে । শাস্ত  
হল কেওরাপাড়ার আত্মা । হয় তো আকুর আত্মাও । কারণ, সকলের  
চোখের আড়ালে এই জরিমানার চাল ভাজা আর তাড়ি পাঁচি আকুর  
উদ্দেশ্যে রেখে এসেছিল গঙ্গার নির্জন পাড়ে । স্বচক্ষে দেখে এসেছে  
একটা কাককে সেই চাল ভাজা ঠুকরে ঠুকরে খেতে । সেই কাককে জোড়  
হাতে বলে এসেছে পাঁচি, 'শাপ দিও নাকো ।'

নতুন স্তরের মাতামাতিতে রাজাকে রেখে দিল পাঁচি শুয়োর ছানা-  
গুলির সঙ্গেই ।

সংসার এমনি নির্ভুর মনে করে রাজা অসহায় অবাঁক চোখে চেয়ে  
থাকেনি । বাঁশি নিয়ে মেতে রইল সে । নন্দ মাঝিগিরি করে  
ইচ্ছামত । পাঁচিরটা বসে খেতেই সে অভ্যস্ত হল । আর তালিম দিয়ে  
চলল রাজাকে । রাজা তাকে মাৎ করে দিয়েছে এর মধ্যেই । অনেক

গুলি সুর বাজাতে শিখেছে সে।

‘তারপরে রহস্য দেখল রাজা, তার আবার ভাই হয়েছে।

বিশ্বরহস্যের আরো চাভুরি দেখল রাজা। দেখল, তার মার সঙ্গে নন্দর ঝগড়া। দেখল, নন্দ হাড়ী মারছে তার মাকে ধরে। দেখল, শ্যুরের ছানা সব বিকিয়ে গিয়েছে। বেড়ার গোঁজা ভাঙা, চাল ফুটো, মেখে কাদা কাদা, হাড়িতে ভাত নেই।

সে দেখল, মা তাকে মারছে, ভিক্ষে করতে পাঠাচ্ছে রাস্তায় স্টেশনে।

কিন্তু রহস্যেরই জটাজালের আড়ালে, নন্দ হাড়ীর জন্ত প্রাণটা টন টন করতে লাগল রাজার। ছোট ভাইটার জন্ত কান্না পেল। মায়ের কাছে যেসতে না পেয়ে বুকটা ফাটেতে লাগল তার।

রাজা ওর প্রথম শেখা সুরটা বাজাতে লাগল, আমার এ জগতে কেউ নাই গো।

রাজা দেখল, নন্দর চেহারাটা গেছে শুকিয়ে। কাশে ঘং ঘং করে। মুখের ওপর সেদিন মায়ের সাঁড়াশী ছুঁড়ে দেওয়া ক্ষতের দাগটা কোনদিন যাবে না নন্দর। কিন্তু ভাব হলে মা আর নন্দ হাড়ী তেমনি করেই হাসে।

একদিন নন্দ ডাকলে রাজাকে। বর্ষার গঙ্গা এপার ওপার ভরা ভরতি। জোয়ার উজানে চলেছে উত্তরে। আকাশে মেঘের ঘন ঘটা। ছেঁড়া ছেঁড়া মেঘেরই মত পশ্চিমা পেলায় নৌকার পালগুলি উড়ছে। রাণীর বাজারের ঘাটে অনেক নৌকা। কেউ যাবে কলকাতায় কেউ মগরা পাণ্ডুয়া, আরো দূর বর্ধমান ছাড়িয়ে পশ্চিম দেশে।

নন্দ বললে রাজাকে বৃকে টেনে, ‘বাঁশীতে পাঁজরা খায় জানিস ?’

রাজা বললে, ‘তা বললেও আমি বাজাব।’

যেন তাকে বারণ করবে নন্দ, সেই ভয়। নন্দ বললে, ‘সাবাস। মা’র কাছে থা’ক।’

আকু কোনদিন ভয় দেখাতে পারেনি রাজাকে। কারণ, রাজা তখন হারাবার ভয় শেখেনি। নন্দর কথা শুনে তার বৃকের মধ্যে চমকে

উঠল। বলল, ‘ভূমি ?’

নন্দ গজার বুকে তাকিয়ে বলল, ‘চলে যাব।’

যেন ঝড়ে ডানা গুটনো চিলটা ডানা ঝাপটা দিয়ে, তার সবল গ্রীবা ভুলে, আবার আকাশের দিকে তাকিয়েছে যদিও চোখে তার ক্লান্তির ছায়া।

রাজার ঘাড়ে হাত দিয়ে বলল নন্দ, ‘কিছু গড়তে পারলুম না, তোদের খাওয়াতে পরাতে পারলুম না, তাই পালাব।’

রাজার মুখটা নিজের বুকে ঘষে দিয়ে বলল, ‘কাদিসনে রাজা। শোন তোকে একটা কথা বলি।’

রাজা মুখ ভুলতে পারল না। জীবনে এইটি তার প্রথম শোক। নিজের বাবার মৃত্যুতে শোক পায়নি, দুঃখ পেয়েছে রাজা। কষ্ট হয়েছে। শোক অণু জিনিষ। মনের যেখানটায় কালের প্রলেপ সহজে পড়ে না। রাত্রি হলেই আকাশের তারার মত সে চিরদিন ধরে জ্বলে।

রাজা ফুঁপিয়ে ফুঁপিয়ে কাদলে।

নন্দর গলার শিরাগুলি ফুলে উঠল মোটা দড়ির মত। সেও কিছুক্ষণ ধরে ঢোক গিলল। বলল, ‘শোন রাজা, একটা কাজের কথা শোন। কেওরাপাড়ার গুয়েরগুলোন জানে না, মানুষ হলে জানতে হয়, সোমসারে চিরকাল কেউ থাকতে আসে নাই বাপ, বুইলি ? মরণের বাড়ি ভয় নাই, ভয় পাস না কোনদিন। নাম তোর রাজা। দেশের নয়, নিজের রাজা নিজে থাকবি। এই ছাখ না আমি কি ক’রে ফেললুম, পাঁচিটাকে ডোবালুম। সাধ ছেল, কিন্তু নিজের রাজা নিজে থাকতে পারলুম না। মনে মনে রাজা থাকবি। মন খারাপ হলে কষে বাঁশী বাজাবি।’

কাউকে উপদেশ দেওয়া নন্দর ধাতে নেই। কিন্তু রাজাকে সে তার মনের মত কথা কয়টি না বলে পারল না। কারণ, পাঁচির গর্ভে তার ঔরসজাত সন্তানকে কোনদিন কোলে নিয়ে দেখেনি, আকুর ছেলে তার ছেলের চেয়ে বেশি।

জোয়ার বয়ে যায়। পশ্চিমা মাঝি ডাক দিলে, ‘হেই হো বাঙালি মাঝি, জলদি আও, চল্না ছায়।’

নন্দকে ডাকছে। তাকে জড়িয়ে রাখা রাজার হাত দুটি ছাড়িয়ে সে বলল, 'বাই বাপ্।'

নন্দর কথা কতখানি বুঝল রাজা, কে জানে। সে ভেজা লাল চোখে তাকিয়ে রইল নন্দর দিকে।

মাঝির কাজ নিয়ে চলে গেল নন্দ। নৌকা চলে গেল উত্তরে, পূর্ব দক্ষিণ কোণে ঘেঁষা বাতাস পেয়ে, পাল ভুলে দিলে। দশ মাল্লাই নৌকা বদর বদর করে হারিয়ে গেল দূর বাঁকের মুখে।

মুখ ফিরিয়ে তাকিয়ে দেখলে রাজা, সামনে পৃথিবী। মস্ত বড় পৃথিবী, কূল নেই কিনারা নেই। এত বড় পৃথিবীতে এবার কোথায় যাবে রাজা ?

আশ্চর্য। রাণীর বাজারের চেয়ে পৃথিবী কত বড় ! নন্দ চলে গেল, তাই যেন এ বিশ্বের বিরাটই প্রথম অশুভব করল সে।

মায়ের কাছেই এল রাজা। রাণীর বাজারে কত বড় বড় ঘটনা ঘটে। সভা সমিতি হয়। পৌর সভার ভোট নিয়ে কত মারামারি হয়। প্রতিদিন কত ঠকানো, জোচ্চোরি, কতজনের পৌষ মাস আর সর্বনাশের যুগপৎ খেলা হয়।

কেওরাপাড়ায় তাতে কারুর যায় আসে না।

শুয়ার আর একটিও নেই। বুড়ি বুপড়িতে পেট চালান দায়। বাঁশ বাখারি এনেই বা দেয় কে ? পাড়া গাঁ থেকে বাঁশ বাখারি না নিয়ে এলে, শহরের গোলা থেকে বাঁশ কিনে, মালের পড়তা পড়ে না।

পাঁচি কেওরানির মাথা খারাপ হতে লাগল আবার। যেদিন সে বুঝতে পারল, নন্দ চলে গিয়েছে, সেদিন সে খুব কাঁদলে। একটি দিন পুরোপুরি কেঁদে, তারপর গঙ্গার জলের নিরন্তর যাওয়া আসার দিকে তাকিয়ে, ফিসফিস করে বলল, 'লোকে বোঝে না।'

এই লোক যে কে, যে কোনদিন কিছু বোঝে না, চেনা বড় দুষ্কর। এই লোকও সেই বিশ্ব-রহস্যেরই অঙ্গীভূত। যে কোন দিন কিছু বোঝে না। তার পায়ে মাথা কুটেও তাকে কোনদিন কিছু বোঝানো যায় নি এ সংসারে। সে বোবা, কালা, অন্ধ।

পাঁচির মনে হয়, এ বিশ্বের সব মানুষের মধ্যেই এই লোকটি আছে, যে বোঝে না। সে গঙ্গার কাছে সেই কপাই বলল, নন্দ হাড়ীর জগু থেঁ তার প্রাণ পুড়বে, সেটা কেউ বুঝবে না। নন্দ হাড়ীও বুঝবে না। বুঝবে না, বালিকা বয়সে যে আকুর সঙ্গে কাটিয়ে সে আর দশটি মেয়ের মত জীবনের স্বাদ ভোগ করছিল, তার চেয়ে অনেক বড় পাওয়া হয়েছিল তার নন্দকে। সে পাওয়ার সুখ যত তীব্র, বেদনাও ততোধিক তীব্র। নন্দ তার বাঁধা ধরার মানুষ ছিল না, মনের মানুষ ছিল। সে কাছে থাকলে সংসারের ধুলো লেগে যায় তারো গায়ে। তখন তাকে আর চেনা যায় না। সে চলে গেলে বোঝা যায়।

নন্দকে পেয়েছিল সে বীর্ষশূঙ্করূপিনী হয়ে। তাই, আপন রক্তের দাপট যে কত, সেটা সে অতীতে টের পায়নি। বুকে যে মোচড় কতখানি লেগেছে, সেটাও কাউকে বোঝান যাবে না। তার এই প্রস্তুত কঠিন শরীরে কালের রেখা পড়ল না আজো। চির যৌবনের জোয়ার রয়ে গেল তার অনাথ সূঠাম অঙ্গে অঙ্গে। কিন্তু রক্তে আর তেমন করে আগুন জ্বলবে না কোনদিন।

পাড়ায় সবাই গাল দিলে নন্দকে। বললে, 'জানাই কথা, শত হলেও জাতে হাড়ী তো !'

যেন কেওরা হলেই নন্দ থেকে যেত।

নন্দর গুরসজাত ছেলেটি মারা গেল।

রাজার পিঠে রোজ খানকয়েক করে কঞ্চি ভাঙতে লাগল পাঁচি। যেন তার জীবনের যত আপদ রাজা-ই। রাজার বাঁশীগুলির ওপর সবচেয়ে বেশী রাগ পাঁচির। মুরলীবাঁশ এনে এনে রাজা বাঁশী তৈরী করে, পাঁচি সেগুলি মট্ মট্ করে ভাঙে রাজার পাঁজরের মত, আর বলে, 'শোরের বাচ্ছা, ওর বাবাকেলে বাপের কাছে (নন্দর কাছে) কানাইবিস্তি শিখেছে।'

কানাইবিস্তির মানে সম্ভবত কৃষ্ণবিস্তি। অর্থাৎ বাঁশী বাজানো।

পাঁচির প্রতি অসীম ঘৃণা এখন রাজার। আগেকার মারধোরের মধ্যেও একটা অন্য কিছু ছিল যেন, কাঁদলেই দুঃখ চলে যেত। এখন

আর তা যায় না রাজার। সে খুলো ছুঁড়ে মারে মাকে। সেও গালন্দেয় মাকে সমানে সমানে।

মা যে কী কুৎসিত দেখতে, ঠিক ডাইনীর মত, ভাবলেই রাজার ইচ্ছে করে কাটারি দিয়ে মায়ের গলাটা কেটে দেয়। মা যে কেন মরে না! হে ভগবান, হে কেওরাদের ঠাকুর, হে মা গঙ্গা, মা কবে মরবে? কবে মরবে?

ভাগাড়ের শকুনেরা নাকি অন্তর্যামী। একমাত্র তারাই নাকি জানে। কে কবে মরবে। রাজা লক্ষ্য করে দেখেছে, শকুন সত্যিই যেন সর্বজ্ঞ। তাদের চাউনি, এদিকে ওদিকে ঘাড় ফেরানো দেখলে, বোকা যায়, তারা সব টের পাচ্ছে। কিন্তু রাগ পড়ে গেলে, তখন আর মা'কে তার তেমন খারাপ লাগে না। রাত হলে, এখনো মার কাছে আসতে ইচ্ছে করে। মার কাছে যখন আসতে ইচ্ছে করে, তখন আর মায়ের মরে যাওয়ার কথাটা সে ভাবতে পারে না।

কিন্তু পাঁচি এখন আর খেতে দেয় না রাজাকে। রাজাকে নিজের খাবার নিজেকেই সংগ্রহ করতে হয়। বাজারের ফড়েদের সঙ্গে সে দূর গ্রামে যায় মাল আনতে। ফড়ের অনুপস্থিতিতে গদীতেও বসে। কিন্তু সেখানে বিশ্বস্ত থাকবার উপায় নেই। পয়সা না সরিয়ে বিশ্বস্ত থাকলেও অবিশ্বাস এবং মার কপালে থাকেই। আর দু'পয়সা সরালেও, সম্পর্কের বড় একটা এদিক ওদিক হয় না।

কিন্তু তবুও মা ছেলের আহার প্রতিদিন জোটে না। কেওরাপাড়ায় ক'জনেরই বা তা প্রতিদিন জুটেছে। কেওরা পুরুষদের মধ্যে কেউ কেউ আসে পাঁচির কাছে। কিন্তু পেটে সম্ভান আসার ভয়ে কাউকে আর পাস্তা দেয় না পাঁচি।

তবু একদিন রাত্রে, আবার দুটি পা এগিয়ে এল পাঁচির ঘরের দিকে। সে পা ফাটা খ্যাবড়া খ্যাবড়া নয়, চকচকে জুতো। যে পালিশের ওপর রাণীর বাজারের প্রবৃন্তির ইতিহাস ঠিকরে পড়ছিল। জঙ্গল মাড়িয়ে নয়, পাদুকা শোভিত সে চরণ যুগল এল রাণীর বাজারের ইতিহাসেরই স্বচ্ছন্দ সড়ক ধরে। তার ঠিকরে যাওয়া পালিশ



যেন কেউটের মত চকচকে, জুখাত' জিহ্বা যেন লকলক করছে।  
তার মসমস শব্দে প্রবৃত্তির দাঁত পেশার নির্ভুর খুশির ঘর্ষণ।

দরজা খুলে দাঁড়াল পাঁচি, চলে যার খোঁপা বাঁধা, মুখে যার পান।  
চোখে যার তাড়ির নেশা লাগা জ্বলন্ত অজ্ঞারের দপ্‌দপানি, নিঃশ্বাসে  
যার ঘরের অন্ধকারও বিবাস্ত।

বিশ্বরহস্যের প্রাণ সংলগ্ন সহজ মানবী পাঁচির আজ রূপান্তরের কান্নার  
দিন নয়। কিন্তু বিশ্ব রহস্যেরই আর এক রূপান্তরের অসহ্য ঘৃণাটা  
বাকী থেকে গিয়েছিল। সেটাই আজ প্রাণ ভরে করলে পাঁচি  
সেজেগুজে, তাড়ি খেয়ে, সাটিনের সার্ট জড়ানো বুকে খিলখিল  
হেসে ঢলে পড়ে। আজ শোক-সাজ-নবজন্মের আর এক দিন।  
বিশ্বরহস্যের যে দুয়ারটা আজ খুলেছে, সেখানে শূন্য হাঁড়ি, নেভানো  
উন্নু, অভুক্ত জঠরের বিবেকহীন বাঁচতে চাওয়ার শুধু জীব যাতনা।

অশেষ ঘৃণা দিয়ে জড়িয়ে ধরল, মুখে মুখ দিয়ে হাসল পাঁচি  
স্বৈরিনী, নোনা ভাতের থালাটা শুধু জেগে রইল তার চোখের সামনে।  
কালো রায় যখন বেড়িয়ে এল, ভাইপো শম্ভু রায়ের পিটুলীতলা  
ভিটে পাঁচির ঘর থেকে, বাইরে তখন রাজা দাঁড়িয়ে আছে দরজায়।

কালো রায় ভয় পেয়েছিল। বলল 'কে ?'

রাজা একেবারে হা। কালো রায়কে চিনতে পেরে, ছেলেটা  
যেন বিশ্বরহস্য দর্শন করতে লাগল। কালো রায় একটি সিকি কিংবা  
আনি, ছুঁড়ে দিল রাজার পায়ের কাছে। বলল 'নে।'

বলে চলে গেল। পয়সাটা কুড়িয়ে নিল পাঁচি।

রাজা তাকিয়ে রইল মায়ের দিকে। মিথ্যে কৈফিয়ৎ দিয়ে গল্প  
খাড়া করার স্বেচ্ছা এখানে নেই। তার ধারও ধারে না কেউ।  
তবু রাজাটা যে কবে থেকে এমন গোঁয়ার হয়ে গেছে, টের পায়নি  
বুঝি পাঁচি। হোঁড়া মায়ের দিক থেকে সন্দেহ জিজ্ঞাস্য চোখ দুটি  
নামালে না একবারো। তারপর ভাত রান্না করা পোড়া কাঠ দিয়ে  
ছুঁ ঘা কষালে পাঁচি রাজাকে। বললে, 'যমের মত অমন তাকিয়ে  
থাকার কি আছে, আঁা ? মায়ের সাঙা দেখছিস রে ইল্লোৎ।'

রাজা আজ একেবারে রাজা। এমন একটা দুর্জয় প্রাণী যে ওর মধ্যে আছে সেটা আগে টের পাওয়া যায়নি। আগেই ভাতের হাঁড়িটা দিলে উপুর করে ফেলে।

পাঁচি একেবারে বাঘিনীর মত চিৎকার করে ঝাঁপিয়ে পড়তে গেল রাজার ওপরে। রাজা তখন পোড়া কাঠটা ছুঁড়ে মেরেছে মাকে। অব্যর্থ ভাবেই সেটা লেগেছে পাঁচির মাথায়। সে দিকে না তাকিয়ে রাজা জলের কলসীটা দিল আছড়ে ফেলে।

কাকে ধরবে পাঁচি? কাকে মারবে? একি পাঁচির রক্তে গর্ভেরই ঘৃণা ফুঁসে উঠেছে তার গর্ভজাতের মধ্য দিয়ে। সে যেন ভয় পেল। ভয়ে ও বিস্ময়ে রক্তারক্তি মাথায় হাত দিয়ে পাঁচি এই প্রলয় দেখতে লাগল। রাজা তখন বেড়ায় গোঁজা জিনিসপত্র মাটিতে ফেলে তছনছ করছে।

তারপর রাজা পালাল না ছুটে। ঘরের একটা কোন্ নিয়ে দাঁড়াল মায়ের মুখোমুখি।

পাড়ার দু' একজন দেখতে এল ব্যাপারটা। গালাগালি চিৎকার তো আছেই। নতুন করে কিছু দেখবার নেই। তবু একটু বেশি মাত্রায় হচ্ছে বলেই কয়েকজন এল। এসে উকি ঝুঁকি দিয়ে দেখে রাজার যে এই আসল কেওয়ার গুণ ফুটেছে এতদিনে, সে কথা বলাবলি করলে। কত বড় পাজী আর সর্বনেশে ছেলে, কত বড় ডাকাত আর ডাকরা সেটা এতদিনে বোঝা গেল।

কিন্তু ছেলে কিংবা মা কারুর পক্ষ থেকেই যখন সার্বা শব্দ পাওয়া গেল না, তখন সবাই চলে গেল। শুধু তারা নাকি বুঝতে পারলে না এরা সং, না এসব ঢং।

পাঁচি চোখ ফিরিয়ে নিয়েছে। কপালে হাত দিয়ে সে মুখ গুঁজে আছে বেড়ায়। ঘাড়ের কাছে ঝাঁচলে তার রক্ত লেগেছে।

রাজাকে যেন কেউ ষাছু করেছে। নড়তে পারছে না। একটু একটু করে নিভে এল ওর তার চোখের আগুন। একটু একটু করে চোখের সামনে ফুটে লাগল ওর অবিশ্বাস্ত খ্যাপামির তছনছ করা ছবি।

তারপর ওর শরীরটা কাঁপতে লাগল। আর জল এল ছুঁচোখ ফেটে।  
সেও বেড়ায় মুখ চাপল।

এখনও রাজা কিছুই চাপতে শেখেনি।

তারপর ও শুনতে পেল মায়ের ভার ভার গলা, ‘এই মুখপোড়া  
এখানে আয়, আয় বলছি।’

মায়ের এমনি ‘ডাক কোনদিন রাজা অমান্য করতে পারে না।  
মায়ের দিকে না তাকিয়ে কাছে এসে দাঁড়াল। পাঁচির হাতের  
সীমানায় এল। পাঁচি যেন অবাক হয়ে তাকিয়ে রইল ছেলের দিকে।  
যেন রাজা তার অচেনা। পাঁচি যেন কঠিন গলায় হুকুম করল রাজাকে,  
‘আরো কাছে আয় মুখপোড়া।’

লক্ষ্মীর আলোয় রাজার ছায়াটা মায়ের গা ঘেঁষে দাঁড়াল। পাঁচি  
হাত বাড়িয়ে, রাজাকে এক হ্যাচকায় নিজের বুকে ঠেসে ধরে বলল,  
‘এখানে মুখ দিয়ে পড়ে থাক, নড়বি না। রাজা ছু’ হাতে মাকে জাপটে  
ধরে আবার ফুলতে লাগল।’

পাঁচি তাকিয়ে দেখল, রাজা তার বুক ছাড়িয়ে উঠেছে লম্বায়।  
চোখ তার জলে ভেসে গেল। ‘ছু’ হাতে রাজার রুক্ষ মাথাটি জড়িয়ে  
ধরে বলল শুধু, ‘মই, মলুই তুই!’

রাণীর বাজার দিনে জাগে, রাতে জাগে। রাণীর বাজার হিসেব  
করে, খুনোখুনি করে। রাণীর বাজার নানানভাবে হাসে, গান করে।

কিন্তু রাণীর বাজার কখনো কখনো মুখ লুকিয়ে না কেঁদে পারে না।  
তার নানান ডামাডোলের মধ্যে সে কান্না দেখা যায় না, শোনাও যায় না।

পাঁচি কেওরানি আর তার ছেলে রাজা কেওরার জন্য কেঁদেছিল  
সেদিন রাণীর বাজার। যাদের জন্ম-মৃত্যুর কার্যকারণ, হিসেব নিকেশ,  
যদিও নেই রাণীর বাজারে! কেঁদেছিল কারণ, রাণীর বাজারের  
মহাকালেরও বুঝি মাঝে মাঝে বুক ফাটে নিজের যন্ত্রটা চালাতে  
চালাতে।

তবুও কালো রায় এল। কালো রায়ের লোকেরা এসে আবার শস্ত

রায়ের ভিটে থেকে, আশু আশু বেড়া ভুলে এনে বসাল তার জায়গায়। ছ' একখানা নতুন দরজা, নতুন টালিও এল কিছু। আকুর পুরনো ঠিকে-ভিটেয়, নতুন করে জীবনস্বের পশুন হল পাঁচি কেওরানির। বাঁশ দড়ির একটি খাটিয়াও এল। বোধ হয়, পাঁচি কেওরানির কাঁচামাটির মেঝেতে বসতে অসুবিধে হয় কালো রায়ের।

কথাটা কালোর ভাইপো শম্ভুর কানে গেল। কিন্তু সে আসেনি। শম্ভুর বয়স অল্প। বি, এ, পাশ করেছে। চাকরি করবার তার প্রয়োজন নেই। গোটা রাণীর বাজারে সে খ্যাতিমান ছেলে। কালো রায়ের বংশে নাকি সে প্রহ্লাদ। গরীবের অনেক উপকার করেছে। শ্রায়তীর্থের দৌহিত্র নকড়িকে তার গুরু বলা যায়। যদিও শম্ভু নকড়ির চেয়ে বড়। রাণীর বাজারের রাজনীতিতে শম্ভুরও কিছু শরিকানা আছে।

লোকে জানে, কালো রায়েরও শরিকানা আছে রাণীর বাজরের রাজনীতিতে। তবে সেটা অল্প হিস্তায়। সেকথা আসবে পরে।

শুধু কেওরাপাড়া থেকে শম্ভুর কাছে, কালো রায়-পাঁচি কেওরানির আপোষের সংবাদ যে নিয়ে গিয়েছিল, তাকে বলে দিয়েছে শম্ভু, 'কালো বাবু যে দিন আবার পাঁচিকে তাড়িয়ে দেবেন, সেইদিন আমাকে খবর দিতে বলো। পাঁচিকে আমি আবার জায়গা দেব।'

পাঁচির এই পরিবর্তনে পাড়ার অনেকে মুখ বাঁকাল। কিন্তু নীরবে কেউ কেউ বলল, 'এই বেশ হয়েছে। শত হলেও ওঁয়ার দিদিমাই তো আকুকে জীবনস্ব দে' গেছিলেন। ওঁয়ার সঙ্গে আপোষ হয়ে যাওয়াই ভাল।'

কিন্তু পাঁচি আর সেই পাঁচি রইল না। যদিও তার দালান কোঠা উঠল না, খাট পালঙ্ক হল না, গা ভর্তি গয়না হল না, জমিদারের ট্যাক্সো তো মাগ্ হল। পেটের ভাতের ভাবনা তো গেল। পেট পুরে ভাত খেয়ে, ছ' বেলা দুটি পান মুখে দিয়ে, ঠোট রাজা করে তো পাঁচি লোকের সঙ্গে কথা বলতে পারবে। তা ছাড়া বামুন ভদ্রলোক বলে কথা। জমিরও মালিক। তার সঙ্গে আসনাই। কার মধ্যে কি আছে, কে জানে বাবা! পাঁচি দূরের কথা, কার কথায় কে থাকে ?

কথায় বলে, 'ভূমিও ভাল, আমিও ভাল, আর সব যেমন যেমন ।'

তা ছাড়া মেয়ে-পাড়ার মত ব্যাপারটা নয় । সন্ধ্যার ঝোঁকে, পাঁচির দোরের দিকে একটু চোখ বুজে থেকে । কালো রায় এলেন কি গেলেন, কাকপক্ষীর জানারই কি দরকার । বায়ুন-কেওরা ? তা সেও নতুন নয় ।

এই অচ্ছূত পাড়ায়, রাণীর বাজারের মূড়ার খতিয়ান আছে অলিখিত গণনায় । আর এসব পাড়ায় যত প্রবৃত্তির অভিযান হয়েছে, সেই নতুন পুরণো হিসেবও কেউ ভুলে যায়নি ।

কিন্তু তাকে প্রতিদিন মনে করে বসে আছে কে ?

এ কথাও ভুলে যেতে লাগল সবাই । কানায়ুষো সব পাড়াতেই হল কয়েক দিন । আবার ভুলে গেল কয়েক দিনেই । শুধু যে কখনো ভুলতে পারে না, সেই নীরজা । এসব পরে, রাণীর বাজারে কালো রায়ের এবং কিরণ বালার আবির্ভাব পর্বের কথা ।

রাজা আসে অনেক রাত্রে । বেরিয়ে যায় ভোরবেলা । রাত্রে এসে, খাওয়ার পর রাজার যেটা আসল কাজ, সেটা হল বাঁশী বাজানো ।

কালো রায়ের প্রথম দিন আসার পর থেকে, ও বিষয় নিয়ে রাজার সঙ্গে মায়ের আর কোন সংঘর্ষ হয়নি । আর কোন দিন মা ছেলে পরস্পরকে জড়িয়ে ধরেনি । পাঁচির যদিও অনেক কথা থাকে, রাজা একটা বিস্ময়কর গান্ধীর্ষ নিয়ে শুধু 'হঁ' 'হঁ' দিয়ে যায় । মায়ের দিকে ভাল করে তাকিয়েও দেখে না । পাঁচিই শুধু 'হা' করে চেয়ে থাকে রাজার দিকে । বরং বেশী কথা বলতেই তার সঙ্কোচ হয় যেন । যেন সত্যি কেমন ভয় ভয় করে রাজাকে । আর ভয় করেও কেন যেন মনটা কোথায় ভরে যায় পাঁচির, নিজের জন্ম তার ঘুণাটা ওঠে বেড়ে ।

রাজা গঙ্গার ধারে বাঁশী বাজায় । পাঁচি ঘুমোতে পারে না । নন্দ হাড়ীর গানগুলি সার্থক বাজাতে শিখেছে রাজা । আকুর মরার দিনই মনসাতলার পড়ে, প্রথম ভাল করে, মর্মমূল ভরে, নন্দ হাড়ীর বাঁশী শুনেছিল পাঁচি । আকুর চিতার অঙ্গার বুঝি জ্বলছিল তখনো । কিন্তু তার মনে হয়েছিল, নন্দ হাড়ী তাকে ডাকছে বাঁশী বাজিয়ে বাজিয়ে ।

অবুঝ রাজা সেই সুর বাজায় । কিন্তু নন্দ হাড়ী আর কোনদিন আসবে না ; শুধু সুরার এক অদৃশ্য খাঁচায় সে বাঁধা পড়ে থাকবে চিরদিন ।

পাঁচির সর্বাঙ্গে জ্বালা ধরে । রক্তে তার কি এক প্রলয়ের আগুন যেন জ্বলে । কিন্তু কিছুই পোড়ানো যায় না তাতে । শুধু নিজে জ্বলে পাঁচি । কালো রায়ের ভালোবেসে ‘দেখতে ভাল লেগে’ দেওয়া রূপোর কোমর বন্ধনীর রাহু বেঁটন শত চেঁচাতেও আর যেন ছিন্ন করা যায় না ।

রক্তের জ্বালাতেই বুঝি, পাঁচির শরীর স্থূল হয়ে ওঠে । মোটা হতে থাকে সে তারপর মোটা হতে হতে, মাংসে চিড় খায়, ফাট ধরে, খসে খসে গলে গলে পড়তে থাকে ।

রং-এর জল রং-এ মিশলে লহজে টের পাওয়া যায় না ; কিন্তু স্বচ্ছ জলে গোপন রাখা যায় না তাকে ।

কেওরানীর তেজোদ্ধত, প্রকৃত নায়িকা-শুদ্ধ রক্তে, অতি দ্রুত আর আর ভয়ঙ্কর ভাবে কালো রায়ের রক্ত উঠল ফুটে ।

কালো রায়ের দেওয়া খাটিয়াতেই শুয়ে মরল পাঁচি । মরবার আগে, সব অস্থিরতার পর যখন শাস্ত হয়েছিল পাঁচি, যখন যন্ত্রণা দূরে চলে গেল, মৃত্যু তার শিয়রে হাত রেখে শেষ বারের জন্ম পৃথিবীকে দেখে ও শুনে নিতে বলল, তখন পাঁচি রাজাকে ডেকে বললে, ‘সেই গানটা না কি রে রাজা যেটা সে বাজাত ?’

নন্দ হাড়ীর কথা বলল পাঁচি । গানটার কথা রাজাকে বলেছিল নন্দ । পাঁচিকেও অনেকদিন বলেছে । রাজা বলল’

‘সখি যাবার কালে,                      কেন ডাকিলে  
ভবেতে বড় দুঃখ গো  
নির্বাণ নগরে                      যেতে মন করে  
সেথা বড় স্নেহ গো ।’

পাঁচির দৃষ্টি স্থির । বলল, ‘আর এল না । শোন, রাজা । কাছে আয় ।’

রাজা কাছে গেল । রাজার মুখের দিকে তাকিয়ে, একটু বুঝি অভিমান হল পাঁচির ।

আর কোন কথা সে বলেনি । রাজা বলল, ‘কি বলছিচ্ মা ?’

বুড়ো ও অন্ধ মুনি কেওরা বলল, ‘আর কিছু বলবে না তোর মা ।’  
মারা গেল পাঁচি ।

সবাই মুনি কেওরার দিকে তাকাল সভয় বিষ্ময়ে ।

কিন্তু পাঁচি তখন সত্যিই মারা গিয়েছে ।

ইতিহাসে রাণীর বাজারের নাম নেই । কিন্তু রাণীর বাজারের  
ইতিহাসে, এরকম অনেক পাঁচি কেওরানি মরেছে । যুদ্ধোত্তর স্বাধীন  
দেশে, আজকেও মরছে । কিন্তু রাণীর বাজারের ইতিহাসে নাম লেখাবার  
কোন দাবী তাদের নেই ।

ইতিমধ্যে যুদ্ধ লেগে গিয়েছিল কবেই । অনাহার ও মরকের খাবাটা  
নেমে এসেছে রাণীর বাজারেও ।

রাজা প্রথমে গেল শস্তুর কাছে ।

শস্তুর তখন মন খারাপ । নকড়ি ইণ্টারমিডিয়েটের ছাত্র । শস্ত্র বি,এ,  
পাশ করে বেরিয়েছে । তবু রাজনীতিতে গুরু তার নকড়িই । শস্ত্র  
যখন ভাবছে, ইংরেজকে যুদ্ধে বাধা দেওয়াই সঙ্গত, নকড়ি তখন উল্টো  
কথা বলছে । বলছে, ‘শস্ত্রদা সোজা আঙ্গুলে ঘি ওঠাতে যেওনা । রাজ-  
নীতির পথটা অত সোজা সোজা মারের পথ নয় । ভাবছ, আমাদের শত্রু  
বে-কায়দায়, তা মোটেও নয় । যে দুর্দিনটা এসেছে, তাতে এখন  
ইংরেজদের সঙ্গে আখেরি মিটমাটের সময় আমাদের নয় । দুর্ভাগ্যের হলেও  
পথ গেছে বেঁকে ঘরের শত্রুর সঙ্গে এখন আমাদের সন্ধি রাখতে হবে ।’

এরকম উল্টোপাল্টা কথায় শস্ত্র অস্থির ও বিব্রত ।

সেই সময় একদিন রাজা এল । নকড়িও ছিল তখন ।

শস্ত্র বলল, ‘কি রে ?’

রাজা বলল, ‘মা মারা গেছে দাদাবাবু ।’

শস্ত্র চিনতে পারলে না, ‘কে তোর মা ?’

‘কেওরাপাড়ায়—’

‘ও, পাঁচি ? হ্যাঁ, শুনেছি ।’

কয়েক মুহূর্ত অশ্রুমনস্ক হয়ে রইল শম্ভু। পাঁচির কথাই ভাবছিল সে। কারণ তার মৃত্যুর কাহিনী তাকে সাড়স্বরে শুনিয়ে গিয়েছে কেওরাপাড়ার লোকেরা। শম্ভুর চোখের সামনে ভেসে উঠল, তার কাকীমার মুখখানি। রাণীর বাজারের পথে বেরুতে যার লজ্জা।

শম্ভু বলল, ‘কি বলছিস্, বল।’

রাজা শম্ভুর মুখের দিকে তাকিয়ে দেখে নিল, দাদাবাবুর রাগ আছে কি না। বলল, ‘আপনার কাকার ভিটেয় আমি থাকব না দাদাবাবু। আপনার পিটুলীতলার জমিতে আমি থাকব।’

শম্ভু অবাক হয়ে বলল, ‘কেন রে?’

রাজা মুখ নামিয়ে বলল, ‘দাদাবাবু, মার জন্মেই ও ঘরে ঢুকেছি। মরবার জন্মেই মা ঢুকেছিল ওখানে। আপনি যদি জায়গা না দেন, তবে ইষ্টিগনে পড়ে থাকব।’

শম্ভু আর নকড়ি চোখাচোখি করল। অস্ত্রাজপাড়ার ছেলের মুখে এমন কথা, এই তারা প্রথম শুনলে যেন, শম্ভু তবু বলল, ‘কিন্তু ওখানে থাকতে আপত্তি কি? তোর বাপ মরেছে ও ঘরে, তোর মা মরল।’

রাজার দুই চোখে আগুন দেখা গেল। কালো রায়ের বাড়িটাও দেখা যাচ্ছিল শম্ভুর বৈঠকখানা থেকে। সে দিকে একবার তাকিয়ে বলল রাজা, ‘বড় ঘেন্না করে দাদাবাবু।’

শম্ভু আর নকড়ির তখন বয়স অল্প। রাজাকে তাদের আশ্চর্য ছেলে বলে মনে হয়। তাকে ওরা বসতে বললে। খেতে দিলে আর রীতিমত অন্তরঙ্গ সুরে কথা বলে বুঝিয়ে দিলে, রাজা তাদের বন্ধু স্থানীয়। নকড়ি জিজ্ঞেস করল, ‘তোমার বয়স কত?’

‘পনর।’

শম্ভু বলল, ‘আমার মাকে আর কিছু বলিস্নে যেন। ঘর ভুলে নে গিয়ে। ঠিকে সব লিখিয়ে নিলেই হবে এক সময়ে। ঘর ভুলে নিল রাজা। কিন্তু বাঁশীর মতনই নকড়িদের সঙ্গটা আর ছাড়তে পারলে না সে। যদিও দিন কেটে যায় পেটের ধান্দায়।

যুদ্ধ শেষ হয়ে গেল। সরকার বদলাল। রাজা চাকরি পেল চটকলে।



কিন্তু বেশীদিনের জন্তে নয়। নকড়ির মস্ত ছিল তার কানে। ধর্মঘট করতে গিয়ে, আরো তের জনের সঙ্গে তার চাকরি গেল। সাতদিন রাণীর বাজারের থানায় হাজতবাসও হল রাজার।

কিন্তু পেট ? সে তো কোন কথা শুনতে চায় না। তাকে ভরাতাই হল। ভাগ্যের কল কি ভাবে চলে, কে জানে। নন্দ হাড়ীর মত রাজাও রাণীর বাজারের খেয়াঘাটে মাঝির কাজ আরম্ভ করল।

সেই সময় জীবন রহস্যের আর একটি দুয়ার খুলে গেল রাজার সামনে। মুনি কেওয়ার নাতনি, গণেশ কেওয়ার মেয়ে ছেউটী, তার বাঁশীর সুরে তাল দিয়ে একদিন হেসে উঠল গঙ্গার ধারে।

সন্ধ্যার কোল আঁধারে, শাড়িতে গাছ কোমর বেঁধে মেটে কলসী কাঁখে এসে একদিন দাঁড়াল ছেউটি, জোয়ারের জলে পা ডুবিয়ে।

অদূরেই, জানোয়ারের শব ঘিরে, শকুনেরা রাত্রি অবসানের ধ্যান করছে। রাত কানা সবভূকেরা তাদের তীক্ষ্ণ চোখ নিয়েও এখন অসহায়। প্রকৃতির কাছে ওইখানেই তারা কাবু হয়েছে।

রাণীর বাজারের সঙ্গে দিনে রাত্রে পাল্লা দিয়ে, তারাও আসর জাগিয়ে রাখতে পারে না।

হাড়গোড় কঙ্কাল মিলিয়ে, এ মৃত্যুলীলার মাঝখানে, হাড়ী কেওরা ডোমেরা মাটি নিকিয়ে, গোবর লেপে, কাঁট দিয়ে নিজেদের চলার বসার জায়গা ঠিক করে রাখতে পারে। এ মৃত্যুলীলার মাঝেই তাদের বাস, তাদের যত হাসি কান্নার খেলা।

কেওরাপাড়ার গঙ্গাধারে পৌরসভার টিমটিমে বিজলী বাতি জ্বলে। কেওরাপাড়ার তাস আর 'ষোল ঘুটি বাঘ চাল' আসর বসে লাইটপোষ্টের তলায়। আলো নাকি খুবই দ্রুতগামী, যদিও নাকি মনের মত নয়, তবু কেওরাপাড়ার বিজলী আলো উঁচু পাড় থেকে মাঝখানের ঢালুতে আসতে আসতেই নিস্তেজ হয়ে আসে। তারপর যে অন্ধকার, সে অন্ধকার।

লাল কলসী কাঁখে সেদিন এল ছেউটি। ষোল বুঝি পার হয়ে যাব যাব করছিল তার। নামে ছেউটি হলেও শীতের সেই ছেউটি গঙ্গাটি নেই আর মেয়ে। আঁধারের ঢল নেমে গিয়েছে, রক্তশ্রোত আর্ষিত

হয়ে অনুভূতির মুক্তি স্থান শেষে দিগদিগন্ত আকুল হয়ে গিয়েছে।

খাটো ডুরে শাড়ীটিতে, আর ত্রেন করে ছেউটি নিজেকে আড়াল করতে পারে না। রং একটু কটা। কেওয়ার ঘরে তার অভাব নেই। স্মার্তীর্থের শান্তসম্মত সব সুলক্ষণনা মিলুক, কেওয়ার ঘরে ছেউটির নাক একটু উঁচুই, অর্থাৎ সুউন্নত বলা যায়। জংঘা ও উরু যুগল শিব-কোল-লগ্ন উমার মতই গুরু ও স্থাাম। চুলের বুধন যদিও কুলক্ষণ, কেওয়ার ঘরের এ আদিকপটুকু ছেউটি পার হয়ে আসতে পারে নি। কিন্তু চোখ বিশালই। যদিও ছেউটির চোখের মণি কালো নয়, কটাও নয়, কটাসে। বক্ষস্থল যদিও বিশাল ও মুনি-ধ্যানচূর্ণী, তবুও ঈষৎ নম্রতার অবকাশ এখনো আসে নি শূয়ের পিটিয়ে খেটে খাওয়া ছেউটির। ছেউটির রূপসী বলে নাম আছে কেওরাপাড়ায় তাই গণেশ কেওয়ার পণের ডাক কিছুই কম নেই।

কেওরানি পণ-শুদ্ধা।

ছেউটি বড় হয়েছে, ঘর ও শ্রেণা হিসেবে একটু বেশিই। আজকাল তাই হচ্ছে, কারণ কালের হাওয়া লাগে সব খানেই। রাণীর বাজারের ঘাটের নীলামের ডাকের মত, পণের ডাক বেড়েছে। এখনো পর্যন্ত চড়া ডাক বজায় রেখেছে বেচু। ব্যাচা কেওরা। আশেপাশের কেওরাপাড়ায় খবর চলাচল চলছে। খুব চড়া ডাক এলেই তো খালি হবে না। ডাক-ওয়ালাকেও দেখতে হবে। কারণ, মেয়ে বলে কথা।

আরো খবর গিয়েছে রাণীর বাজারে প্রবৃষ্টির রংমহলের রন্ধে, রন্ধে, ছেউটি কেওরানীর রূপ নাকি আর ধরে না।

সেই ছেউটি একদিন চমকে দিল রাজাকে।

ঘাট-মাঝির কাজ থাকার কথা তখন। কিন্তু রাজার রক্তে মাঝি নেই। হাল ছেড়ে বাঁশীতে তার মন বেশি। নন্দ হাড়ীর মতই, রাজা জীবনের দায়িত্ব থেকে খালাস পেয়ে বাউণ্ডলে বৃষ্টির পথে এসে পড়েছে কবে। এখন কেবল দুটি জিনিষ সে ছাড়তে পারবে না। বাঁশী, আর নকড়ি ঠাকুরের ডাক। বুদ্ধি দিয়ে জীবন চর্চা করে সম্ভব নয়, তাই হৃদয়বৃষ্টি দিয়ে নকড়িকে সে তার ঈশ্বরের আসনে বসিয়েছে। বাঁশী

তো তার নিঃশ্বাসেই কথা বলে ।

তাই, নন্দ হাড়ীরই আশ সেওড়া আকীর্ণ উঁচু টিবিতে বসে বংশী বাজাচ্ছিল রাজা । একটা অশরীরী অনুভূতিতে সে চমকে উঠল ছেউটির হাসির কিস্কিনী শুনে ।

বাঁশী থামিয়ে, কয়েক মুহূর্ত লাগল রাজার ছেউটিকে আবিষ্কার করতে । বাঁশীর সুরের মধ্যে লুকিয়ে থাকা নানান বিশ্বরহস্য যে ছদ্মবেশে ফুটে ওঠে তারই কোন অলৌকিক ঘটনা ঘটল কি না, চকিতে একবার সে সন্দেহও উঁকি মেরে গেল রাজার মনে ।

জলের ধারে, কোল আঁধারে ছায়া দেখে রাজা বলল, ‘কে ?’

ছেউটি জবাব দিল না । তার লাল কলসীর মুখ ডুবিয়ে জোয়ারের জল ঢুকতে ঢুকতে শব্দ উঠল, ডুব্ ডুব্ ডুব্ । তারপর কেওরা মেয়েদের প্রিয়, দক্ষিণের শোলাঘাটের ধমকি বুড়ি চুড়িওয়ালীর; কাচের চুড়ি বেজে উঠল ঠুন্ ঠুন্ করে ।

রাজার মনে হল, কেওরাপাড়ার ঘাটের সেই চিরকালের রূপকথা স্বপ্ন দেখছে বুঝি সে । বলল আবার, ‘কে গো ?’

ছেউটি বলল, ‘ভূত !’

গলায় হাসি ও ঠাট্টার আভাস পেয়ে নেমে এল রাজা তার টিবি থেকে । যদিও অবিশ্বাস্য, তবু এই ঘোর সন্ধ্যায়, ছাড়া চুলে ছেউটি কেন ঘাটে ? বলল, ‘ছেউটি না ?’

ছেউটি বলল, ‘নজর করে দেখে নাও, ঘাড় মটকানী ডাইনী কিনা !’ বলে আবার হাসল ছেউটি ।’

ছেউটিই । গণেশ কেওরার রূপসী মেয়ে, এখন যে চড়া ডাকে আছে । পাড়ার মেয়ে, চলতে ফিরতে অনেকবার দেখাদেখি হয়েছে । যখন হয়েছে হয়ত তখন, ঠিক তখুনি মনের কোথায় যেন খচ্ করে উঠেছে এক আধবার । একবারের বেশি দুবার ফিরে দেখতে হয়েছে । হোঁড়া বুড়ো, সকলেরই অমন হয় । তার বেশি কিছু নয় ।

কিন্তু এ রকম করে দেখা আর কখনো হয়নি । হওয়া উচিতও নয় ।

কেওরাপাড়ায় সরকারি জল কল আছে । বাসন মাজা আর ফাল্ভু

জল ছাড়া মেয়েরা কলসী ডোবাতেও বিশেষ আসে না। যদি বা আসে, তবে এমন অসময়ে নয়। অসময় যদি হয়, সঙ্গিনী থাকে। সঙ্গিনী থাকলেও অমন আবাঁধা চুল, আর ছেউটির কোমর ছাপানো চুল, এরকম এলো করে কেউ সন্ধ্যাবেলা আসে না।

মানুষও জীব জানোয়ারের মৃত্যুমঞ্চের আঙ্গিনায় বাস করে বটে, কিন্তু অপদেবতার ভয় আছে সকলেরই। রাজা তাকিয়ে দেখল, ছেউটির ফুলো ফুলো ঠোঁট দুটির কোণে, সংসারের রহস্য কি একটা খেলা খেলছে। জলের অতলে জানা না জানা রহস্যের মত বড় বড় চোখ দুটিতে, কি যেন এক ভাবের খেলা।

রাজা বলল, ‘এমন অসময়ে জল নিতে এয়েছিস্ ছেউটি ?’

ছেউটি বলল, ‘ইচ্ছে হল, তাই।’

রাজা যেন বেআক্কেল হয়ে যায়। ছেউটি যেন কেমন করে কথা বলছে, না ? বলল, ‘তা এমন আঘাটায় এলি, ঘাট থাকতে ?’

ছেউটি কথাও জানে। বলল, ‘যেখানে জল, সেখানেই ঘাট। নিতে পারলেই হল।’

‘হুঁ।’ রাজার মনে হল, তার বাঁশীর সুরের চেয়ে ছেউটির রহস্য কম নয়। কিন্তু বেচা কেওয়ার পণের ডাক চড়ানো মেয়ে, রাজার কাছে এমন করে দাঁড়িয়ে রইল কেন। চলে যাক। না গেলে যে রাজা বোকা হয়ে পড়ছে। ধন্দ লেগে যাচ্ছে তার।

রাজা বলল, ‘হাসছিলি কেন ছেউটি ?’

ছেউটি বলল, ‘তোমার বাঁশীর গান শুনে, কি গান বাজাচ্ছিলে ?’

যেন বিমূঢ় হয়ে রাজা পান্টা জিন্জের করল, ‘কি গান বাজাচ্ছিলুম ?’

ছেউটি বলল, ‘ওই তো, সেই

ও কালা কী জালা তোর বাঁশীতে

সারাদিন রাধা কাদে যমুনান্নি পাড়তে।’

বলল, ‘তাই না ?’

রাজার ধন্দ বাড়তে লাগল। মা চলে যাবার পর, সংসারের একটা কোণ যে একেবারে ফাঁকা, সেটা যেন বড় বেশি করে মনে পড়তে লাগল

তার। বলল, ‘স্বর জানিস্ বুঝি ছেউটি?’

ছেউটি বলল, ‘স্বর জানব আবার কেমন করে? চেনা স্বর, তাই বললুম। পরশুকেও এই গানটা বাজাচ্ছিলে, না?’

রাজা বলল, ‘তুই শুনেছিলি বুঝি?’

ছেউটি বলল ঠোট কুঁচকে, ‘শুনব না? রাত নেই, বিরেত নেই, তোমার বাঁশীর জ্বালাতনে কাজ করবার যো আছে নাকি?’

‘রাগ হয়, না?’

ছেউটি এবার ঢ় কৌচকাল। বলল, ‘হলে কি করবে?’

রাজা বলল, ‘তোমার মন রাখতে দূরে গিয়ে বাজাব।’

‘তবু যদি শুনতে পাই?’

‘আরো দূরে যাব।’

তখন ঠোট উল্টে বলল ছেউটি, ‘তাই যাও। আমার অভ্যাস হয়ে গেছে শুনে শুনে। না বাজালেও আমার মনে হয়, সন্ধ্যাবেলায় বাঁশী বাজছে। তার কি হবে?’

তাও তো বটে। বিশ্বরহস্যের এত অঙ্কি-সন্দি তো ভেবে দেখেনি রাজা। খালি বাঁশীই বাজায়। না বাজালেও ছেউটি শুনতে পাবে, এমন করে তার বাঁশী শোনার কথা তো রাজা জানে না।

রাজার যেন টনক নড়ে গেল। আর, এই বাউগুলো রক্তে একবার টনক নড়লে রক্ষে নেই। মরণের এই অগ্নিলীলা ক্ষেত্রে পোড়া শব্দ প্রাণে আগুন একবার লেগে গেলে, সহজে সে নেভে না।

বলল, ‘তবে তোমার কানের কাছে গে বাজাব ছেউটি।’

ছেউটি তার বড়ফাঁদ কটাসে চোখ ঘুরিয়ে বলল, ‘আহা!’

বলে হাঁসের মত ঘাড় ফিরিয়ে, উঁচু পাড়ের দিকে তাকিয়ে আবার বলল, ‘সর পালাই।’

রাজা তখন কলসীতে হাত দিয়েছে। ভরা কলসী ছেউটির কাঁখাল থেকে নামিয়ে নিল, মাটিতে রাখল রাজা। রেখে ছেউটির হাত টেনে ধরল। ছেউটি হাত টানল, কিন্তু তেমন জোর পেল না। আঁশ সেওড়ার অন্ধকার ঝোপে, কাঁচের চুড়ি ভাঙার শব্দ একটা অশরীর মোহের সঞ্চার করল।

ছেউটি বলল ক্র কুঁচকে, 'এ কেমন ব্যাভার হচ্ছে ?'

রাজা বলল, 'তোর কথার মতন ।'

পাঁচি কেওরানির শক্ত শরীরের বাঁধন, রাজার পুরুষ শরীরে সবল ও পেশল হয়ে উঠেছে। শক্ত হাতে রাজা টানল ছেউটিকে। ছেউটি জোর করতে গিয়ে, রাজার বুকের কাছে এসে পড়ল।

একটু যেন ভয় ভয় সুরে বলল ছেউটি, 'সর, কেউ দেখতে পাবে ।'

রাজা বলল, 'এ সময়ে এ আঘাটায় আসতে তোর সাহসে কুলিয়েছে ছেউটি, আর কোন মামদোও আসতে সাহস করবে না। কিন্তু ছেউটি, আমার বাজান কবে থেকে শুনছিস, বলে যা ।'

ছেউটির গা কাঁপছে না, কেওরানির রক্তে ভয় নেই। বলল, 'অনেক দিন থেকে ।'

রাজা বলল, কিন্তু, 'বেচা কেওরা চড়া পণ হেঁকে বসে আছে যে ?'

ছেউটি পরিষ্কার বলল, 'ভুমিও হাঁক ।'

রাজা বলল, 'ছেউটি, বাঁশী বাজাতে পারি, ওটা আমার মিনি মাগনা। জানের দামে বাজে ওটা। কিন্তু পণ হাঁকব কেমন করে ? দশ বিশটা শুষোর নেই আমার, টাকা কই ?'

ছেউটি বলল, 'তবে আমি কি করব ? বাপকে চেন না ? গলা কেটে নেবে আমার ।'

কিন্তু রাজা বুকের পেষণ আরো শক্ত করে বলল, 'তবে এ আঘাটায় কোন্‌ র্যালা করতে এলি ?'

ছেউটি মুখ তুলে তাকিয়ে দেখল রাজার মুখ। সেই চিরকালের সুর ধরে বলল, 'তা আমি কি জানি ?' বলে হাসতে লাগল।

রাজা বলল, 'তুই কি জানিস মানে ?'

ছেউটি ধমক দিলে এবার। বলল, 'তোমার মুণ্ডু। তোমারই বা অত বাজাবার ঘট। কিসের শুনি ?' বলে কলসী কাঁখে নিয়ে এগিয়ে গেল ছেউটি।

রাজা পিছু নিতে গিয়ে থামল। বোঝা যায় না লোক আছে কি না আশে পাশে। থাকলে দেখতে পাবে। রাজা ডাকল, 'এই ছেউটি ।'

'কি ?'

‘আবার আসিস ।’

‘মরতে ?’ চলে গেল ছেউটি ।

পাঁচি কেওরানির বাতী নিয়ে একদিন শান্তশুর যে গঙ্গা সমুদ্রে গিয়েছিল, সেই গঙ্গাই আজো ছেউটি কেওরানি আর রাজা কেওরার কথা নিয়ে তলে তলে ছুটে গেল দক্ষিণে ।

সেদিন আমি দেখছিলাম আমার চিলেকোঠা থেকে, রাণীর বাজারের আকাশে তখনো একটা তেরছা কালো রক্তমেঘ বাঁকা ঠোঁটের হাসির মত দেখাচ্ছিল । আকাশটা অস্পষ্ট হয়ে এসেছিল । রাণীর বাজারের আকাশজোড়া মহাকালের মুখটা আমি পরিষ্কার দেখতে পাইনি । কিন্তু থ্যাৎলানো রক্ত মাখা ঠোঁটের মত ধমুকাকৃতি বক্রহাসি মেঘ আমি দেখতে পেয়েছিলাম ।

আরো দেখেছিলাম, ছেউটি মরতে এসেছিল আরো অনেকবার, রাজার উঁচু টিবির কোলে । কিন্তু কেওরাপাড়ার টনক নড়ে গেল । কেওরানি জেগে উঠেছে, কপাটে হড়কো দে, সামলা ।

তবে বেচা কেওরা যেমন তেমন লোক নয় । ঘরে নাকি তার টাকা আছে । থাকবার কথা । নোংরা বিষ্ঠা মানে না, শুয়োরদের সঙ্গে শুয়োরের মত থাকে বেচা । লাভের টাকা তার আছে । যুদ্ধের সময়ে কিছু জমিয়েও রেখেছে ।

বেচার টাকা আছে প্রমাণ পত্র সাবুদ আছে তার কানে ও হাতে । কানে আছে সোনার মাকড়ি । মোটা কালো হাতে আছে রূপোর বিছে তাগা । তাগা অর্থে মাছলি, সন্ন্যাসীর দেওয়া কু-নজর থেকে মন্ত্র ওষুধি । বেড়ার ঘর বটে, কেওরাপাড়ার মধ্যে আর কারুর পাকা ইটের মেঝে নেই । একদিনও গায় দেয়নি বটে, কিন্তু চায়না সিক্কের পাঞ্জাবী আছে বেচার । দশ হাত ধুতি আছে তোলা তিন তিনখানি, আর যুদ্ধের সময় এক সাহেবের দেওয়া বুট জুতো এখনো একেবারে নতুন রয়েছ তোলা ।

টাকা কোথায় আছে সে কথা বেচা বলবে না । কিন্তু একশো পঁচিশ টাকা নগদ পণ সে হাতে গুণে দেবে গণেশ কেওরার । দুটো শুয়োর মারবে, বালাম চালের ভাত খাওয়াবে পাড়ার সবাইকে । এর একটাও যদি

কম হয় তবে যেন মেয়ে ভুলে নিয়ে যায় মেয়ের বাপ ঠাকুর্দা। মাথার ওপরে নাকি ভগবান আছেন, বাজে কথা বেচা বলবে না।

তা ছাড়াও বেচার আরো গুণ আছে। নিজের মুখে নিজের গুণ-কীর্তন না করলেও, পাড়ার সবাই সেই গুণের কথা রোজ শুনতে পেয়ে থাকে। বেচা ভাল ঢোলক বাজাতে পারে।

সত্যি বেচা ভাল ঢোলক বাজায়। পাড়ার কোন গানের আসর হলে, দোলের সময় সং বেরুলে, বেচা কেওরা ঢোলক নিয়ে উপস্থিত থাকবেই। তা ছাড়া, রোজ সন্ধ্যাবেলায় তো আছেই। কয়েক পাত্র তাড়ির পর, মনসাতলায় বসে বক্ বক্, নইলে ঘরে বসে ঢোলক পেটানো, এই আছে। সারাদিন তো শুয়োরের খেতমত খেটে খেটেই কাটে।

লোকবলও আছে বেচার। সময় মত তার সঙ্গ পাওয়া গেলে তাড়িটা ফুলুরিটা পাওয়া যায়।

কেওরানি পণ-শুদ্ধা।

সে হিসেবে বেচা আদর্শ।

তাই, ছেউটির সঙ্গে রাজার নামটা শুনেই, পোষা শুয়োর হঠাৎ আক্রান্ত হওয়ার ভয়ে যেমন একটু পিছিয়ে দাঁড়ায়, দাঁড়িয়ে, ভাবলেশ-হীন ছোট ছোট চোখ দুটিতে পাশ কাটাবার ছল্ খোঁজে, ঠিক তেমনি করে বেচা একটা মতলব ঠাওরাল। যদিও কালো রায়ের ভিটে থেকে রাতারাতি শস্তু রায়ের ভিটেয় চলে যাওয়া, গ্রায়তীর্থের দৌহিত্র নকড়ি ঠাকুরের সাক্ষরেদি করা, পুলিশকে ভয় না খাওয়া, সাতদিন হাজত বাস করা, তাও পরের একটা শুয়োর চুরি করে কিংবা মেয়ে, অন্তরকম ছেঁচরামি করে নয়, এই সব মিলিয়ে রাজার একটা ইজ্জৎ আছে পাড়ায়। রাজার শুয়োর নেই, পণ দেবার টাকা নেই, তবু রাজার একটা রাজা-গিরি আছে যেন কোথায়।

সেইটি বেচার ভয়ও বটে, আবার খচ্ খচ্চনিও বটে। এই ইজ্জতে রাজা ওপরে আছে। শুধু বাঁশী নয়, বুক হাত দিয়ে বলুক যত বিয়ের যুগি আইবুড়ি কেওরানিরা ইজ্জতের জন্যেও তারা রাজাকে চায় কি না চায়।

কিন্তু ছেউটি পণ-শুদ্ধা।



তবু বেচা পেঁয়াজ মুড়ি তাড়ি খাইয়ে, একটা পঞ্চায়েত ডাকলে । বিশ্বাস নেই । রাজাকে ডাকা হল । ছেউটির কোন প্রশ্ন নেই সেখানে । কিন্তু সবাই এক বাক্যে ঘোষণা করলে, পাড়ায় ঘরে মেয়েমানুষ নিয়ে বাস । সকলেরই ভালমন্দ নিয়ে চিন্তা করতে হয় । রাজা বাঁশী বাজাতে পারবে না আর ।

বেচা ঢোলকটা নিয়েই বসেছিল । একজন এক একটা কথা বলে বেচা ঠাস করে ঢোলকে চাটি মেরে বলে, ‘হ্যাঁ ।’

রাজা খানিকক্ষণ চুপচাপ শুনলে সকলের কথা ।

গোবিন্দর মা বুড়ি বললে, ‘মিছে বলব না বাবা, আমি এক ছেলের মা, রাড়ি মেয়েমানুষ, ও ছোঁড়ার বাঁশী শুনে কত দিন পাতের ভাতে পা দিয়ে উঠে পড়েছি । অধম্মতো করতে পারিনে । শ্রীকৃষ্ণের মা যশোদা ঠাকরণ বাঁশীর সুর শুনলে খেতেন না । গোবিন্দর মা পারে কেমন করে ? পঞ্চায়েতকে এটা বিবেচনা করতে হবে ।’ যদিও গোবিন্দর মা বাড়ী ভাতে পা দিয়ে উঠে পড়েও রাজাকে কোনোদিন একটি কথাও বলেনি ।

রাজার ছোট ছোট চোখে বাঘের নজর । বলল, ‘গোবিন্দর মাথা খেয়ে বলছ তো ।’

বুড়ি হাউনাই করে উঠল । ঢোলকটা গলায় নিয়েই লাফ দিয়ে উঠল বেচা । চীৎকার করে বলল, ‘বলবে সত্যি কথা তার আবার দিব্যি গালাগালি কিসের ?’

রাজা তাকিয়ে ছিল বেচার দিকেই । নীচু গলাতেই বলল, ‘শোরের মত চেষ্টাসনি বেচা ।’

বেচা লাফিয়ে বেড়িয়ে চীৎকার করে বলল, ‘কি, শুয়োর বললি তুই আমাকে ?’

সবাই একযোগে হাত তুলে চেষ্টিয়ে থামাল বেচাকে । ছেউটির ঠাকুর্দা, অন্ধ বুড়ো মুনি কেওয়ার গলা শোনা গেল, ‘গোবিন্দর মা’র এতদিন বলা উচিত ছিল রাজাকে । জানাতে তো হয় একদিন ।’

ছেউটির বাবা তার আগেই হাঁক দিল, ‘ভুমি থাম ।’ তারপর আরো শোনা গেল, ‘তা ছাড়া বাঁশী বলে কথা । সাপখোপ আসতে পারে ।

পাড়ায় যদি কাউকে সাপে কাটে, তবে তার দায়ী হবে রাজা ?’

‘আর, শাস্ত্রের কথা, বাঁশী শুনলে মানুষের মন উচাটন হয়ে ওঠে । বিশেষ করে মেয়েমানুষের । কলিকালে মানুষ কিছু মানে না, কিন্তু ও যন্ত্রটি তো ভগবানেরই । এখন, যার বাঁশী তার ষোলশো মেয়েমানুষ থাকতে পারে, কারণ সে মানুষ নয় । কিন্তু রাজা মানুষ শুধু নয়, কেওরা ।

সুতরাং পাড়ার মঙ্গলের জন্য, মেয়েমানুষদের রক্ষা করবার জন্য, পঞ্চায়েত সাব্যস্ত করেছে, রাজা বাঁশী বাজাতে পারবে না । এতক্ষণ রাজা এ বিষয়ে একটি কথাও বলেনি । এবার সে মুখ খুলল । বলল, ‘কোন আইনে ?’

‘কোন আইনে মানে ?’

রাজা বলল, ‘কে আইন করে দিলে যে আমি বাজাতে পারব না ।’

বেচা চৈঁচিয়ে উঠল ‘পঞ্চোতের আইনে, হ্যাঁ, পঞ্চোতের আইনে ।’

‘পঞ্চোতের আইন আমি মানতে যাব কেন ? সে আমাকে খাওয়ায় না পরায় ? বাঁশী বাজাব, নিজের মনে বাজাব, তার আবার সভা পঞ্চোতের কি আছে ? বাঁশী আমি বাজাব ।’

বেচা চীৎকার করবার আগেই ঢোলকে চাটি মেরে নিল । বলল, ‘খবরদার, পঞ্চোতের বে-ইজ্জৎ সইব না । পাড়ায় থাকতে গেলে, পঞ্চোতের কথা মানতে হবে । নইলে, পাড়া ছেড়ে চলে যেতে হবে ।’

বেচা তখন রাজার সামনে এসে পড়েছে । মনসাতলায় রীতিমত উদ্বেজনা । বেচাকে সবাই সামলাতে ব্যস্ত । ‘শোন বেচু, ঝগড়া বিবাদ করনিকো বাবা ।’

বেচা তবু চীৎকার করে, রাজার মুখের সামনে এসে বলতে লাগল, ‘চলে যেতে হবে পাড়া থেকে ।’

রাজা দাঁতে দাঁত পিষছে । ছোট ছোট চোখ তার ভাটার মত লাল । বলল, ‘কি করবি কি ? বাঁশীও বাজাব, পাড়ায়ও থাকব, কার কি মুরোদ আছে, করবি আয় ।’

বেচার তাড়ির ঝোঁক ছিলই । এবার স-কার ব-কারে চলে এল । বলল, ‘বেজন্মা, তুই পাঁচি কেওরানির রক্ত গরম দেখাচ্ছিস ?’

রাজা কোন কথা না বলে আগে বেচার গালে একটা খাম্বর কষালে,  
'শালা, আমার জন্মো দেখাতে এয়েছ ?'

যারা সামলাতে ব্যস্ত ছিল, তারা ভয়ে সরে গেল। কারণ, বেচার মূর্তি ভয়ংকর হয়ে উঠেছে। সেও পিছিয়ে গিয়ে ঢোলকটা ছুঁড়ে ফেলে দিয়েছে গলা থেকে। চারিদিক থেকে আটকে পড়া শ্যুরটার মত বিশাল কালো শরীরটা নিয়ে সে এক পা এক পা করে এগুতে লাগল রাজার দিকে। এবার আর চেষ্টা নেই, চিবিয়ে চিবিয়ে বলল সে ক্রুর চাপা গলায়, 'ও এত বাড় তোর ? ছেউটিকে পাওয়ার নোলা তোর এতখানি বেড়েছে ? ছেউটিকে চাস্ তুই ? আমার গায়ে হাত তুললি তুই ? বেচা কেওরার গায়ে হাত তুললি তুই ?'

রাজা অনড়। শিকারীর মতই খ্যাপা শ্যুরটাকে দেখছে সে।

যারা সরে গিয়েছে, তারা তখনো চীৎকার করতে লাগল, 'বেচা, চলে আয়। একটা খুনোখুনি হয়ে যাবে।'

মেয়েদের মধ্যে কে একজন রাজাকে উপলক্ষ করে বলে উঠল, 'তুমি চলে যাও না।'

মেয়েদের মধ্যে ছেউটিও দাঁড়িয়েছিল। ভয় তার করছিল ঠিকই, তবু তার বড় বড় কটাসে চোখ দুটির অতলে একটি চাপা তাত্র কৌতুহল ঝিকিমিকি করছিল।

পণ-শুল্কা কেওরানি মনে মনে বীর্যশুল্কা হয়ে উঠল। স্বাপদ সমাজের সেই আদিক্রপিনী নারী। কিন্তু মানুষ, তাই যার বাঁশী শুনে সে উতলা হয়ে, ভর সঙ্কোচ চুল এলিয়ে অন্ধকার ঘাটে যায়, তারই দিকে তার নজর রইল আটকে।

বেচা হঠাৎ ডাকাতির কুক দেবার মত, চীৎকার করে উঠল, 'তোরা রক্ত দর্শন করব আজ, তবে আমি জন্ম কেওরার ব্যাটা বেচা কেওরা।' বলেই সে হাত চালাল রাজার ওপর। রাজা সরে গেল, বেচার হাত আঘাত করল শূন্যে। বলল, 'পালাবি রে বেজম্মা, পালাতে চাস্ তুই ?'

রাজা এবার চীৎকার করে বলল, 'সরে যা বেচা, মিছিমিছি হাঙামা করিস্নে।'

কিন্তু বেচার এক কথা, রাজার রক্ত দর্শন করবে সে ।

কে যেন চীৎকার করে বলল, ‘থাম্ থাম্ তোরা । পুলিশ টুলিশ আসবে, পাড়া শুদ্ধ ধরে নিয়ে যাবে ।’

বেচা বলল, ‘আসুক । শালাকে ‘ফাইট’ দিতে হবেই ।’

মারামারি নয়, ফাইট । যুদ্ধের সময় থেকে এসব কথা আমদানি হয়েছে কেওরাপাড়ায় । বেচা-রা এখন মারামারিকে ফাইট দেওয়াই বলে ।

বেচা আবার গোঁ গোঁ করে রাজার ওপরে গিয়ে পড়ল । ঢাল সামলাতে না পেরে মাটিতে পড়ে গেল রাজা । যোয়ানদের মধ্যে কে একজন শিস্ দিল । কে একজন চেষ্টিয়ে বলল, ‘লড়কে লাও । মিস্ নাদিয়া ।’

কিন্তু রাজা কিংপ্র, শরীরে তার মাংসের বোঝা নেই । লাফ দিয়ে উঠেই সে, প্রচণ্ড জোরে ঘুষি কষালে বেচার মুখের ওপর ।

সবাই একবাক্যে চীৎকার করে উঠল, ‘গেল গেল ।’

রাজা আবার ঘুষি কষালে বেচার মুখেই ।

বেচা রাত কানার মত ঘুরতে লাগল পাক দিয়ে । তারপর চীৎকার করে উঠল, ‘মেরে ফেললে গো, আমাকে মেরে ফেললে ।’

যেন হঠাৎ সব আগুন নিভে ছাই হয়ে গেল । বেচার নাকে মুখে রক্ত ।

রাজার কানের পিছেও রক্ত লেগেছে । মাটিতে বোধহয় কিছুছিল । আছাড় খেয়ে, কেটে গিয়েছে সেখানে ।

বেচা চীৎকার করতে লাগল, ‘পুলিশ ডাক, পুলিশ ।’

রাজা বলল, ‘তাই নিয়ে আয় । পঞ্চত শুদ্ধ আজ পুলিশে যাব ।’

পঞ্চায়েতের মোড়লরা তখন ফরসা । অল্পবয়সী যোয়ানেরা বলতে গেলে রাজারই পক্ষে চলে গিয়েছে ।

জম্মু কেওড়ার বিধবা বেচার মা চীৎকার করে কাঁদতে লাগল ।

শুধু ছেউটি ঠোঁট উন্টে বলল, ‘মরণ ! মিনসেদের মুখে আগুন ।’  
কাকে যে বলল, বোঝা গেল না ।

পুলিশ অবশ্য ডাকা হল না । পুলিশ ডাকা মানেই কেঁচো খুঁড়তে খুঁড়তে সাপ বেরিয়ে পড়া । পাড়াকে পাড়া শুদ্ধ ধরে নিয়ে যাবে, তারপর কান্নাকাটি শুনে মাথা পিছু এক টাকা নিয়ে ছেড়ে দেবে হয় তো ।

সবাই এসে ঘরে তুলে নিয়ে গেল বেচাকে। রাজা চলে গেল মাঠে।

আমি দেখছিলাম, পৃথিবীর এই আদিমতম সংগ্রাম যখন ঘটছিল, রাণীর বাজারের শুদ্ধ বর্ণদের ভাষায়, ভাগাড় পাড়ায়, তখন সেই আদিম পরিবেশের মধ্যেও যেমন টিম টিমে বিজলী বাতি জ্বলছিল, তার চেয়ে অনেক বেশী জোরালো আলো জ্বলছিল রাণীর বাজারের সভ্যতার আলোক প্রাপ্ত জায়গায়। রাণীর বাজারের আর এক প্রান্তে তখন অনেক আধুনিক যানবাহনের ভিড়। হয় তো তার আকাশের ওপরে উড়ো জাহাজও ছিল। রাণীর বাজারে কলেজ আছে, স্কুল আছে, কারখানায় টন ওজনের টারবাইন মেশিনটা হয়ত সভ্যতার সঙ্গেই পাল্লা দিয়ে মিনিটেপাক খাচ্ছিল সহস্রবার। হয়তো তখন কমার্শিয়াল স্কুলে ছেলেমেয়েরা খট্ খট্ শব্দে টাইপ শিখছে। হয়তো, অঁচল ছেড়ে কোন নাবালক ছেলে ঘরের জানালায় গালে হাত দিয়ে বসে বসে যন্ত্র-অভিযানের স্বপ্ন দেখছিল।

হয়তো তখন রাণীর বাজারের বাঙ্গালী শিল্পপতির লেফট্ হ্যাণ্ড হুইল ফোর্ডটা কিংবা রাণীর বাজারের স্কচ-চটকলের ম্যানেজারের সেব্রলেট লেটেন্ট মডেলের গাড়িটা রাস্তা অতিক্রম করতে গিয়ে থেমে পড়েছে। রাণীর বাজারের সুবিখ্যাত ‘নগরপিতা’ বিশালস্কন্ধ ষণ্ডটি দাঁড়িয়েছে হয়তো রক্তে। কারণ, মেজাজ তার ভাল নেই। ফোর্ড কিংবা সেব্রলেটের শক্তি জানে না সে গোঁয়ারটা।

এখানে যেমন এই মুখোমুখি, তেমনি আলোকজ্বল সূসভ্য রাণীর বাজারের টুকরো এলাকা দেখে, তার আর এক মুখে, অন্ত্যজদের ওই ভাগাড় পাড়াটাকে মনে মনে অঁকা যায় না সহসা।

এসব আলোরই গুণ। শুধু বিজলী আলোর নয়, আরো অনেক রকম আলোর।

রাণীর বাজার শহর হতে গিয়ে পারেনি, সেই আদিকালের পুরণো নগরীটাই রয়ে গিয়েছে। রাণীর বাজার গ্রাম থাকতে পারেনি, শহরের নীচের ওই অন্ত্যজ পাড়াগুলিতে গ্রামের অবশেষ ঠেকে আছে। শিল্প নগরী হওয়ার সাধ ছিল রাণীর বাজারের উনিশ শতকের শেষ দিকে, কিন্তু কারখানার বিদেশী সাহেব কর্মচারীদের ইমারতের কঁাটাতারের চৌহদ্দি

সরিয়ে সে বস্ত্র-নগরী হয়ে গিয়েছে।

রাণীর বাজারের আশা ছিল, সাথ মেটেনি। সে না পেরেছে ঘরমুখী হয়ে তার শাস্ত্র নিবুম আজিনার গৌরব করতে। না পেরেছে ঘাটের সীমানায় গিয়ে, আধুনিক বিশ্বের সঙ্গে কোলাকুলি করতে। রজকের পা বাঁধা গদ'ভটার বিড়ম্বনা তাই তার পদে পদে। 'ঘরেও নহে পারেও নহে, যে জন আছে মাঝখানে' আধা খাঁচড়ার এই যন্ত্রণাটা তাই রাণীর বাজারের ললাটে যুগের লিখন।

তাই, কারখানার টেনিস্ লনের হাজার পাওয়ারের বিজলী আলো কেওরাপাড়ার মনসাতলার বটের মাথায় পড়ে, অবাক হয়ে তাকিয়ে দেখে, তার জন্মের অনেক, অনেক আগের পুরাণ বর্ণিত সমাজ এখনো ক্ষয়ে যায়নি। এই রাণীর বাজারেই এখনো সেই প্রাচীনের বীর্যশুঙ্কা নারী। পুরুষেরা লড়ছে স্থাপদ সমাজের মত। মানুষ ও শুয়োর সেখানে পড়ে আছে জড়াজাপাটি করে।

কিন্তু এই আদিমতার নিটুটরূপ এখন আর টিকে থাকে না। যে তন্ত্রধার রাণীর বাজারকে ধীরে ধীরে এই রূপে সৃষ্টি করেছে, তার মতিগতি ভিন্ন।

আমি দেখছিলাম, তলে তলে সে তার নিজের কাজ চালিয়ে যাচ্ছে। কেওরাপাড়ার অন্ধকারে সে তার থাবা বাড়িয়ে দিয়েছে।

আমি দেখছিলাম, আদিম সমাজের বীর্যশুঙ্কাকে সে তার কালের প্রভাবে পণ্যশুঙ্কা করেছে আবার।

তাই পণ্য শুঙ্কা ছেউটির বিয়ে হয়ে গেল বেচার সঙ্গেই।

সহজ কথা নয়, বেচা কেওরার বিয়ে। এগারটা শুয়োর আছে যার, বাচ্চা বিক্রী করেও। তিনখানা দশহাত ধুতি, একটা চায়না 'সিলিকেরের' পাঞ্জাবি, বুট জুতো আছে যার। একশো পঁচিশ টাকা নগদ গুনে দিয়েছে যে মেয়ের বাপের হাতে, দশজনের সামনে। কাগজের টাকা থেকে আনি দুয়ানি ডবলপয়সা সব রকম ছিল তাতে। গণেশ কেওরাকে কৌচড় পেতে নিতে হয়েছে।

শুধু তাই নয়, কথামত আধমণ বালাম চালের ভাত রান্না হল।

বেচার এনে দেওয়া পান মুখে দিয়ে, পাড়ার কেওরানিরাই সে ভাত রান্না করল। মাংসটা রান্না করল অবশ্য পুরুষেরা। আগের দিন রাত্রেই একটি মাঝারি নখর শুয়োরকে মেরে, গরম জলে ওপর ওপর চামড়া নরম করে রাখা হয়েছিল। গঙ্গার ধারে বসে, ছুরি দিয়ে যখন চাঁছা হল, মনে হল ছুখের মত শাদা। শুয়োরের লোমগুলি অবশ্য বেচার মা কাউকে দিল না। ‘মিনিপার্লির’ নর্দমা সাফ করা মেথরটাকে, কিংবা সাহেববাড়ির ঝাড়ুদারটারকে বিক্রী করবে। শুয়োরের লোম দিয়ে ভাল নর্দমা শাফ-করা বুরুশ তৈরী হয়।

তা ছাড়া, বেচার ঢোলক তো ছিলই। তার ওপরেও এসেছে বেদো ডোম তার ঢাক নিয়ে, যেটা পৌরসভার কোন উদ্দেশ্য নিয়ে, ঢোল শহরতের সময়, এক টাকা রোজে বেদো বাজিয়ে থাকে রাণীর বাজারের সদর অন্দরের রাস্তায়। বাবুদের শিখিয়ে দেওয়া কথা সে নিজেই ঢাক পিটিয়ে বলে, ‘আমাগি ( আগামী ? ) কাল থেকে, শ’ক্কের রাস্তাঘাটে যদি কারুর পোষা কুকুর গলায় বেল্ ছাড়া বেরয়, তবে সে মরতে পারে, তাতে কেউ দাবী হবে না। আপত্য হবে না।’ ডুম্ ডুম্ ডুম্।

সেই বেদো ডোম এসেছে তার ঢোল নিয়ে। সঙ্গে ছেলে এসেছে কাঁশী নিয়ে। ঢোলক কাঁশীর শব্দে কেওরাপাড়া রীতিমত জমজমাট। অবিশিষ্ট, পয়সা দিয়ে নয়। বেদোর আজ সপরিবারে আহারের বন্দোবস্ত হয়েছে।

বেচার পায়ে তো তাল লেগেই আছে। চলায় ফেরায় তার নাচেরই তাল। অনেকেরই পায়ে তাল লেগে গিয়েছে, কেননা, বেচার হাত দরাজ। সকাল থেকেই তাড়ির ভাড় খোলা হয়েছে।

কেওরাপাড়ার সকলেই নিমন্ত্রিত, রাজা ছাড়া। তার পাস্তা নেই।

এটা অবশ্য সকলের মনঃপুত হয়নি। শত হলেও একটা আনন্দের দিন।

ছেউটিকে দেখলে অবশ্য কিছু বোঝার উপায় নেই যে, রাজার জন্তে তার মন পুড়ছে বা বিরহে মুখ ভার করে আছে। গলায় তার রূপোর বিছে হার। হাতে রূপোর চুড়ি, কানে রোল্‌গোল্ডের ( ওতো বাপু সোনাই। ) দুল পরেছে। গন্ধ ‘সাবাং’ দিয়ে চান করেছে। কটা কটা মুখখানিতে আজ মেখেছে হিমালি সিনো। তাতে তার পান পাতার মত

মুখখানির লাবণ্যে শাস্ত্র স্থলক্ষণের চন্দ্রাভা লেগেছে। দেহেও যেন সূর্যছটা। ঝালর দেওয়া সায়া ও কুঁচি দেওয়া হাতা লাল ‘বেলাউজের’ ওপরে মিলের সবুজ শাড়ি পরেছে। গন্ধ তেল মেখে, চুল অঁচড়ে, খোপা বেঁধেছে অঁট করে। খোপায় বিষ্ণুপুরী কাঠের কালো চিরুণী গুঁজেছে। আরো গুঁজেছে কুঁচফলের মত লাল বড় পুঁতির কাঁটা। খোঁপাটা তো একটুখানি নয়। তাকে সামলে রাখতে হয় নানান গোঁজা দিয়ে।

কাজল টানা কটাসে চোখ ছেউটির একটু লালচে। লালচে পেঁয়াজের খোসার মত চকচকে। শোনে না, মেয়ে বউয়েরা ধরে গিলিয়ে দিয়েছে। ছেউটি হেসে কূল পাচ্ছে না। মাঝে মাঝে হেসে গড়িয়ে পড়তে ইচ্ছে করছে তার। বান্ধবীরা সঙ্গ ছাড়ছে না দু’তিনজন। বিশেষ করে পানার বউ মুকি। কানে কানে এক একটা কথা বলছে, আর হেসে গড়িয়ে পড়ছে ছেউটি। অঁচল খসে খসে পড়ছে, নিজের জামা নিজেই টানছে থেকে থেকে। মুকি ধমকে উঠছে, ‘এই ছুঁড়ি, নেশা হয়েছে তোর।’ শুনে ছেউটি আরো হাসে খিলখিলিয়ে। মুকি মাঝে মাঝে জড়িয়ে ধরে চুমু খাচ্ছে ছেউটিকে। ছেউটি হাসতে হাসতেই থেপে গিয়ে দমাদম কিল মারছে মুকির পিঠে।

পণ-শুল্কা ছেউটি আজ কেওরাপাড়ার রাণী।

রাণী অনেকদিন থেকেই। ভক্তবৃন্দের নানান উপহারের উপাচার তাকে নিবেদন করা হয়েছে। ছেউটি তা গ্রহণ করেনি। তার চেয়ে বেচা কেওরার আয়োজন অনেক বেশী ছিল।

রাজার কথা ভাববার অবকাশ কোথায় ছেউটির? সত্তর বছরের ছেউটি। কেওরাপাড়ায় আজ তাকে কেন্দ্র করে যে উৎসবের আয়োজন, তার মধ্যে হারিয়ে গিয়েছে সে। সে খুশি, খুবই খুশি। মাতালের মত নয়, মাতাল-ই হয়ে গিয়েছে সে।

রাত্রে হাজাক জ্বলল। বেচা জামা কাপড় পরে সাজলে। কেওরাদের বামুন এল। মন্ত্র পড়া হল, হয়ে গেল বিয়ে।

গজ্ঞার ধারে হরিধ্বনি শোনা গেল। চিতা জ্বলল যেন তার। বিবাহ ও মৃত্যুর হিসেব কষতে লাগল যেন কোন মাতাল বুড়ি।



বেদো যতক্ষণ পারলে ঢোল বাজালে। ছেলেটা যতক্ষণ পারলে বাপের সঙ্গে কাঁই নাই করলে। তারপর এক সময়ে শুয়ে পড়ল মাটিতে মুখ দিয়ে।

রাজা বাঁশী বাজালে না। কিন্তু সেই আঁশ সেওড়া আকীর্ণ উচু ঢিবিতে বসে, নন্দ হাড়ীর মত সেও তাকিয়ে রইল দূর গঙ্গার বুকে। পশ্চিমা ব্যাপারীদের খুটনী নৌকার আকাশ ঢাকা পালগুলির বাতাস লাগছে তার গায়ে। যে দেশে ছেউটি নেই সেই দেশের মাটি তাকে ডাকছে।

কিন্তু রাজা কোথাও যেতে পারলে না। ছেউটির হাসি তাকে বেঁধে রাখলে। ছেউটি তার ঘরের কোণে এসে হেসে যায়। চোখে চোখ দিয়ে, অদৃশ্য বন্ধনে রেখে যায় বেঁধে।

ছেউটি এখন ছেউটি নয়, বেচার কেওরানি। তবু হাতছানিটা রয়ে গেল অন্ধকারে। রাজা কেওরা কোথাও যেতে পারলে না।

পারলে না, তার কারণ, ছেউটিকে উত্তরে দেখে রাজা দক্ষিণে মুখ ফেরালে, ছেউটি দক্ষিণে পাক খেয়ে যায়। তবু রাজার চোখের উপর দিয়ে যায়। রাজার বুকে চির আগুনকে জ্বালিয়ে রাখতে চায় ছেউটি যেন। যে দিন ছেউটি থাকবে না, গঙ্গায় চিতা সাজিয়ে ওকে পোড়ানো হবে, সেইদিনেও রাজার বুকে ছেউটির আগুন জ্বলতে থাকবে গন্গন করে।

ছ'দিন রাজা বাঁশী বাজায়নি। ছেউটির বিয়ের দিন, আর তার পরের দিন। কিন্তু ছেউটির জন্ম বাঁশী নয়, বাঁশা তার অনেক আগের।

বাঁশীর জন্মে ছেউটি এসেছিল, তাই বাঁশী যখন বাজে তখন ছেউটিও থাকে সুরের মধ্যে। কিন্তু বাঁশী ঠিকই বাজায় রাজা। বেচা কেওরার প্রাণ তাতে যতই জ্বলুক। যদিও অনেকখানি এখন নিশ্চিন্ত বেচা, কিন্তু সেই আক্রান্ত শুয়োরের নজরটা তার চোখ থেকে গেল না আর।

বছর কাটাবার আগেই, ছেউটি হারিয়ে গেল কেওরাপাড়া থেকে।

কোথায় গেল ?

কেউ জানে না।

বেচা কেওরা শুয়োর মারা লাঠিটা নিয়ে গিয়ে, চড়াও হল ছেউটির

বাবা গণেশ কেওরার ভিটেয়। হয় মেয়ে বার কর, নয় গণের টাকা দাও ফিরিয়ে।

গণেশ কেওরাও লাঠি ধরলে। আর সকলের সামনে কাছা ঝাড়া দিয়ে দেখিয়ে বললে, মেয়ে তার কাছায় বাঁধা নেই।

রাজার কাছে কেউ ছেউটিকে খুঁজতে এল না। কারণ রাজাও সকলের সঙ্গে হা করে তাকিরে রইল। কোথায় গেল ছেউটি ?

ঘটনা নতুন নয়, কেওরাপাড়া থেকে যুবতী মেয়ে এর আগেও অনেকবার হারিয়ে গিয়েছে। কখনো খোঁজ পাওয়া গিয়েছে, কখনো পাওয়া যায়নি।

শুধু কেওরাপাড়া থেকে কেন ? খাস দ্বিজপাড়া থেকেই এক ঠাকুরের মেয়ে একবার নির্যাস গুম হয়ে গিয়েছিল না ? কালে কালে তো তারপরে কত মেয়েই হারিয়ে গেল, আর তারা যুবতীও বটে। প্রথম যে মেয়েটি হারিয়ে গিয়েছিল, পনের বছর বাদে সে একবার ফিরে এসেছিল দ্বিজপাড়ায়। এখনো বুড়োবুড়িরা বোধহয় সে কথা ভুলে যায়নি। একদিন তারা দেখল দ্বিজপাড়ার রাস্তায় এক কাবুলী আর তার বোরখাহীনা বিবি। যদিও বিবির বয়স ত্রিশের উর্ধ্বে, তবু যৌবন যেন তার অটুট। ফর্সা লাল রং, কালো কুচকুচে চোখে তার সুরমা টানা। পোষাক তার কাবুলী গিল্লিরই, গায়ে হিংএর গন্ধ। সঙ্গে তার চোদ্দ বছরের লম্বায় চওড়ায় দশাশয়ী কাবুলি ছেলে।

বিবি চারিদিকে তাকাতে লাগল। কি যেন খুঁজছে সে। ছোট ছোট ছেলেমেয়েরা তাদের ঘিরলে। এক বুড়ি এসে দাঁড়াল যখন চোখ কুঁচকে কোঁড়ুল বশে, তখন বিবি তার রাস্তা ঠোঁটে হেসে জিজ্ঞেস করল, 'গাঙ্গুলী বাড়ির বটঠাকমা না তুমি ?'

গাঙ্গুলিবাড়ির বটঠাকমা, চোখ ভুলে অবাক হয়ে জিজ্ঞেস করল, 'কে বাছা তুমি ?'

বিবি বলল, 'আমাকে চিনতে পারলে না ? আমি পদ্ম গো।'

কথার উচ্চারণে একটু রকম ফের হলেও, বাংলা দেশের সুর বেজে উঠল বিবির গলার। বটঠাকমার চোখ খাবলার মত অপলক হয়ে গেল।

রুদ্ধশ্বাসে জিজ্ঞেস করলে, ‘কোন পদ্ম ?’

বিবি বললে, ‘তোমাদেরই পাড়ার, মানুষ চাটুষ্যের মেয়ে—’

আর বলতে হয়নি। বটঠাকুরা একটা চীৎকার দিয়ে সেখানেই বসে পড়েছিল, ‘ও মা মানুষের মেয়ে পদ্ম তুই ?’

দেখতে দেখতে পাড়ার লোক জমল। যেন চিড়িয়াখানার জীব দেখতে ছুটে এল সব।

কিন্তু পদ্ম যে জন্ম এসেছিল, তার কিছুই নেই। বাপের ভিটে নেই, দ্বিজপাড়ায় একটা চমক দিয়ে, সোরগোল তুলে পদ্ম তার কাবুলি বর ও ছেলের সঙ্গে চলে গিয়েছিল আবার।

রাণীর বাজারের কালের কপোলে পদ্মর চিহ্ন কবেই মুছে গিয়েছে। মানুষ চাটুষ্যের ঘর থেকে মেয়েটা খেতে না পেয়ে পালিয়েছিল কিংবা কাবুলির প্রেমে পড়ে পালিয়েছিল, সেটা এখন গবেষণার বিষয়। কখনো কখনো হয় তো কোন বাড়িতে হঠাৎ পাড়ার পুরণো বিষয় আলোচনা হয়। তখন শোনা যায়, ‘ওমা গো, আমি স্বচক্ষে দেখেছিলুম পদ্মকে, এ্যাই বিরাট চেহারা, এই একেবারে এতখানি হাত পায়ের গোছা, টকটকে রং যেন ফেটে পড়ছে। পদ্ম তো নয়, যেন সত্যিকারের কাবুলেনী গো। আহা! কী রূপ! আর ছেলে কী! কার্তিকের মত সুন্দর, এই লম্বা চওড়া চেহারা। চোদ্দ বছরের ছেলে তো নয়, যেন মস্ত বড় মিন্‌সে।’

মানুষের মন। সে যে বড় বিচিত্র। পদ্মর কথা বলতে গেলে, তাই এখন রং-ও চড়ে যায়। পদ্মর রূপ, পদ্মর স্বামী পুত্রের কথায়, দ্বিজপাড়ার আলোচনায় যেন দীর্ঘশ্বাস পড়ে হঠাৎ।

সুদূর কাবুলে হারিয়ে যাবার কাহিনীও আছে এই রাণীর বাজারে। আর দ্বিজপাড়া থেকেই।

কেওরাপাড়ায় হারায় তার চেয়ে অনেক বেশি। ছেউটি তেমনিই হারিয়ে গিয়েছে নিশ্চয়।

কয়েকদিন পর, সন্ধ্যার ঝোঁকে, রাজা তখনো ঘরে। বেরুতে মন চায়, শরীরটা ওঠে না। ছেউটিকে খুঁজতে বেরোবার তার বড় ইচ্ছে। কিন্তু কোথায় গেছে ছেউটি, নিজের ইচ্ছায় গেছে কিনা সে কথা জানে না রাজা।

এবার ঘাটের দিকে পা বাড়াবার সময় এসেছে। দিন এসেছে দূরে ভেলে যাবার। কোথাও গিয়ে যদি দেখা হয়ে যায় নন্দ হাড়ীর সঙ্গে, তবে বড় ভাল হয়। তবু কথা বলার মনের মত মানুষ খুঁজে পাওয়া যাবে একটা।

সেই সন্ধ্যার সময়, কার চিতা যেন জ্বলছিল। গঙ্গার ধারের রাস্তায় বিজলী আলোর চেয়ে চিতার আলো অনেক বেশি দেখাচ্ছিল। মানুষেরা ছায়ার মত ঘুরছিল সেখানে। কুকুরেরা চির বশংবদের মত মাথা এলিয়ে পড়ে ছিল আগুনের দিকে চেয়ে।

রাজার ঘরের সামনে একটা মানুষের ছায়া পড়ল।

ঘরের ভিতর থেকেই রাজা জিজ্ঞেস করল, ‘কে?’

জবাব শোনা গেল, ‘আমি। একটা কথা ছেল।’

রাজা গলার স্বর শুনে অবাক হয়ে উঠে এল কাছে। বেচা কেওরা দাঁড়িয়ে আছে। গলায় তার ঢোলক।

দ্বন্দ্বযুদ্ধের পর এই দুজনের প্রথম মুখোমুখি সাক্ষাৎ।

রাজা বলল, ‘কি চাই?’

বেচা নেশা করেছে, সে বিষয়ে কোন সন্দেহ নেই। চোখ দুটি লাল। আক্রান্ত শুয়োরের মত নয়, কেওরাপাড়ার গঙ্গার ধারে পাঁকে শুয়ে থাকা, চিরবাদী শুয়োরের দৃষ্টি তার চোখে। সবড়ক কুকুরের মত অলস আর নিঝুম ভাব তার।

বলল, ‘তোর কাছে এলুম রাজা।’

‘কেন?’

রাজার দিকে চোখ তুলল বেচা। যেন, ভিক্ষে চাইতে এসেছে। বলল, ‘তোর পিটুলীতলায় বসে, এটুটস ঢোলক বাজাব।’

‘ঢোলক বাজাবি?’

‘হুঁ। ঢোলক বাজাব রাজা তোর কাছে বসে তুই বাঁশী বাজাবি?’

বড় করুণ গলায় বললে বেচা। পায়ে না পড়েও, যেন পায়ে ধরে সাধার মত। রাজা যদি ঘৃণা করে। বলল, ‘তুই এটুটস বাঁশী বাজা রাজা, আমি ঢোলক বাজাব তোর সঙ্গে। বাজাবি?’

রাজা চুপচাপ । কিন্তু তার চোখ আর বেচার উপরে নেই, হারিয়ে গেছে যেন কোন্‌ স্বদূরে । বুকে তার মোচড় লাগছে বড় ।

জবাব না পেয়ে বেচা আবার বলল, ‘একা একা বাজাব । তাই ভাবলুম কার কাছে যাই । তা, মন ঝলল, রাজার কাছে যাই । পাড়ায় আর মানুষ খুঁজে পেলুম না রাজা । তোর সঙ্গে এটুটু বাজাতে দিবি ?’

রাজা বলল, ‘দেব । আয়, বস ।’

রাজা বাঁশী বাজালে । সেই গানটা বাজালে, যে গান শুনতে প্রথম দিন ঘাটে গিয়েছিল ছেউটি । তার সঙ্গে তাল দিয়ে, ঢোলক বাজালে বেচা । এ সুর তারো চেনা । ছেউটিকে গুন্‌গুন্‌ করতে শুনেছে সে ।

কেওরাপাড়ার লোকেরা শুনল রাজা আর বেচা, বাঁশী আর ঢোলক বাজাচ্ছে ।

বাজানো শেষ হয়ে গেল ।

বেচা বলল, ‘ছেউটি চলে গেছে রাজা ।’

রাজা বলল, ‘জানি ।’

‘কোথায় গেছে, জানিস্‌ ?’

‘না ।’

বেচা বলল, ‘মলপোতা পাড়ায় ।’

রাজা চমকে উঠে বললে, ‘কে বললে ?’

‘আমি দেখে এয়েছি ।’

‘দেখে এয়েছিস্‌ ?’

‘হুঁ, কথা বলে এয়েছি । অঘোর ঘোষ, কায়ত পাড়ার অঘোর ঘোষমশাই, সোনার মতন পালঙ্ক দিয়েছে ছেউটিকে । তাতে মস্ত উচু গদী, ধব্‌ধবে বিছানা । আয়না বসানো আলমারী আছে একখান ঘরের মধ্যে, পা থেকে মাথা অবধি দেখা যায় তাতে । বলেছেন নাকি, সোনার গয়না দেবেন, গড়তে গেছে স্মারক বাড়িতে । বাহারি শাড়ি দিয়েছেন, ছেউটি দেখালে । পায়ের জুতো দিয়েছেন ছেউটিকে, আলতা সিনো পাওড়ারের তো কথাই নেই । হাত ভরতি টাকা দিয়েছেন, তাও দেখালে আমাকে ছেউটি । বললে, মাসে মাসে এই এত এত গুলেন

করে টাকা দেবেন !’

আর বুঝি শুনছিল না রাজা । নিশি পাওয়া স্ববিরের মত বসে ছিল সে ।

বেচা বলল, ‘অঘোর ঘোষ মশাইয়ের পণ অনেক চড়া ।’ দশবার জন্মালেও বেচা কেওরা অত পণ দিতে পারবে না । ‘তা ছেউটি আমাকে বললে, ‘বাবুকে বলেছি, তোমার পণের টাকাটা বাবু দিয়ে দেবে বলেছে ।’

পণ-শুল্কা কেওরানি ! নীলামের ডাকের মত যত দাম চড়ে, তত দামে বিকোয় ।

তবে সেটা কেওড়ার পণ নয়, রাণীর বাজারের প্রবৃত্তির পণ । বেচা আবার বললে, ‘তা, মিছে বলব না, ক’দিনেই ছেউটির বড় বাহার খুলেছে । দেখতে ভাল হয়েছে আরো । কেওরাপাড়ায় অনেকদিন বাদে ছেউটির মত এট্টা মেয়ে দেখা গেছিল, থাকল না । সে কথা বললে ছেউটি । আমি যখন জিগেসা করলুম, তা এমন করে চলে এলে ছেউটি ? বললে, কি করব বল । দশদিন শুনতে শুনতে একদিন রা কাড়তে হয় । কতদিন থেকে কত জনে ফুসলোচ্ছে । অমুক বাবু নাকি ছেউটি কেওরানির জগ্ন মরছে, তমুক বাবু পাগল হচ্ছে, তোমার গোটা রাণীর বাজার কপাল চাপড়াচ্ছে ছেউটির জন্তে । সোনাদানায় ঘর ভরিয়ে দিতে চায়, রাণীর মতন স্নখে রাখতে চায়, বাস্কো ভরে টাকা দিতে চায় । তা’পরে শুনলুম, কোন্ দিন তোমার গলা কেটে রেখেই নাকি নে যাবে আমাকে । তা আমি কি করব ? ভাতারের ঘর করা আমার হবে না ।’ বেচা থামতে চায় না । বলেই চলল, ‘ওথেনে রাগারাগি করা চলে না । মেরে আমাকে ঠাণ্ডা করে দেবে । রাগ আমার হয়নিকো । তবে, মিছে বলব না, ছেউটির দিকে চেয়ে আমার ধন্ধ লাগল, এই মেয়ে আমার বউ ছিল ।’

রাজার বলল, ‘বেচা, ও সব কথা আর থাক ।’

বেচা বলল, ‘আর এট্টা বলি । তোকে বলতে হবে রাজা । ছেউটিকে বললুম, পাড়ার জন্তে তোর মন কাঁদে না ছেউটি ? ছেউটি বললে, মন কাঁদলে আর কি করব বল এখন যেতে পারব না । তবে রাগ কর আর যাই কর, বাঁশী শুনতে আমার মন করে ।’

রাজা প্রায় চুপি চুপি বলল, 'বেচা, চুপ করে থাক ।'

'না রাজা, তোকে বলব। ছেউটি বললে, তা যাই বল, 'যদি'ন বেঁচে থাকব, বাঁশী শুনতে আমার মন করবে। কেওরাপাড়ার মনের মতন এট্টা মানুষ ছিল। তা আমি কি করব? তোমরা দশজনে মিলে তাকে মিছিমিছি তাড়ালে, আমিও বাবুর ধানে স্নুখের পায়রা হলুম। আমার অনেক ভাগ্যি, তার ঘর করতে গিয়ে আমাকে বাবুর মেয়েমানুষ হতে হয়নি। তাকে আমি দুঃখ দিয়েছি, সে আমার পরে রাগ করবে। করুক। তা আমি কি জানি?'

রাজার মনে পড়ল সেই প্রথম দিনের কথা। রাজা যখন বলছিল, সে বেচার চেয়ে বেশী কিংবা কম পণ কিছুই দিতে পারবে না। পণ ছাড়া যদি হবে না, তাই রাজা বলেছিল ছেউটিকে, 'তবে আঘাটায় কোন র্যালা করতে এলি ছেউটি?'

শুনে ছেউটি বলেছিল, 'তা আমি কি জানি?'

ছেউটি কি জানে?

সতর বছরের ছেউটির সেই মুখখানি মনে পড়ল রাজার।

বাপ পণ পাক, নিজের স্নুখ হোক, তবু রাজার বাঁশী শুনতে প্রাণ চাইবে আঁশ সেওড়া টিবিতে আসতে ইচ্ছে করবে।

ছেউটি কি জানে?

ছেউটি ধনতান্ত্রিক যুগের সেই চির নায়িকা, যার প্রাণ যেখানেই পড়ে থাকুক, মন কাঁচুক যার জন্মেই, পণের ডাক যত চড়বে, যেখানে চড়বে, তাকে সেখানেই যেতে হবে। কেওরাপাড়ার রূপসী যুবতী তাই রাণীর বাজারের জেগে থাকা চির রাত্রির গ্রাস কবলিত হয়েছে।

ছেউটি হল সেই তাদের দলের মানুষ, জীবন যাদের ভেসে চলার নোঙরহীন দুর্বীর বেগ দিয়েছে, কিন্তু জন্ম ও সমাজ যাদের হাল দেয়নি। সেই চির দুর্ভাগ্যবতী ছেউটি : ঠেকবে, ভাঙবে, চূর্ণবিচূর্ণ হয়ে লুপ্ত হয়ে যাবে এ পৃথিবী থেকে।

রাজা ভাবে কাকে স্মৃণা করবে? কার ওপরে রাগ করবে? চোখের সামনে, গঙ্গার ধারের কোল আঁধারে তার বৃকেপড়া মেয়েটার সেই

অসহায় উক্তিটাই মনে পড়ছে বারে বারে, আমি কি জানি ? সত্যি ছেউটি কি জানে ! সংসারে কত মেয়েই জানে না । শুধু ছেউটি কেন ? সংসারের রীতি তাকে নিয়ে নিষ্ঠুর খেলা খেলছে । সেই খেলার ঘূর্ণিতে পড়ে অসহায় মেয়েটা অসহায় ভাবেই বলছে, ‘আমি কি জানি ?’

একদিন হয় তো জানবে, জেনেও তবু সেদিন আর পাঁচি কেওরানির মত চিরদিনের নারীত্ব তার সাময়িকভাবে বিদ্রোহ করতে পারবে না । যে নিগড়ে সে পড়েছে এক দিন সেই নিগড়ের জালে সে মরবে । আরো অনেককে মৃত্যুর বিষ দিয়ে যাবে ।

তাই ছেউটি স্বৈরিণী নয়, স্বৈচ্ছাচারিণী হওয়ার ক্ষমতা তার নেই । সে রাণীর বাজারের সৃষ্টি, রাণীর বাজারেরই ক্ষুধার গ্রাস হয়ে রইল ।

তাই রাজার শুধু মনে পড়ে তার ঈশ্বরেরই কথা, এতদিন ধরে যারা আমাদের সবাইকে মেরেছে, এখনো মারছে, এবার তাদেরই মরণটাকে ঘনি়ে আনতে হবে ।

কেমন করে ? নকড়ি ঠাকুর অনেক লেখাপড়া জানে, সভা করে, বক্তৃতা দেয়, পুলিশ তাকে ভয় করে । ‘ওদের’ মরণ ঘনি়ে আনার জন্য নকড়ি ঠাকুরের যুদ্ধের রীতিনীতি রাজা জানে না, বোঝে না । দলের সকলের সঙ্গে সে জানবার চেষ্টা করে । ‘ওদের’ মরণ ঘনি়ার যুদ্ধে সে সামিল থাকবে চিরদিন ।

থাকবে, তবু আজ ছেউটিকে ফিরে পাওয়া যায় না ।

বেচা কখন এক সময়ে উঠে গেছে । হয়তো পাড়ার কোথাও কিংবা ঘরে পড়ে আছে নেশা করে ।

রাজা বাইরে এসে দাঁড়াল । গঙ্গার ধারের চিতার আগুন তার গায়ে আলো ফেলল ।

আমি দেখেছিলাম, রাণার বাজারের প্রবৃত্তির রংমহলের রন্ধুগুলি থেকে, লকলকে জিহ্বা ও অপলক চোখ কেওরাপাড়ার দিকে তাকিয়ে আছে । সেদিন আমি রাণীর বাজারের অস্পষ্ট আকাশের গায়ে তেরছা মেঘের অশুভ হাসিটা ভুল দেখিনি, যে দিন রাজা কেওরার কাছে



গিয়েছিল ছেউটি কেওরানি ।

আমি শ্যামতীরের চোখ নিয়ে তীক্ষ্ণ দৃষ্টিতেই লক্ষ্য করে দেখেছিলাম ।  
ছেউটিকে । দেখেছিলাম, তার শাস্ত্রসম্মত সব স্থলক্ষণগুলি ।

এখন ইঁট-চুণ-সুরকির গোলাওয়ালা প্রাইভেট কন্ট্রাক্টর অঘোর ঘোষও দেখছে । প্রতিটি লক্ষণ মিলিয়ে মিলিয়ে দেখছে ছেউটির আর অবাক হয়ে ভাবছে কায়স্থ-কুলতিলক ঘোষ মশাই, এতগুলি স্থলক্ষণ একত্রে তার ঘরেও কোন মেয়ের বুঝি নেই ।

দেখছে, কেওরানি বিশালাক্ষি, বিশ্বোষ্ঠ, স্ন্যকেশিনী, অ-রোমাবৃত পীনবক্ষ ও নাভিদেশ-উরু-জংঘা । স্নেহযুক্ত পদযুগল ছেউটির ভূ-কম্পিত করে না, অনামিকা ও অঙ্গুষ্ঠাঙ্গুলি মাটিতে সম্পূর্ণ চেপেই বসে ।

তবু ছেউটি রাণীর বাজারের অগ্ন্যতম গণিকাগণি মলপোঁতা পাড়ার এক পুরনো ভাড়াটে ঘরে, অঘোর ঘোষের পণ্যাঙ্গনা হয়েছে ।

তবু শাস্ত্র শাস্ত্রই থেকে যাবে । তার স্থলক্ষণ আর কুলক্ষণের যত ব্যাখ্যা থেকে যাবে পাতার পর পাতা জুড়ে । শুধু অভিজ্ঞতার দায় বহন করতে হবে এ যুগের নরনারীকে, তাদের নিজের জীবনের মূল্যে ।

রাণীর বাজারের প্রবৃত্তি গ্রাস করল ছেউটিকে । ছেউটিকে নিয়ে প্রবৃত্তির খেলা, রাণীর বাজারে শুরু হল শুধু ।

অনেক বিশ্বরহস্য দেখলে রাজা ।

রাণীর বাজারও এবার ওকে বিদায় দেবার আয়োজন করলে । শহরের জনসংখ্যার বাড়াবাড়ি, গঙ্গার এপার ওপারের লোক চলাচল বেড়েছে ক্রমেই । তাই, রাণীর বাজারের খেয়াঘাটের নৌকার বদলে, এক রিভার সার্ভিস কোম্পানী এল তার লঞ্চ নিয়ে । এল, মাস্কাতা আমলে সেই নৌকা নিয়ে পারাপারের, দুর্ঘোণে ও বর্ষাকালের জীবন-সংশয়ের অবসান করে । হাতের হাল অনেকদিন জল কেটেছে, এবার কলের হাল জল কাটতে এল রাণীর বাজারে ।

সব নয় যদিও, অনেক মাঝি বেকার হল । কেননা, কলও বিগড়ায় কখনো কখনো । দশ জনের সঙ্গে নয়, শুধু দুটিতে একলা নৌকায়

পারাপারের বাসনা নিয়ে যারা আসে, তাদের জন্তে, আর যে রাতচরারা ঘড়ি ধরে চলে না, কলের হালের সঙ্গে পা মেলাতে পারে না, সন্ধ্যা হয় যাদের রাত বারোটায়, রাণীর বাজারে যাদের শুধু ওপার থেকে নৈশ অভিযানেরই উদ্দেশ্যে যাওয়া আসা, তাদের জন্ত 'রিজার্ভ' রইল নৌকা। সেই রিজার্ভের নৌকার জন্তে রয়ে গেল কয়েকজন মাঝি।

রাণীর বাজারের বৈতরণীর তরী বাওয়া শেষ হল রাজার। কেওয়ার ঘরের ছেলে, মাঝি হতে সে জন্মায়নি। হাতের কাছে ওটা একটি অবলম্বন ছিল।

রাজা এবার পালাতে চাইল রাণীর বাজার থেকে। জীবন তাকে সব দিক দিয়ে, চলে যাবার পথ খুলে দিয়েছে।

কিন্তু জীবনের সব দেওয়াকে, হাত ভরে নেবার মত ক্ষমতা ক'জনের আছে। যে মাটিতে ওর জন্ম, সে মাটির ঋণ শোধ হয়নি। রাণার বাজারের কাছে রাজার অনেক ঋণ। জীবনের অনেক রহস্যকে সে জেনেছে এখানে, তার শোধ দিতে হবে।

তারপর জীবন যদি বা ছাড়ে, মন ছাড়ে না। মনটাকে যে বেঁধে রাখলে, সে সর্বনাশের মত এক মহামায়া। যার কাছে সে মনে মনে অনেক ঋণ করে বসে আছে। না বলে যার তহবিল থেকে সে আপন মনের ভাণ্ডার পূর্ণ করতে চেয়েছে তার দেনা শোধ না করে সে যাবে কেমন করে।

তাই, তরী বাওয়া ছেড়ে রাজা বাঁশীওয়ালা হল। নকড়িও সেই কথাই বলেছে। জীবিকার জন্তে রাজা বাঁশীওয়ালা হোক। সংসারে তো মানুষ কত কি করে। একটা পেট রাজা চালাতে পারবে যেমন তেমন করে।

নিজের হাতে বাঁশী তৈরী করে, ঝুলি নিয়ে একদিন বেরিয়ে পড়ল রাজা। পুরনো একটি খাকি ফুল প্যাণ্ট, তার ওপরে একটি সার্ট, আর কাঁধে বাঁশীর ঝুলি।

তা ছাড়া নকড়ির কঠিন নির্দেশ আছে, বর্ণ পরিচয় শেষ করলেই হবে না, রাজাকে প্রথম ভাগ শেষ করতে হবে তাড়াতাড়ি। কোটি

কোটি ভাগ আছে। রাজাকে উঠতে হবে ধাপে ধাপে।

ওইটি রাজার নিত্যকর্ম-পদ্ধতি। রাত্রে সে ভাত খায়। নিজের হাতে উনুন ধরিয়ে, ভাত বসিয়ে সে বই নিয়ে বসে। পড়ে, অজ, আম, অজর, অমর।

কেওরাপাড়ার পিটুলীতলার ভিটেয়, চুপি চুপি বুঝি সরস্বতী ঠাকরুণ এসে দাঁড়িয়ে থাকেন। তিনি হাসবেন না কাঁদবেন, ভেবে পান না। এ যুগটা কী সর্বনেশে। তাঁর সুউচ্চ টাট থেকে, কোথায় নামিয়েছে তাঁকে। এ যুগ তাঁকে কোথাও নিয়ে যেতে ছাড়বে না, কোন মানুষ বাদ থাকবে না তাঁর সাধনায়।

বেচা আসে মাঝে মাঝে। ছেউটির খবর বলতেই আসে। রাজা শুনতে না চেয়েও শোনে। শোনে, রাণীর বাজারের তলে তলে, প্রবৃত্তির অনেক খেলা শুরু হয়েছে। ছেউটিকে তারা একলা ভোগ করতে দেবে না অঘোর ঘোষকে। ঘোষের বাসর ছেড়ে ছেউটিকে নিয়ে টানাটানি চলছে বারোবাসরে।

ঘোষ পুলিশ ডেকেছিল। কিন্তু রাণীর বাজারের পুলিশ সাত বোঝে না, পাঁচ বোঝে না। যে যত বেশি হাত ভরে দিতে পারে, তাঁরই পানসি ভাসে। ঘোষের পক্ষে এখনো পুলিশেরা।

বারোবাসরের বাড়িউলিরা অনবরত চর পাঠাচ্ছে ছেউটির কাছে। গোটা রাণীর বাজারের রংমহল যার পায়ে পড়তে চায়, ঘোষের পায়ে পড়ে আছে কেন সে?

বাড়িউলিদের মধ্যেও রেষারেষি। যে ছেউটিকে আনতে পারবে, তারই বারোবাসর আর একবার নতুন জমে উঠবে। দেহ-পণ্যের বাজারে এই হিসেবটাই চলে।

বিচিত্র এই, রাণীর বাজারের চির-জাগ্রত রাত্রির আসরে রাণীর ঐতিহ্য মরে না কখনো। একজন করে রাণী নাম ধারিণী কোথাও না কোথাও থাকে। না থাকলেও, নবাগতা কোন বিশেষ মেয়েকে রাণী বলেই চালিয়ে নেয় তারা। ছেউটির সম্পর্কেও শোনা গেল, রাণীর বাজারের আর এক রাণীর আবির্ভাব হয়েছে।

শুধু, বেওয়ারিশ শবে যতক্ষণ পর্যন্ত শকুনের পাল না পড়ে, ততক্ষণ যেমন তার শব অভিষেক হয় না, তেমনি ছেউটি এখনো রাণী হিসাবে অতির্ষিক্ত হয়নি।

বাড়িউলিদের পোষা গুগুরা মারামারিও করলে তাদের আড্ডায়। চণ্ড-চরসের নেশায় বৃন্দ স্তব্ধ সমুদ্রে ‘ছেউটি’ নামের বুড়বুড়ি কাটিছে। বে-আইনি চোলাইয়ের গাঁজলা রসেও উপছে পড়ছে ছেউটির নাম।

রাণীর বাজারের প্রতিদিনের জীবনে, যে রাত্রি জাগে, সেটাও তার প্রত্যহের স্বাভাবিকতায় জাগে। কিন্তু তারো নীচে, অনেক নীচে, সুগভীর অন্ধকারে আরো একটি রাণীর বাজার জাগে দিনে রাত্রে। যেমন সর্বক্ষণের বাসস্থানে, মাটির তলের বায়ুহীন গতে, কুণ্ডলী পাকিয়ে জাগে বিষধর সাপ। তাকে সহজে টের পাওয়া যায় না। ভাড়াটে খুনী, ডাকাত, স্মাগলার, দাঙ্গাকারী ব্ল্যাকমেলার, নকলচিদের ভিড় সেখানে।

এই সংক্ষিপ্ততম পৌর এলাকা রাণীর বাজার অপরাধীদের তীর্থস্থল। থানায় গিয়ে, কিংবা সার্কেল ইনস্পেক্টরের অফিসে গিয়ে, যার ইচ্ছে সে দেখে আসতে পারে, মহকুমার মধ্যে থানার সীমানা ঘেরা মাপটা। গ্রাফ পেপারের ঘরে ঘরে, কম্পাস স্কেলের মাপে যেখানে অপরাধের সংখ্যাতত্ত্ব উদ্ঘাটিত হয়েছে লাল রং সঙ্কেতে।

দেখা যাবে, মহকুমার সংক্ষিপ্ততম থানা রাণীর বাজারের ঘেরা চৌহদ্দিতে, লাল বিন্দুর ভিড় সবচেয়ে বেশি। গায়ে গায়ে চাপাচাপি, তরতর করে উঠছে, তিল ধারণের জায়গা নেই, এত অপরাধের সংখ্যা। আশেপাশে থানাগুলির গায়ে এত কলঙ্ক নেই, যত আছে রাণীর বাজারের গায়ে।

সরকারি মতে, রাজনীতিও অপরাধ। তবে সে হিসাবের সংখ্যানুলিখন অগ্ৰত্ব। অফিসের দেয়ালের সংখ্যাতত্ত্ব চার্টে তার হিসাব রাখা নেই।

রাণীর বাজারের হিসেবে কোন অসমতা নেই।

তার বহিস্ৰোঁত আর অন্ত্ৰোঁত, ভাল আর মন্দ, আলো আর অন্ধকার, সবকিছুতেই বজায় রেখেছে ভারসাম্য।

সেই নীচুতলার সুগভীর অন্ধকারে গিয়েও পৌঁছেছে ছেউটির সংবাদ।

রাজা শোনে, রাজার কিছু করণীয় নেই।

বেচা এসে বকর বকর করে শুনিয়ে যায়, ‘আমাকে সব বলে ছেউটি বলে, বুঝতে পারিনে, কি করি। বুঝলি রাজা, বলে, শুনিচি, সে বাঁশী বাজিয়ে বাঁশী ফিরি করে। সকালে দুপুরে সন্ধ্যায়, কত কান পেতে থাকি, একদিনো শুনতে পাইনিকো। না হয়, ছেউটির দরজায় আসবে না, পথ দিয়ে একদিন বাজিয়ে যেতে বলো। তখন শুনলে মন আনচান করত, এখন না শুনলে মন আনচান করে।’

বেচার ক্লাস্তি নেই। নেশার ঘোরে বলেই চলে। রাজা বলে, ‘বাড়ি যা বেচা, ঘুমোগে।’ না, তা হবে না। বেচা বলে, ‘কত, জায়গায় তো যাস্ রাজা। একদিন বাজিয়ে যাস্ ওই রাস্তা দিয়ে। ছেউটি বলে, দুপুরে কত ফিরিয়ালা যায়, কতরকম করে চৌঁচিয়ে চৌঁচিয়ে, পাড়ায় মেয়েরা নানান্ জিনিস কেনে। সে সব আমার কেনার দরকার হয় না। একদিন এট্টা আনাড়ী বাঁশীওয়ালার বাঁশী শুনে ছুটে এয়েছি দরজায়। আ মরণ! আমারই ভুল। সে বাঁশী কি এমনি বাজে? তা’ বাঁশীতে ফুঁ দেবার বড় সাধ হল। বাঁশীয়ালাকে ডেকে, একখানা বাঁশী নিয়ে ফুঁ দিলুম। অনেকদিন বাদে, বাঁশীতে ফুঁ দিয়ে, মনটা আমার খারাপ হয়ে গেল। সেই একজনের বাঁশী—’

রাজাকে চৌঁচিয়ে বলতে হয়, ‘বুইচি বুইচি, তুই এবার যা বেচা।’

সে কথা বেচার কানে গেলে তো! সে বলেই চলে, ‘ছেউটি বললে, এট্টা বাঁশী কিনেই রাখলুম দু’ আনা দিয়ে। রেখে দিয়েছি ঘরে। কে আর বাজাবে? থাকে এমনি পড়ে।’

রাজার চোখের সামনে ভাসে, তার হাত থেকে বাঁশী নিয়ে, ফুঁ দিয়ে ছেউটি স্বর ফোটাবার চেষ্টা করছে।

বেচা চলে যায়। পাঁচি কেওরানির মত রাজাও ভাবে, লোকে বোঝে না।

কোনদিন বোঝে না। এ পৃথিবীতে সবকিছু হচ্ছে, সবকিছু ঘটছে। কিন্তু কেমন করে, লোকে বোঝে না।

বোঝে না বলেই মগন কেওরার, ছেউটির বয়সী বিধবা মেয়ে বিলাসীটা তার পিটুলীতলায় এসে ঘুরঘুর করে। বাপ মাকে ফাঁকি দিয়ে,

রাত্রে এসে, উন্মুনে আগুন ধরিয়ে দেবে, ভাত বসিয়ে দেবে। তারপর দাঁত দিয়ে ঠোঁট চেপে, আড়চোখে চেয়ে হেসে বলবে, ‘ব্যাটাছেলে বুঝি আবার রাঁধতে পারে ?’

রাজার মনে মোহের সঞ্চার করে বিলাসী। রাজা হাঁ করে চেয়ে থাকে। মনে হয়, ছেঁউটি কথা বলছে। সেই বিভ্রান্ত চোখের দিকে চেয়ে বিলাসী হেসে কুল পায় না। হাসির দমকে মেয়েটার শরীরে অকূলের ঢেউ দোলে। রাশ না মানা মেয়ে, একেবারে রাজার কাছে এসে, চোখের দিকে চেয়ে বলে, ‘দেখছ কি ?’

রাজা বলে, ‘তোকে দেখছি।’

‘দেখে কি হয় ?’

বিলাসীরই নিঃশ্বাস গায়ে লেগে সম্মিৎ পায় রাজা। তাড়াতাড়ি বলে, ‘পালা বিলাসী, পাড়ার কেউ দেখলে আবার দুটো মন্দ কথা বলবে।’

বিলাসীর মধ্যেও সেই একই রক্ত। বলে, ‘বলুক, আ-কাম করতে তো আসিনি। জবাব দিচ্ছ না কেন, ব্যাটাছেলে রাঁধতে পারে ?’

‘তবে কে রাঁধবে আমার জন্যে ?’

‘রাঁধার মানুষ একটা ঘরে আনলেই হয়।’

‘মানুষ কোথায় রে ?’

জ্রু কুঁচকে বলে বিলাসী, ‘কেন, ছেঁউটি ছাড়া বুঝি মেয়ে নেই দেশে ?’ বলে বিলাসী দাঁড়ায় না। চলে যায়।

তা’ বটে। রাজা রাগ করতে পারে না বিলাসীর ওপরে। কিন্তু বিলাসী বোঝে না। রাজা দ্বিতীয় ভাগে মনঃসংযোগ করে।

রাণীরবাজারে এখন রাজা বাঁশীওয়ালার বেশ নাম। পাড়ায় পাড়ায় সবাই জানে, রাজা কেওরা জবর বাঁশী বাজায়। রাজা অবাক হয়ে ভাবে, রাণীর বাজারের ছেলেদের মতিগতি কেমন আশ্চর্য রকম বদলে গিয়েছে। জলসা, সভা হলে, তাকে এসে ধরে সবাই বলে, ‘রাজাদা তোমাকে বাঁশী বাজাতে হবে আমাদের জলসায়।’

কেওরাপাড়ার ছেলেকে বলে ওরা দাদা। রাজা বাঁশীওয়ালার ওদের রাজাদা। বাপ মা শুনলে নিশ্চয়ই ওদের কান মলে দেবে।

নকড়ি একদিনতো দরখাস্তই লিখে দিলে রেডিওতে রাজার নামে ।  
রাজা বাঁশী বাজাবে । তারপর একদিন ডাকও এল রাজার । তার  
নাকি পরীক্ষা হবে ।

একলা একলাই গেল রাজা । ঘাড়ে করে মুলিটিও নিয়ে গিয়েছে ।  
গিয়ে চিঠিটা দেখালে সে । সকলেই অবাক হয়ে গেল তাকে দেখে ।  
তারপরে একটা ঘরে বসিয়ে দিয়ে, এক বাবু বললেন, ‘বাজান আপনি ।’

‘বাজান আপনি ?’ খাতির করে তা হলে খুব । ভয়ে আর  
লজ্জায় প্রথমে ফুঁ দিতেই পারে না রাজা । তবু বাজাল । বাজাবার  
পর বাবু বললেন, ‘বাড়ি যান, খবর দেওয়া হবে ।’

কিছুদিন বাদে খবর এল, রাজা ফেল করেছে । মনে মনে  
ভাবল রাজা, তা কখনো হয় ? রাণীর বাজারের লোকেরা ভালবেসে  
খুশি হয় । কলকাতার লোক কেন তা হবে ?

তারপর একদিন রাজা, দুপুরে বাঁশী ফিরি করতে করতে মলপোঁতা  
পাড়ার মোড়ে এসে দাঁড়াল । মন বেশি উথালিপাথালি করলে  
বাঁশীতে ফুঁ দেওয়া যায় না । বুকের মধ্যে যেন হাতুড়ি পিটেতে  
লাগল উদ্বেজনায় ।

তবু রাজা ফুঁ দিল বাঁশীতে । সুর ভুলে হেঁটে গেল মলপোঁতা  
পাড়ার সরু চাপা গলিটার মধ্যে । যেতে যেতে রাস্তা পার হয়ে  
গেল । মলপোঁতা পাড়ার সীমানা শেষ হয়ে গেল । রাত্রি জেগেও  
দিনে যারা ঘুমোতে পারে না, সেইসব মেয়ে দু একজন বসেছিল  
দরজায় । তারা তারিফ করে বললে, বাঃ বাঁশীয়ালা বেশ বাজায় ।

কিন্তু কই, ঝাঁচল লুটিয়ে, চুল এলিয়ে, পড়ি মরি করে কেউ  
তো ছুটে এল না পাগলিনীর মত । আশা ও খুশিতে রুদ্ধভাবে ডাকলে  
না, ‘তুমি ? তাই আমার মন বলল । এ সুর যে আমার চেনা ? এস ।’

কিন্তু কেউ এল না ।

মন চিরকাল আশা করতে ভালবাসে । আবার ফিরল রাজা  
একই পথ ধরে । হয় তো ছেউটি ঘুমিয়ে আছে । বাঁশী তার  
কানে যায়নি । এসেছে যখন, আজ শুনিয়ে যাবে রাজা । সুর

চড়িয়ে, আরো ধীরে ধীরে পথ চলল সে। একটি মেয়ে ডেকে বললে,  
'একদণ্ড দাঁড়িয়ে বাজিয়ে যাও না গো।'

তাই বাজালে রাজা। ছেউটি শুনতে পাবে ভাল করে।  
তারপরে আসবে।

কিন্তু গৎ ফুরলো, ছেউটির সাড়া পাওয়া গেল না। এটা কি  
মলপোঁতা পাড়া নয়? অচেনা পথ তো নয় রাজার। রাণীর  
বাজারের কোন পথই তার অচেনা নয়। রাস্তা ভুল করেনি সে।  
বরং, অগ্গাশ্ব মেয়ে এসে জুটলো ছ' চারটি। কথা তাদের একটু  
বাঁকা, তাদের জীবনেরই মত, তবু খুশি হয়ে বললে, 'কেউ ঠাকুরের  
মত মাইরি। বেড়ে বাজায়।'

কেউ তাকে ধরে রাখতে চায় কি না, নিজেদের মধ্যে হেসে  
হেসে ঢলে ঢলে, সে মস্করাও করলে তারা।

শেষে রাজা জিজ্ঞেসই করলে, 'ছেউটি থাকে না এ পাড়ায়?'  
'ছেউটি? সে আবার কে?'

'কেন, অঘোর ঘোষ মশাইয়ের—'

'ও! অঘোর ঘোষের মেয়েমানুষ? বাবা, বলে, দাংগা হয়ে  
যাবার দাখিল সে ছুঁড়িকে নিয়ে। আজকাল কি আর সেদিন আছে  
যে, পাড়ায় বসে একলা নিজের মেয়েমানুষ নিয়ে থাকবে? তা  
আবার যদি একটু পাত্রে দেবার মত হয়। পাড়া ছেড়ে তাকে  
ঘরে গিয়ে বসতে হবে তবে। ছেউটি চলে গেছে রাণীর গলিতে।  
ঘোষ বৃন্দাবন গুটিয়ে নিয়েছে।'

অনেক কথা লোকে বোঝে না ঠিকই। অনেক মানুষ নিজেও বোঝে  
না। রাজার আজ সেই অবস্থা। ছেউটিকে সে আজ দেখতে চায়।  
নিজের কাছেও এই ব্যাকুল বাসনার কোন কৈফিয়ত নেই রাজার।

তিন বছর বাদে, আজ যেন নিশিতে পেল তাকে। ছেউটির নিশি।  
মাঝে মাঝে মানুষকে এমনি নিশিতে পায়। রাণীর গলিতে এল রাজা।  
রাণী রোড, হালের ত্রৈলোক্য ঘোষ রোডের ওপর থেকে গণিকাদের সরিয়ে,  
রাণী রোডের পিছনে, রাণীর গলিতে আস্তানা হয়েছে। রাণী রোডের



ওপর এখন দোকান পসার । গোটা রাস্তাটাকেই একটি গঞ্জ বলা যায় ।

রাণীর গলিতে অনেকবার এসেছে রাজা । এমন কিছু লুকনো রাস্তা তো নয় । ছুনিয়ার লোককে, বাপ ছেলেকে, স্বামী স্ত্রীকে সবাইকে এ রাস্তায় হামেশা যাতায়াত করতে হয় । রাণীর বাজারের সব রাস্তাতেই রাণীরা আছে ।

রাণীর গলিতে এলেই, রাণীর গলির বাড়ী যাওয়া বোঝায় না । মেয়েরা সবাই এমন কিছু অচেনা নয়, রাজাও তাদের অপরিচিত নয় একেবারে । সেটা এক শহরে বাসের মুখ দেখাদেখি পরিচয় ।

কিন্তু ছেউটি আছে কোন্ বাড়ীতে ?

রাণীর গলি শুধু রাত্রে জাগে না । রাণীর বাজারের সারাদিনের লেনদেনের সঙ্গে, বাইরের মানুষের যাওয়া আসার মধ্যে রাণীর গলি দিনেও জাগে ।

‘কে ছেউটি ?’

নাম জানে না নাকি কেউ ? সবাই এক কথা জিজ্ঞেস করে । রাজা বলল একটি মেয়েকে, ‘মলপৌতা পাড়া থেকে এয়েছে ।’

‘ও ! সেই মেয়ে । তাই তো বলি, ছেউটি আবার কে ? তাকে তো সবাই রাণী বলে ডাকে । ওই তো, সৌরভিবালায় মেয়ে অচলা বাড়িউলির ওখানে ।’ রাজাকে দেখে ঠোঁট উন্টে জিজ্ঞেস করলে মেয়েটি, ‘সেখানে যাবার সখ কেন ? পাস্তা পাবে না ।’ তা না যদি দেয়, ক্ষতি নেই । তবু চিরকালের দোষটুকু তো খণ্ডন হবে রাজার ।

অচলার বাড়ি ঢুকতেই মেয়ে-পুরুষের গলার মন্ত হাসি যেন তাড়া করে এল রাজাকে । বাড়ির বাইরে একটা মাফাতা আমলের ছ্যাকরা মোটর গাড়ি । তাও মাথায় ঢাকনা নেই, বসবার আসনগুলি উঁচু নীচু ছেঁড়া । কবার হাণ্ডেল মারলে চলে কে জানে !

তবু মোটর গাড়ি । তার পাশে আবার একটা পুরনো মোটর সাইকেল ।

হাসির মন্ত কলরবের মধ্যে, ছেউটির গলাটা এসে তীরের মত বঁধল রাজার কানে । তখনো দিন । বেলা তিনটে বুঝি বাজে । তার পরেই ছেউটির তীক্ষ্ণ গলা শোনা গেল, ‘না, আর কিছুতেই পারব না ।’

‘তু’ তিনটি পুরুষ গলা শোনা গেল একসঙ্গে, ‘আর একটু, এক ঢোক ।’  
পরমুহূর্তে বোধ হয় অচলারই গম্ভীর গলা শোনা গেল, ‘বলছে  
পারবে না, জ্বরদস্তি করছ কেন বাপু ? দুকুরবেলা বেহুস হয়ে  
পড়ে থাকবে নাকি ?’

‘তাহলে একটা গান হোক ।’

সমবেত গলার স্বরে, ছেউটির হাসি আবার শোনা গেল । বোকা  
গেল, ছেউটির নেশা হয়েছে । হাসতে হাসতে সে অমানুষিক গলায়  
চীৎকার করতে লাগল, ‘জানিনে, মাইরি জানিনে ।’

‘যা হোক গাইতে হবে ।’

তারপরে কি ঘটল, কে জানে । সবাই একসঙ্গে আবার হেসে উঠল ।  
অচলা বাইরে এল । রাজাকে দেখে বললে, ‘কি চাই গো ?  
এখানে বাঁশী বেচতে এয়েছ ?’

রাজা তখন পালাবে কি না ভাবছে । বলল, ‘না । ছেউটির  
সঙ্গে একবারটি দেখা করতে এ’ছিলুম ।’

‘ছেউটি ? ও, কেন ?’

‘দরকার ছেল ।’

‘এখন তো দেখা হবে না । ঘরে লোক রয়েছে । কি  
দরকার, বলে যাও ।’

রাজা এক মুহূর্ত চুপ করে থেকে বলল, ‘থাক তবে, এমন কিছু সাত-  
তাড়াতাড়ি নেই । পরে এক সময় আসব ।’

রাজা চলে যাচ্ছিল । এমন সময় লোকগুলি হুড়মুড় করে বাইরে  
চলে এল ।

বিদায় নিচ্ছে তারা । যে ছেউটির হাত ধরেছিল, সে বলল, ‘চলি  
তবে এখন, রাত্রে আসব ।’

ছেউটি রীতিমত টলছে । ঘাড় বাঁকিয়ে বলল, ‘আচ্ছা ।’

সবাই একবার রাজাকে দেখল । তারপর বাইরে চলে গেল । যে  
ছেউটির হাত ধরেছিল, সে উঠল মোটর সাইকেলে । বাকীরা মোটরে দেখে  
মনে হয়, লোকগুলি চাকুরে, ব্যবসায়ী, ঠগ্, জোচ্চোর, সবই হতে পারে ।

ছেউটি প্রথমে দেখতে পায়নি রাজাকে। টলতে টলতে ঘরে চলে যাচ্ছিল।

অচলা বলল, ‘এই রাণী, ত্যাখ্ কে তোর সঙ্গে দেখা করতে এসেছে।’

‘আবার কে?’ বিরক্ত গলায় কথাটা বলে, ফিরেই বিদ্যুৎস্পর্শের মত চমকে উঠল যেন ছেউটি। একেবারে সোজা হয়ে গেল। নেশাও কেটে গেল বুঝি। বলল, ‘তুমি?’

রাজার জিভ যেন আড়ফট হয়ে গেছে। যার সঙ্গে সে দেখা করতে এসেছে, তাকে যেন ঠিক চেনে না। ছেউটি কি ঢাঙা হয়েছে আরো? মুখখানি রোগা রোগা লাগছে। চোখ দুটি আরো বড়, কটাসে দৃষ্টি বড় বেশী খরো দেখাচ্ছে। কেওরাপাড়ায় লাভণা হয়তো তেমন ছিল না, তবু স্বাস্থ্যের উদ্ধত দীপ্তি ছিল। এখন ছেউটির সারা গায়ে যৌবন যেন রোখ পাকিয়ে আছে। বড় তীক্ষ্ণ, খরো, কটু হয়ে চোখে লাগছে তার খোঁচা খোঁচা ভাব।

ছেউটি তো এখন আর সেই কেওরাপাড়ার গোপন অভিসারিকাটি নেই। ছুটে কাছে এসে রাজার হাত ধরল সে।

কিন্তু রাজা যে সেই কেওরাপাড়ার ছেলেটাই আছে। ছেউটি এসে সকলের সামনে তার হাত ধরলে, তার পুরনো সঙ্কোচ মাথা চাড়া দিয়ে ওঠে। লোকলজ্জায় চকিত হয় মন। আরো অনেক কিছু হয় মনের মধ্যে, শরীরের মধ্যে, কিন্তু ছেউটি বোধ হয় আজ আর সেসব বোঝে না। তার এই অসঙ্কোচ স্বাভাবিকতায়, রাজার মনে হল, এ সেই ছেউটি নয়।

ছেউটি বলল, ‘এতদিন বলে বলে তবে এলে?’

রাজা হাসবার চেষ্টা করে বলল, ‘এলুম। ভাবলুম, দেখে আসি একবারটি।’ কিন্তু রাজার মন বলছিল, কেন এলাম? এর চেয়ে না আসাই ছিল বুঝি ভাল।

অচলা ছাড়াও আরো দু’তিনজন রাণীর ব্যাপার দেখছিল বাঁশীওয়ালার সঙ্গে। অচলা একটু যেন বিরক্ত ভাবেই বলল, ‘নে রাণী, একটু গা হাত পা ছড়িয়ে শুয়ে নি গে। সারাদিন ধরে বিশ্রাম নেই। সঙ্কোচ হলেই তো আবার সব আসতে আরম্ভ করবে।’

ছেউটি বলল, ‘আমুকগে বাপু। এখন আমি দুটো কথা না বলে

পারবো না।’

বোঝা গেল, এখানে ছেউটির কথার ও ভ্রুকুটীর দাম আছে।

অচলা রাজাকেই চোখে খুঁড়ে চলে গেল।

ছেউটি তখন হাত ধরে টানছে রাজাকে। রাজা তার ঘরের দরজায় এসে বলল, ‘থাক না, তুমি এখন একটু বিশ্রাম কর না হয়।’

ছেউটির দু’চোখে অভিমান ও বিস্ময়। বললে, ‘কি বললে? আমাকে তুমি ‘ভুমি’ করে বলছ?’

ছেউটির চোখের দিকে চেয়ে রাজার যেন অনুশোচনা হল। তবু বলল, ‘তা এখন কি আর—’

‘তা বুঝিচি।’ ছেউটি বলল, ‘এখন আমি বেবুশ্বে হয়ে গেছি, তুমি আমার সঙ্গে সেরকম করে কথা বলতে চাও।’

রাজা বলল, ‘না, তা নয়।’

ছেউটি সে কথা শুনবে না। বললে, ‘জানি, মনে মনে ঘেন্না করছ, রাগ করছ এসব দেখে। তা আমি কি করব, বল?’

ছেউটি কি করবে? কী জানে ছেউটি? রাজা হেসে ফেলল। বলল, ‘না হয় তুই তোকোরিই করছি। কেমন আছিস বল?’

রাজার হাতটি আরো জোর করে ধরে ঘরের মধ্যে নিয়ে গেল ছেউটি বলল, ‘তুমি বাপু অনেক বদলে গেছ। শূনিচি সবই। আজকাল নাকি বই পড়ছ রাত করে, খবরের কাগজ পড়ে শোনাচ্ছ পাড়ার লোকদের। বিলাসী আসে, তুমি ফিরেও তাকাও না।’

রাজা তখন ঘরের দৃশ্য দেখছে। ছেউটির বিছানা পাতা খাট। নীচে ও গদীর ওপর চাদর। ছাইদানিতে অজস্র পোড়া সিগারেট, মদের আর সোড়ার শূণ্য বোতল গড়াগড়ি যাচ্ছে। দেয়ালে সাহেব মেমদের আদর সোহাগের ছবি।

রাজার হাতে ঝাঁকুনি দিয়ে বলল, ‘ওসব দেখতে হবে না। এস, এদিকে এসে বসবে।’

রাজা চোখ ফিরিয়ে তাঁকাল ছেউটির দিকে। কেওরা ছেলের বুকেও যে এমন করে অকারণ কষ্ট লাগে, তা কে জানত। রাজার মনটা যেন

পুড়ছে। আবার বললে, ‘কেমন আছিচ্ছ ছেউটি, বললিনি তো।’

ছেউটি বলল, ‘চোখেই তো দেখলে, কেমন আছি। তা এতবার আসতে বলিচি, আসনি। আজ যে মূনে পড়ল বড়?’

রাজাকে কেমন বোকা বোকা দেখাতে লাগল। হেসে বলল, ‘এসে পড়লুম।’

রাজার ভয় হল, ছেউটি না আবার কাঁদতে বসে। ভাব-সাব ভাল বোধ হচ্ছে না। ঘন হয়ে বসে, রাজার চোখের দিকে তাকিয়ে আছে সে।

রাজা বলল, ‘কি হল রে ছেউটি?’

ছেউটি রাজার হাঁটুতে হাত দিয়ে বললে, ‘না বাপু, তুমি যেন কেমন হয়ে গেছ। এসব আমার পরেই রাগ। তা আমি কি জানি বল?’

রাজা বলল, ‘তোমার পরেই রাগ করে কি হবে বল। শোন ছেউটি আজ যাই, আর একদিন আসব।’

‘ইস্! এখুনি যাবে। রাগ কর, আর যাই কর, এখুনি আমি যেতে দেব না তোমাকে।’

‘শরীরটা নষ্ট করবি। একটু ঘুমো।’

‘তোমাকে ওসব দেখতে হবে না তো।’

‘এই তো দেখলুম, নেশায় টলছিলি।’

‘তুমি কাটিয়ে দিলে যে।’

বলে ছেউটি উঠল। আলমারি খুলে বার করল একটি বাঁশী। কাছে এসে বলল, ‘অনেকদিন থেকে রেখে দিয়েছি তুলে, সেই মলপোঁতা পাড়ায় থাকতে। আমার এই বাঁশীখানি বাজাতে হবে তোমাকে আজ।’

রাজা আপত্তি করল, ‘আজ থাক ছেউটি। বাঁশী অচ্যুদিন এসে বাজাব।’

ছেউটি তা শুনবে না। বললে, ‘পায়ে পড়ি, বাজাও, লোকের কাছে কত মিছে কথা বলি, তোমার সঙ্গে সেই কপটতা করতে পারব না। কতদিন শুনি নি কো। আমার কষ্ট হয়, খালি মনে পড়ে।’

কষ্ট হয় ছেউটির। রাজার বাঁশী শোনার জন্তেই ছেউটির কষ্ট। বাঁশীওয়ালা রাজা, সেটুকু না হয় বাজিয়েই যাবে।

রাজা বাঁশীখানি হাতে নিয়ে দেখে বলল, ‘জ্বলে ভিজিয়ে নিয়ে আয়

ছেউটি । অনেকদিন ধরে রয়েছে, স্বর শুকিয়ে গেছে।’

বাঁশী জলে ভিজিয়ে নিয়ে এল ছেউটি ।

রাজা বলল, ‘কোন গান শুনতে চাস বল ?’

রাজার গলার সুরে যেন শেষ বিদায়ের রাগিনী শুনিয়ে যাবে, আর কোনদিন আসবে না । তাই, ছেউটী যা শুনতে চায়, তাই বাজাবে সে ।

ছেউটী বলল, ‘সেই গানখানি বাজাও,

আজি সখির প্রাণে গোপন অভিসার

দারুণ বিধি গো, আসিল না সে

পরাণ জুড়িয়ে তার ।’

কেন ? আজ এই গান শুনতে চায় কেন ছেউটী । রাজা বলল, ‘এ না. বড় টানপোড়েনের গান ছেউটি, দুঃখের ?’

ছেউটী বলল, ‘সুখের গান তো অনেক শুন, ভাল লাগে না । মিছি-মিছি ঠকানো ঠকানো মনে হয় ।’

রাজা গম্ভীর হয়ে গেল । ছেউটী আবার এসব কথা শিখেছে কেমন করে ? বাজাল রাজা । মন্দ নয় বাঁশীটা । প্রথম প্রথম জালে জড়ানো অম্পষ্ট লাগলো সুর । তারপরে খুলল ।

কয়েকজন ছুটে এল ছেউটির দরজায় । ছেউটীকে তারা অহংকারী বলেই জানে । কিন্তু আজ ছেউটী বলল, ‘এস, বস ঘরে এসে ।’

কয়েকজন বসল ।

রাজা গান শেষ করল । আবার বাজাল ঘুরিয়ে ।

সকলেই স্তব্ধ হয়ে শুনল । শেষ হলে সকলেরই নিশ্বাস পড়ল । অনেকের সঙ্গে ভাব হয়ে গেল রাজার । ইতিমধ্যে অণু মেয়েদের মধ্যেই কে যেন রাজার জগু চা আর জিলিপী আনিয়েছে ।

রাজা খেল । আবার আসার আমন্ত্রণ জানিয়ে চলে গেল অণু মেয়েরা ।

রাজা ছেউটির দিকে ফিরে তাকিয়ে চমকে উঠল । দেয়ালে ঠেস দিয়ে, রাজার ঘাড়ের কাছে ঝুঁকে এসেছে ছেউটি । চোখে তার নেশার আমেজ যেন ।

রাজার ঘাড়ের উপর মুখ রেখে বলল ছেউটি, ‘বিলাসীকে নিয়ে থাক না কেন ?’

রাজা ভ্রু কুঁচকে বলল, ‘সে কৈফিয়ৎ তোকে দিতে হবে বুঝি ? সর এবার, উঠি ।’

‘না ।’

না ? ছেউটির দিকে আবার তাকাল রাজা । ছেউটি হাত বাড়িয়ে রাজার গলা ধরল ।

রাজার এবারকার কন্ঠটা মর্মান্তিক বোধ হল । চিৎকার করে উঠতে ইচ্ছে করল তার । ছেউটি তাকে ভুল করেছে, ভুল বুঝেছে ।

ছেউটি বলল, ‘আজ যেতে দেব নাকো । রাতটা থেকে যাও ।’

সর্বনাশী শুধু বাঁশী শুনতে চায় না । চিরদিন ধরে আগুন জ্বীয়ে রাখতে চায় রাজার প্রাণে । বেঁধে রাখতে চায় চিরকাল ধরে । বলল সে, ‘ছাড় ছেউটি । অমন করিস নে । রাতে তোর কাছে থাকতে পারব না । সেজন্তে তোর কাছে আসিনি ।’

ছেউটির চোখে অসহায় কন্ঠ । ওর দেহের সম্মল ছাড়াও যে রাজার আর কোন প্রতিদানের আশা থাকতে পারে, সেটা ছেউটির অভিজ্ঞতায় বুঝি নেই । তাই রুদ্ধ গলায় বলল রাণীর গলির হালের রাণী, ‘কোনদিন চাওনি আমাকে ? আর চাওনাকো ?’

পাঁচি কেওরানির ছেলে রাজা কেওরা, তারো বুকে এসে কথা আটকে যায় । বুকের কথা আটকানো বাষ্পটাকে জোরে হেসে হেসে উড়িয়ে দিতে চাইল রাজা । দরজার কাছে গিয়ে বলল, ‘চলি রে ।’

ছেউটি বলল, ‘বললে না ?’

‘কি বলব ? ছেউটি, তুই বড় বোকা ।’

‘আর আসবে না ?’

‘আসব ।’

‘কবে ?’

‘যবে বলবি ?’

‘রোজ রোজ ।’

‘রোজ রোজ ?’

‘হ্যাঁ, রোজ, একবার করে ?’

রাজা তাকিয়ে দেখল ছেউটির দিকে। যার দু’ চোখ ভরে রাজার বন্দীদশার কয়েদখানা আঁটা হয়ে আছে। রাতে কোনদিন থাকবে না রাজা, কিন্তু আসতে তাকে হবে।

কেন ? না, মেয়েটা আর কেউ নয়, ছেউটি।

রাজা বলল, ‘রোজ না হোক, আসব। কিন্তু কাদিস তো একদিনো আসব না।’

ছেউটির চোখে বুঝি জল আসছিল। বলল, ‘আচ্ছা।’ বলে ঠোঁটে ঠোঁট চেপে রইল।

রাজা বেরিয়ে এল।

এই আমার রাণীর বাজারের কালের রাখালের আদি বৃত্তান্ত। এখন রোজ ফেঁশনের সামনে এসে দাঁড়ায়। সময় অসময় নেই। যখন প্রাণ চায়।

আমি রাণীর বাজারের সর্বোচ্চ চিলে কোঠায় বসে, ঘুলঘুলি দিয়ে তার সুখ দুঃখ, আলো আঁধার, জীবন মৃত্যু, পাপ পুণ্যের ছবি দেখছি নিরন্তর, আমার সেই ছবির রংএ ও পটে রাজার বাঁশীর সুর একাত্ম হয়ে যায়। ও আমাকে মনে করিয়ে দেয়, যা দেখছি, যা শুনছি, সবই কালের কোঁলে হারিয়ে যাচ্ছে। সকলের মনে থাক্ বা না থাক্, আমি যেন ভুলে না যাই, এসব কিছুই থাকবে না। সবাই তার কালের কাজ শেষ করে যাচ্ছে।

শুধু টের পাইনে, কালের বুকে সকলের সব সুর কেমন করে বেজে ওঠে রাজার বাঁশীতে তার নিজের কথা তাতে কতটুকুনি আছে।

কারণ, রাজাকে দেখেছি, রাণীর গলিতে সে যায় প্রায়ই, ছেউটির সঙ্গে কথা বলে। কিন্তু সে সুরটা রাজা বাজিয়ে ফেরে না।

নিজের জন্ম বাজনোটা একেবারে ছেড়ে দিয়েছে ও।

যেন যুগ যাবে, পার হয়ে যাবে শতাব্দী, তবু রাজা কেওরা পাড়ায় ফিরে যাবার পথে, রাণীর গলিতে যাবে চিরদিন। শুধু সেই সুরটুকুই



বাজবে না কালের রাখালের বাঁশীতে ।

রাজা যেন মহাকালের মত নির্বিকার ।

তাই, সন্ধ্যাবেলা আজও জীবনের খেয়া-পাড়ির শেষ রাগিণী ধরেছে ।  
সৌরভীবালা মৃত্যুর প্রতীক্ষা করছে । রাণীর বাজারের প্রবীণা পণ্যাজ্ঞনা ।

রাণীর বাজারের বিচিত্র ইতিহাসের অনেক কথা যার গলিত মাংসের  
ভাঁজে ভাঁজে লেখা রয়েছে । যে ইতিহাস, পাপ, ধ্বংস ও অপূর্ণ  
বাসনার ইতিহাস ।

আমি দেখছি, লোমচর্ম বৃদ্ধ শ্রায়তীর্থ মৃত্যুর প্রতীক্ষা করছেন ।  
যার সারা গায়ের বলীরেখায় রাণীর বাজারের ধর্ম ও পাণ্ডিত্য, নবদ্বীপ  
ও বারাগসী জয়, ক্ষমা ও কূটবুদ্ধিহীন দান পুণ্যের ইতিহাস রয়েছে  
লেখা । একজন রাণীর গলিতে । একজন দ্বিজপাড়ায় । সবচেয়ে আশ্চর্য,  
সৌরভীবালা আর শ্রায়তীর্থ, উভয়েই সমবয়সী । দুজনেরই নিরানববুই  
বছর বয়স, আর দুজনেই রাণীর বাজারেরই সন্তান ।

সৌরভীবালা তার জীবনে, যুবক নৈয়ায়িককে দেখেছে । আড়াল  
আবডাল থেকে । কিন্তু শ্রায়তীর্থ কোনদিন দেখেননি সৌরভীবালাকে ।

কবে বুঝি একদিন, সমুদ্র বছর আগে, গঙ্গার ঘাটে সৌরভী ঘোমটায়  
মুখ ঢেকে, ভেজা কাপড়ে সর্বাঙ্গ মুড়ে, বাইশ বছরের চণ্ডীচরণকে প্রণাম  
করেছিল মাটিতে কপাল ঠুকে । তবু, কুলটা তার কূট ছলনাকে পারেনি  
জয় করতে । ভরা যৌবনের সিক্ত বসন এলোমেলো হয়েছিল । ঘোমটার  
ফাঁকে, তার কালো চোখের দ্যুতি বেঁধাতে চেয়েছিল নৈয়ায়িকের চোখে ।

চণ্ডীচরণ হাত ভুলে বলেছিলেন, ‘জয়স্ত । সুখী হও মা ।’

সৌরভী ঠোঁট মুচকে হেসে, মনে মনে বলেছিল, ‘মুখপুড়ি ।’

গালাগালটা নিজেকেই দিয়েছিল সে । নিজের ছলনার জন্মও বটে,  
ব্যর্থতার জন্মও বটে ।

সেকথা সৌরভীর মনে থাকতে পারে, শ্রায়তীর্থের নেই । কারণ  
পথে চলতে প্রণাম এবং আশীর্বাদ তার নেওয়া ও দেওয়ার কাজ চলতেই  
থাকে । কাকে চিনে রাখবেন ?

আজ সেই দুজনেরই মৃত্যুর প্রতীক্ষা ।

সৌরভীবালার প্রবৃত্তির ইতিহাস অঙ্কিত গায়ে আজ কাপড় নেই। কোন রকম লজ্জা নিবারণ হয়েছে মাত্র। শতাধিক বছরের পুরনো নীচু বাড়িটার পশ্চিম দিকে, ছোট জানালা দিয়ে আকাশটা আজও কেমন করে মুখ বাড়িয়ে আছে, সেটা বিস্ময়েরই। সৌরভীর দৃষ্টি আছে কিনা বোঝা যাচ্ছে না। তবু, ঘনায়মান সঙ্কার লাল ছোপ ধরা উকি-দেওয়া আকাশটার দিকেই সৌরভীবালার দৃষ্টি স্থির হয়ে আছে।

রাণীর বাজারের বুড়ো ডাক্তারবাবু অভয় চাটুষ্যে এসেছেন। উকিল গগন বসু এসেছেন কাগজপত্র নিয়ে। তাঁদের ডেকে আনা হয়েছে। ডেকে এনেছে সৌরভীর সন্তানেরা। যাদের সে খাতক, ঋণ শোধ করে মরতে হবে তাকে।

অভয় চাটুষ্যে সৌরভীর নাড়ি দেখলেন। একটু যেন অবাক হয়েই বললেন, ‘এখনো তো তেমন অবস্থা দেখছিনে!’

সকলেই ডাক্তারের দিকে তাকাল।

অচলা আর চঞ্চলা, সৌরভীর দুই প্রোঁটা মেয়ে ও এক ছেলে শ্রীনিবাস এসেছে। সৌরভীবালার ঘর ভর্তি।

সৌরভীবালা হাত তুলল। সবাই এক যোগে ঝুঁকে পড়ল তার দিকে।

সৌরভী বলল, মোটা ভাঙা ভাঙা গলায়, ‘শিবি।’

সবাই এক যোগে চোখ তুলল। কোথায় শিবি? শিবানি?

চঞ্চলা বেরিয়ে গেল ঘর থেকে। একটু পরে নিয়ে এল ডেকে শিবানীকে। চঞ্চলার চৌদ্দ বছরের মেয়ে শিবানী, সৌরভীর একমাত্র দৌহিত্রী। চঞ্চলার পঁয়তাল্লিশ বছরের গর্ভজাতা শিবানী।

শিবানীর হাতে পেন্সিল। গায়ে লিনেনের লেসব সানো ফ্রক। ঘাড়ের ছুপাশ দিয়ে লতিয়ে পড়েছে বেগী।

সৌরভী, অচলা, চঞ্চলা, শ্রীনিবাস, সকলেই শ্যামবর্ণ।

শিবানী ফর্সা। রং এখনও কাঁচা সোনার মত, লালিমা লাগেনি বিশেষ, সোনার পাকা রংএর মত। মুখ একটু লম্বা, ভরাট হওয়ার অপেক্ষায় আছে। বড় বড় চোখ, সরল চাউনি। সব মিলিয়ে বুদ্ধি ও স্নাত্তিতে শিবানীর মুখে একটি অপকৃপের ছোঁয়া লেগে রয়েছে। সেকাল

হলে শিবানীর শাড়ী পরবার সময় হয়েছে। এ কালেও তার এই বয়সের সন্ধিক্ষণে, লিনেনের ফ্রকের ওপরে কিশোরী-স্ফুটন চাপা থাকেনি।

শিবানীর চোখে লজ্জা ও বিরক্তি। চঞ্চলাকে জিজ্ঞেস করল, ‘কি করব?’

চঞ্চলা ক্রকুটি করে, রাগ চেপে বলল, ‘দিদিমার কাছে যা, ডাকছে।’

সৌরভীবালা সীমানে গিয়ে দাঁড়াল শিবানী।

সৌরভীবালা অনেকক্ষণ তাকিয়ে রইল শিবানীর দিকে। তারপর হাত ভুলে কাছে ডাকল। শিবানী কাছে গেল। সৌরভী তার গায়ে হাত দিল। ফাস্‌ফ্যাসে গলায় জিজ্ঞেস করল, ‘পড়ছিল?’

‘হ্যাঁ।’

‘মাস্টার এয়েছে পড়াতে?’

‘হ্যাঁ।’

‘গান শিখবি না আজ?’

শিবানী বলল, ‘গানের মাস্টার কাল আসবে।’

‘আর নাচের?’

‘আজ এসেছিল বিকেলে।’

বৃদ্ধ উকীল গগন বসু যেন অবাক হয়ে তাকিয়েছিলেন শিবানীর দিকে। আর গগন বাবুর সেই বিস্মিত চোখের দিকে তাকিয়েছিল শ্রীনিবাস। সৌরভীর ছেলে চিনিবাস খাঁ, রাণী রোডের সবচেয়ে বড় মুদীখানা যার। খালি গা, মস্ত ভুঁড়ি, আপাত নিরীহ ছোট ছোট চোখ দুটি দিয়ে সে যেন আতিপাতি করে খুঁজছে কিছু গগন বাবুর মুখে, আর ঘন ঘন তাকাচ্ছে গগন বাবুর হাতের কাগজ পত্রের দিকে।

সৌরভীবালা তেমনি তাকিয়ে আছে শিবানীর দিকে।

রাণীর বাজারের উচ্চ বালিকা বিদ্যালয়ের অষ্টমশ্রেণীতে পড়ে শিবানী। গানের গলা আছে। সৌরভীবালা শুনেছে সেই গান। নাচ শিখছে শিবানী। সে নাচ সৌরভীবালাদের যুগে ছিল না। একালে যে নাচের মোহিনী শক্তি আরো বেশী।

সৌরভী তার দৌহিত্রীর মধ্যে, আধুনিক সরস্বতীর পরম বিস্ময়

দেখেছে। রাণীর বাজারের প্রাচীনা রাণীর দৌহিত্রীর দৌহিত্রীকে সে দেখছে অবাক হয়ে, রাণীর বাজারের নতুন ইতিহাসের পিপাসিত চোখ ইতিমধ্যেই যার ওপর দৃষ্টিপাত করেছে। সৌরভীবালাও পিছিয়ে নেই, যুগকে ডেকে এনেছে তার দৌহিত্রী। যে দৌহিত্রী দেহ পণ্য করুক বা না করুক, রাণীর বাজারের রাণী রোডের ঐতিহ্য চিরদিন রয়ে গেল।

এইটুকু স্থখ সৌরভীবালার। মরণে তার কোন দুঃখ নেই। চঞ্চলার মেয়ে শিবানী আছে। যে লেখাপড়া, নাচ, গান শিখেছে। যে-রঙ্গিনী হতে পারবে, কিন্তু কলম বাগিয়ে ধরে দলিলের লেখা পড়ে পারবে অর্থোদ্ধার করতে।

রাণীর বাজারের সজ্জন-গৃহস্থ বৃদ্ধ ডাক্তার আর উকীলবাবু তাঁদের ঘোঁষনে যে আকর্ষণ কোনদিন অনুভব করেননি অচলা কিংবা চঞ্চলাকে দেখে, তাঁদেরই আধুনিক বংশধরদের সর্বনাশকে যেন তাঁরা প্রত্যক্ষ করতে লাগলেন কুলটা দৌহিত্রী শিবানীর মধ্যে।

নিশ্চিন্তে মৃত্যুর জন্ম প্রতীক্ষা করতে লাগল সৌরভীবালা। দেহে তার এখনো যন্ত্রণার অনুভূতি ক্ষয় হয়নি। দেবী কেন? মৃত্যু আসুক। অতীতের যে স্বপ্নকে সে দেখছে, নিশ্চিন্তে দেখা হোক।

সৌরভীবালা শুরুর স্বপ্ন দেখছে।

একে একে সবাই ঘর ছেড়ে চলে গেল। সময় হয়নি এখনো।

পশ্চিমের উঁকি দেওয়া আকাশটায় রং ক্রমেই গাঢ় হচ্ছে। আজকের দিন শেষের অতীতে ঢাকা পড়ে যাবে আকাশটা। তার আগে অতীতে ফিরে যেতে চায় সৌরভী। শমন তাকে মনে মনে আলাপের সময় দিয়েছে।

কালের রাখাল সুর ধরেছে ঠিক।

সৌরভীবালা ভাবছিল, শিবানী কার ঔরসজাত?

সৌরভীবালা কার ঔরসজাত?

কোন ব্যক্তি নয়, রাণীর বাজারের প্রবৃত্তির কন্যা তারা। আমরণ যাদের বৈধব্য নেই।

সেই চির-সধবা রাণীর গর্ভে, এই ঘরেই জন্মেছিল সৌরভী। তার সেই মা'কে মনে পড়ছে তার।

এই একতলা নীচু বাড়িটাকে সেদিন খুঁজে বার করতে হত না। এমন করে চারিদিক থেকে পিষে মারার সারবন্দী উঁচু বাড়িগুলি সেদিন ভবিষ্যতের কালে ছিল ঢাকা। গঙ্গার ঘাটে যাবার সদর সড়কের ওপর অনেক গাছ-গাছলির ছায়ায়, আশেপাশে ঢুলে বাগদী পাড়ার সীমানায় এই বাড়ি ছিল সেদিন বাগানবাড়ি।

গোপিকানাথ পালের বাগান বাড়ি। স্বাবর ও অ-স্বাবর সম্পত্তিতে প্রায় শতাব্দীপূর্বে, যে সৎশুভ্র রাণীর বাজারে ছিল প্রায় অদ্বিতীয়।

রাণীর বাজারের সদর দেউড়ি তখন গঙ্গার ঘাটে। গোটা রাণী রোডের স্তব্ধ বাজার তখন গঙ্গার ধারে, এখন যেখানে চটকলের সাহেবদের পাঁচিল ঢাকা খেলার মাঠ আর কুঠি হয়েছে। আজ স্বপ্নের মত মনে হয়। সৌরভীর মনে হয়, সেদিনের ঘটনা। এই ঘরে বসে সেই গঞ্জ দেখা যেত। যে ঘর থেকে আজ গঙ্গার পাড়টুকুও দেখা যায় না।

তখন সেই গঞ্জ ছিল গোটা চাকলার একমাত্র বেচা কেনা লেনদেনের জায়গা। গঞ্জের আকাশ খুঁচিয়ে, গায়ে গায়ে পাশে পাশে দাঁড়িয়ে থাকত নৌকার মাস্তুল। বড় বড় মহাজনী নৌকা থেকে, ভাউলে, পানসী সবারকম ভরতি হয়ে থাকত গঞ্জের ঘাটে। পূর্বের ধান চাল, পশ্চিমের ডাল ঘি গুড় বোঝাই নৌকায় আর বিদেশী মাশুরা ভিড় করে থাকত সব সময়।

রাণীর বাজারের জংশন স্টেশনে তখন সাপের মত আঁকা বাঁকা বার চৌদ্দটা লাইনের জটিলতা ছিল না। একটা লাইন, ছোট একটা ঘর। নদীয়া জেলায় যাবার বড় সড়কের ধার ঘেঁসে ছিল। লোকের আনাগোনা ছিল কম। রাত্রে একটা বাতি জ্বলত টিম্ টিম্ করে। সারাদিন দু’তিন-খানা গাড়ি যাতায়াত করত। পুরনো গঞ্জে তার শব্দটুকুও পৌঁছত না।

রাত্রিবেলা গঞ্জে আলো জ্বলত। গঙ্গার ধার আলায় আলোকময় হয়ে থাকত তখন। সেই বাজারের মালিক ছিল গোপিকানাথ। শুধু ‘তোলা’ ছিল না, নিজেও ছিল বড় মহাজন। মায়ের কাছে শুনেছে সৌরভী, বহরমপুরের এক কাঁসারির ঘরের বোঁ ছিল সে। বয়স তখন বছর আঠার। সেই সময়ে সে এখানে আসে।

রাণীর ভাষায় ‘কি কুক্ষণে পাড়ার মদন মুখুজ্জের চোখে পড়ে গেলুম।

মানুষটা চোখের দিকে তাকালে বুকের মধ্যে কাঁপত, কিন্তু স্থির থাকতে পারতুম না। বারে বারে দেখতে ইচ্ছে করত। একদিন মদন ঠাকুর ইশারা করলে। সে মুহূর্তে ঘর ছাড়লুম। ঘাটে নৌকা ছিল। তখন ঘোর সন্ধ্যা। আষাঢ় মাস। কয়েকদিনের মধ্যেই রথ। নৌকা ভেসে চলল দক্ষিণে, আমিও ভাসলুম ঠাকুরের সঙ্গে। তিনদিন নৌকায় ঠাকুরের সংসার করে, ধীরে ধীরে মাহেশে গিয়ে উঠলুম। প্রকাণ্ড রথ, মস্ত মেলা। মাঝি বিশ্বাসী ছিল। ঠাকুর আমাকে নৌকায় রেখে কোথায় যেন গেল। মাঝরাত্রে ফিরে এল মাতাল হয়ে। সেই আমারও প্রথম মদ খাওয়া, ঠাকুরের পাল্লায় পড়ে। দেখলাম, ঠাকুরের কৌচরে বাঁধা রাশি রাশি টাকা? কোথায় পেল অত টাকা? না, জুয়া খেলে। তার পরদিন ঠাকুর চলে গেল। ফিরে এল প্রথম রাত্রে। তখন ঠাকুরের চেহারা দেখে আমার ভয় করলে লাগল। চোখে তার খুনের নেশা যেন। বলল, এই ললিতা, আয় তো আমার সঙ্গে। বলে তবু সইল না। হাত ধরে হিড় হিড় করে টেনে নিয়ে গেল। কোথায় একটা ঘরে নিয়ে গিয়ে তুলল। গাঁজা মদের ধূম সেখানে। দেখলাম, ঘুঁটা সাজিয়ে জুয়া খেলা হচ্ছে। আমাকে পাশে বসিয়ে, ঠাকুর খেলা আরম্ভ করল আবার। দেখলাম সবাই আমার দিকে তাকাচ্ছে লুভিষ্টির মত। ঠাকুর হারতে লাগল। শেষে, শেষদান চাললে ঠাকুর, চেলে হারলে আর আমাকে একটা লোকের ঘাড়ের উপর ঠেলে ফেলে দিয়ে বললে, নাও। বলে চলে গেল। ঠাকুর আমাকে বউ বলে, শেষ দানে হেরে দিয়ে গেল জুয়াড়ির হাতে। চিৎকার করে কাঁদতে গেলুম। মুখ চেপে ধরলে আমাকে। কাঁসাতে আমার মন মানেনি, বুঁঝ সোনায়ে হাত বাড়িয়েছিলুম। রং আমার ঘুচে গেল, সে রাত্রে তিন বার বিক্রি হয়ে গেলুম। তারপর, কয়েক মাস নানান জনের হাত ফেরত হয়ে, চাঁপদানি-শেওড়াফুলি-চন্দ্রনগর হয়ে এখানে। এখানে আসার এক বছর পরে তুই (সৌরভী) হলি। তারপর পাল মহাজনের চোখে পড়ে গেলুম। পাল প্রথম বাজারেই রেখেছিল আমাকে। আরো দু'চারটে মেয়েমানুষ ছিল। কিন্তু পাল আমাকে কি চোখে দেখলে কে জানে।

তখন পালের বয়স হবে পঁয়ত্রিশ। ঘরে তার দশ বছরের ছেলে।  
পঁচিশ বছরের নাম করা রূপসী পাল-বউ।

পালের বাড়ির খুলো, হাতের ময়লা, সবই নাকি সোনা। শুধু মেয়ে  
মানুষ রাখা নয়, পাল আমার বড়-চাওটা হয়ে গেল। সর্বক্ষণ কাছে  
থাকতে ইচ্ছে, তাই এই বাড়ি করে দিলে। একেবারে লিখে পড়ে  
দিলে আমাকে। 'কায়েত ঘোষবাবুদেরও তখন কৌচা ঝাড়লে সোনা।  
খাঁয়েদেরও মুঠিতে রূপো। দ্বিজপাড়ার চাটুযোরা মস্ত জমিদার।.. কি  
একটা নাম রটে গেল আমার, অমুক পালের (রাণী গোপিকানাথের নাম  
নিত না) মেয়েমানুষের মত মেয়েমানুষ নাকি আর হয় না। পালের  
সঙ্গে রেবারেঘি করে, সবাই কুটনী পাঠালে আমার কাছে, চলে এস।  
আমি পালকে ছেড়ে যাইনি। আর সেই সময়েই, খাঁয়েদের পাড়ায়  
মল পাওয়া গেল মাটির তলায়। তাই মল পৌতা পাড়া নাম হয়ে গেল।

ব্যাপার কি ?

না, নকুড় খাঁ-র গুটি তিনেক মেয়েমানুষ ছিল। তার মধ্যে ছোটটি  
বুঝি নকুড় খাঁয়ের ভাইয়ের সঙ্গে তলে তলে জড়িয়ে পড়েছিল। শোনা  
যায়, নকুড় সেই মেয়েটিকে যে ভাবে মেরেছিল, সে সব কথা রাণীর মত  
মেয়েমানুষেরও মুখে আনতে নেই। এমন কুৎসিত, এমন ভয়ঙ্কর। মেরে  
লাস গুম করে দিয়েছিল। মেয়েটার পায়ের মল খসিয়ে নিয়েছিল। সেই  
মল পুঁতে রেখেছিল মাটিতে। নকুড়ের ভাই লাগল নকুড়ের পেছনে।  
সে-ই খোঁজ খবর করে সব বার করে। পুলিশে টাকা গেল, নকুড়  
ধরা পড়ল না। সেই থেকে পাড়ার নাম হয়ে গেল মলপৌতা পাড়া।'

না, সে ভয় রাণী পায়নি। কারণ সেও গোপিকানাথের অনুরক্ত হয়ে  
পড়েছিল। তারপর একদিন তার কাছে আরো কিছু চাইতে বললে  
গোপিকানাথ রাণীকে। যে মুহূর্তে বললে, সেই মুহূর্তে গোপিকানাথের  
কপালে শমন তার মৃত্যুর দিন ও ক্ষণ লিখে দিলে।

কি চায় রাণী, চেয়ে নিক। 'জমি ?'

'না।'

'নতুন বাড়ি ?'

‘না ।’

‘তবে ? জড়োয়া গহনা ?’

‘না ।’

‘টাকা ?’

‘তাও নয় ।’

যেন একটা খেলা । খেলাচ্ছলেই হাসতে হাসতে বললে, ‘বাজারটা দাও ।’

‘বাজার ? বাজার নিয়ে তুই কি করবি রাণী ?’

‘কি আবার করব । তোলা তুলব, খাব ।’

মিথ্যে বলবে না রাণী, সে আশা করে চায়নি । গোপিকানাথের খেয়ালের সঙ্গে সেও খেয়ালীপনার খুনসুটি করছিল ।

কয়েকদিন পরে গোপিকানাথ এল । সঙ্গে মেলাই লোক । সব লোকই বাজারের । গোপীকানাথ সরকারি স্ট্যাম্পের কাগজ দিলে রাণীর হাতে । বললে, ‘নে, এটা ।’

‘কি ?’

‘ছাখ্ না কি । তারপর বাইরে যা । তোর সঙ্গে বাজারের লোকেরা দেখা করতে এসেছে ।’

কাগজখানি হাতে নিয়ে বাইরে গেল রাণী । সবাই এসে রাণীর সামনে পয়সা দিয়ে যেতে লাগল ।

‘কি এসব ?’

বাজারের তোলা প্রথম ঘরে বয়ে দিতে এসেছে নতুন মনিবানকে ।

আঁচল ভরে পয়সা নিয়ে, ঘরে ঢুকে হাঁ করে তাকিয়ে রইল রাণী গোপিকানাথের দিকে ।

গোপিকানাথ বলল, ‘কি, অমন হাঁ করে তাকিয়ে আছিচ্ যে বড় ? তোলা তুলবি আর খাবি, বলছিলি না ? তাই দিয়ে দিলুম । ভাল করেছিচ্, জীবনে আর কারুর কাছে হাত পাততে হবে না । কারণ গঙ্গা নদী যদি কোনদিন বানে ভেঙে না নিয়ে যায়, তবে এ বাজার রইল তোর, তোর মেয়ের চিরদিনের জন্ত ।’

মনটা কেমন করতে লাগল রাণীর । বলল, ‘না, এটা তুমি ঠিক করনি



বাবুসাহেব । তোমাকে ঠাট্টা করে বলেছিলুম বলে, সত্যি চেয়েছি নাকি ?

গোপিকানাথ বললে, 'তুইও যেন কেমন হয়ে গেলি রাণী । কোথায় একটু সোহাগ জানাবি তা নয়, আর আনতে কুড় । কাছে আয় ।' দু'হাত বাড়িয়ে দিল গোপিকানাথ । রাণীকে টেনে নিলে বুকের কাছে ।

চিরদিনই কি এক অদম্য পিপাসা নিয়ে যেন গোপিকানাথ বুকে টেনে নিয়েছে রাণীকে । ভালবেসে তার সাধ মিটত না যেন । কিন্তু সেদিন বুকে টেনে নেবার মধ্যে আরো কিছু ছিল । রাণীকে নিয়ে বসল সে খাটের ওপর । জানালা দিয়ে দেখা যায় গঙ্গা, বাজার, বাজারের নৌকার ভিড় । কোলাহলও শোনা যায় ।

গোপিকানাথ বললে, 'রাণী, তোকে বড় দুঃসময়ে পেয়েছিলুম । সেদিন তোকে না পেলে, হয়তো নিজে মরতুম, কিংবা আরো দু'জন মরত । তোকেও সখের বশেই টেনেছিলুম প্রথম । কিন্তু তোর চোখ দুটির দিকে তাকিয়ে বড় মায়া লাগল । তুই তোর জীবনের কথা বললি । কষ্ট হল প্রাণে । তোর এত কষ্ট রাণী, তবু তোকে দশজনে ছিঁড়ে খায় । কিন্তু, যার পায়ের থেকে মাথা পর্যন্ত সোনায়ে মোড়া, টাকা জমি বাড়ির যার অভাব নেই, যোয়ান স্বামী যার ঘরে, যে স্বামী বউ অন্তপ্রাণ, যে বউয়ের রূপের পায়ে স্বামী নিজেকে সঁপে দিয়েছে, সে বউও স্বামীকে ঠকায় । কোন অপরাধ না থাকা সত্ত্বেও । ঠকায় শুধু নয়, পরের সন্তান নিজের গর্ভে ধরেও স্বামীর বলে চালায় । তবু সে বউ হাসে, সাজে, গায়ে পড়ে ।'

রাণী অর্থময় চোখে তাকিয়ে জিজ্ঞেস করল, 'কার কথা বলছ গো ?'

গোপিকানাথ বলল, 'বুঝতে পেরেছিস্ রাণী, তোর চোখ বলছে, আমার মুখ দিয়ে আর বলাস্‌নি । যেদিন জানতে পারলুম, সেইদিন সেই বউ আর তার ছেলেকে মাটিতে পুঁতে ফেলতে চেয়েছিলুম । কিন্তু তা করিনি । দশ বছর ধরে যে কথা বিশ্বাস করিনি, তাই প্রমাণ হয়ে গেল ।'

রাণীকে আরো কাছে টেনে বলল, 'নিজের বড় বেঁচে থাকবার সাধ ছিল রাণী । নিজের প্রাণের এত মায়া ছিল । অপরকেও মারতে পারিনি । মনে মনে শুধু আমাদের গৃহদেবতা জনার্দনকে ডেকেছি ।

সেই সময় তোকে না পেলে কি করতুম জানিনে। আর তোকে বলছি স্বয়ং জনাদর্শন যেন আমাকে হাত ধরে তোর কাছে নিয়ে গিয়েছিল। আমি ওদের পথের ভিখিরি করে দিয়ে যেতে পারি। কিন্তু, তা আমি দেব না। আমার যে কোন দুঃখ নেই। তোর অনেক রূপ রাণী, কিন্তু সে বউয়ের রূপ তোর চেয়ে কিছু কম নয়। বেশি। তবু রাণী তোর কাছে আমার অনেক দেনা। তোর উড়ে যাবার পাখনা ছিল যেখানে খুশি, তুই গেলিনে আমাকে ছেড়ে। যার পাখনা ছিল না, সে বুকে হেঁটে সাপের মত ছোবলাল আমাকে। বাজারটা তোকে দিয়ে আমি কিছুই অন্তায় করিনি। কিন্তু শোন, এসব কথা কাউকে কোনদিন বলিস্নে। এই আট বছর তোকে আমি কিছুই বলিনি, আজ বললুম।’

তারপর চিৎকার করে চাকরকে ডাকলে গোপিকানাথ। বললে, ‘কানাই সারেঙ্গী আর নয়ন তবলটিকে ডেকে নিয়ে আয়।’

রাণী বলল, ‘কি হবে?’

গোপিকানাথ বলল, ‘একটু নাচ আজকে রাণী।’

বাজিয়েরা এল। রাণীকে নাচ শিখিয়েছিল গোপিকানাথ কলকাতার বেনারসী নাচওয়ালাকে দিয়ে।

রাণী নাচল। তার কুঁচি দিয়ে অনেকখানি ঘের রেশমী শাড়ি ফুলে উঠে ঘূর্ণী খেল। বুমুরে তাল বাজতে লাগল যেন, রাণীর বাজার, রাণীর বাজার।

এই কি তবে রাণীর বাজারের বৃত্তান্ত? গোপিকানাথের রাণীর কাছে এলেই কি রাণীর বাজার নামের আদি ইতিহাস ছলতে থাকে এক অস্পষ্ট রহস্য?

মতদ্বৈধ আছে। থাকবেই। তার আগে যে নাম ছিল রাণী পাড়া? হয় তো তারও পরে বেরবে, শুনবে কিছু। রাণীর বাজার নামের তাই অস্ত যদিও বা থেকে থাকে ভবিষ্যতের গর্ভে, আদি তার কোনকালে নেই। গোপিকানাথের রাণী কিংবা কোন এক রাণী থেকে রাণীর বাজার। শুধু গোপিকানাথের রাণীর দাবি মুছে দেওয়া গেল না। আজও যায়নি।

কিন্তু বাজারের ব্যাপারটা গড়াল অনেক দূর। গোপিকানাথের মুখ কঠিন আর চিন্তিত হয়ে উঠল। গোপিকানাথ বাড়ি যাওয়া বন্ধ করলে।

তার আঠারো বছরের ছেলে গোপালকে দেখা গেল কিছুদিন বাজারের ও রাণীর বাড়ির কাছে ঘোরাঘুরি করতে ।

কয়েকদিন পরে, গোপিকানাথ বাড়ি গেল । যেদিন গেল, সেইদিনই সন্ধ্যাবেলা গোপিকানাথের থাতলানো মৃতদেহটা কে বা কারা ফেলে রেখে গেল রাণীর দোর গোড়ায় ।

সেই দৃশ্যটা আজও ভুলতে পারেনি সৌরভী তার এই বিরানববুই বছবে, ঘাটের পথে পা বাড়িয়ে ।

লোকজন এল, পুলিশ দারোগা এল ওপার থেকে । তখন এখানে ছিল শুধু একজন রাইটার আর জনকয়েক সেপাই । সরকারি অফিস আদালত ছিল গঙ্গার ওপারেই । সেই বুঝি রাণী একটি পুরুষের মৃতদেহের ওপর পড়ে বৈধব্যের কান্না কেঁদেছিল ।

শুধু গোপিকানাথের গলার সোনার হারটি ছিন্ন অবস্থায় পাওয়া গিয়েছিল তার বাড়ির সদর দেউড়ির কাছেই । তারই কোঁচার কাপড়, যেটা দিয়ে তার গলায় ফাঁস দিয়েছিল, সেই কোঁচার একটি অংশ খুব জোরে টানাটানি করার জন্তুই বোধ হয় ছিঁড়ে পড়েছিল পথের ওপর ।

প্রকাশে না হলেও, একথা গোপন থাকল না, মাত্র আঠারো বছরের ছেলে গোপাল তার বাপকে খুন করেছে । কারণ, রাণীর বাজার ।

রাণী আরো দেখতে পেয়েছিল তার দূরদৃষ্টি দিয়ে, গোপিকানাথের বিধবা তার ছেলের সঙ্গে বসে যুক্তি পরামর্শ করেছে, কেমন করে রাণীকে সরানো যায় ।

রাণীর পক্ষে ছিল বাজারের লোকেরা । গোপালের প্রতি তারা বরাবরই রুষ্ট ছিল । বাজারের কয়েকটি বাঘা বাঘা মরদ তাদের রঞ্জিণী মনিবানের ঘর পাহারা দিলে । শুধু তাই নয়, পুলিশ যখন রাণীর ওপর খুনের দায় চাপাবার চেষ্টা করলে, তারা সবাই রাণীর হয়ে সাক্ষী দিলে । গোপাল যে মুঠো মুঠো টাকা খাইয়েছে পুলিশকে, সেটাও গোপন ছিল না । গোপিকানাথের বিধবা পুলিশ সাহেবকে দু'দিন বাড়িতে রেখে যত্ন করেছে, রাণীর বাজারে সেকথাও আলোচনা হয়েছে ।

এ বিষয়ে আর একটি লোক কলকাঠি নাড়ছিল রাণীর জন্তুই । সে

মোহন চাটুয্যে । লেখাপড়ার রেওয়াজটা ছিল চাটুয্যেদের, শুধু জমিদারি নয় । পুলিশ যখন বুঝলে, অধিকাংশ লোকই রাণীর পক্ষে, তখন তাকে, গোপিকানাথের খুনীকে অনাবিস্কৃত রাখতে হল । মামলা খতম ।

মোহন চাটুয্যে এল রাণীর কাছে । প্রতিদানের প্রত্যাশা তার ছিল । রাণী বিমুখ করেনি ।

জীবনে গোপিকানাথের অভাব পূরণ হবে না বটে, কিন্তু একজন লোক দরকার । সাহস দরকার ।

অনেকেই চেয়েছিল রাণীকে । কেন না, শুধু যৌবনের জোয়ারে ভাঁটা পড়েনি বলে নয়, রাণী তখন সত্য মিথ্যায় মিশিয়ে এক বিচিত্রময়ী নায়িকা হয়ে গিয়েছে ।

কিন্তু ষড়যন্ত্র চলছিল অতৃদিক দিয়ে । বাজার কেড়ে নেবার নানান ফন্দি ফিকির চলছিল । এমন কি গোপালও রাণীর কাছে নত হতে চাইলে ।

কিন্তু পৃথিবীর সমস্ত লোকের এঁটো পরিষ্কার করতেও নাকি রাণীর আপত্তি ছিল না । কিন্তু গোপালকে সে কোনদিন ক্ষমা করেনি । তার চেয়েও রাণীর বেশি ঘৃণা ছিল গোপালের পশু প্রবৃত্তিকে যে আড়াল থেকে পরিচালনা করছিল, সেই গোপিকানাথের বিধবার প্রতি ।

তারপর রাণীর কাল ফুরলো । সৌরভীর অভিষেক হল রাণীর বাজারের রাণীর স্থানে ।

রাণীর বাজারের আর এক পাশের গ্রাম চণ্ডীপুর । সেখানে অনেক আগে থেকেই চটকল আর তেলকল তৈরি হয়েছিল । ক্রমেই লোকজন বাড়তে লাগল । বাড়তে লাগল রেল লাইন ।

পাড়ায় পাড়ায় উপপত্নীদের বাড়িগুলি ক্রমেই পাড়া হয়ে ছড়াতে লাগল ।

মায়ের সম্পত্তি বাড়িয়ে চলল সৌরভী ।

আজকের মত পথে দাঁড়াবার প্রয়োজন ছিল না । মায়ের চেয়েও বেশি জমে উঠল সৌরভীর হাট । ইংরেজী বুকনিওয়ালা বাবুরাও এল তার দরজায় । কিন্তু বরাবরই, কারুর না কারুর রক্ষিতা হয়েই কেটেছে সৌরভীবালার । সেই সব পুরুষদের কাহিনী রাণীর বাজারের

ইতিহাসে স্থান পাবে, আর লেখা আছে সৌরভীরই গায়ে। শুধু আর যাওয়া আসার মেয়ে রইল না সৌরভী, ছেলেমেয়ে নিয়ে, ভরা ঘর সংসারেই তার চির সধবার বেসাতি চলেছে।

শুধু বাজার নিয়ে গণ্ডগোলটা চিরদিন জ্বালিয়েছে সৌরভীকে। গোপাল তাকেও রক্ষিতা করতে চেয়েছে। সৌরভী শুধু জবাব দিয়েছে, ‘গোপিকানাথ আমার পিতৃহুলা, কুলটা হলেও ভাইয়ের সঙ্গে বাস করতে পারব না।’

গোপাল বলেছে, ‘ভাই যদি, তবে ভাইকে তুমি বাজারটা দিয়ে দাও।’ সৌরভী বলেছে, ‘কুকুরের নামে বাজার লিখে দেব, তবু তোমাকে নয়।’

গোপালের ছদ্মবেশী অনুচরেরা এসেছে সৌরভীর কাছে। প্রেম করেছে। অজস্র টাকা দিতে চেয়েছে বাজারের জন্য। কিন্তু, গোপালের দেওয়া তার বাপের টাকায় শুধু তারা ফুটি করেই প্রতিদান দিয়েছে গোপালকে।

কিন্তু গোপিকানাথ একটি কথা ভুল বলেছিল। গঙ্গা নদীর বন্টার ভাঙনে নয়, রাণীর বাজার চলে পড়ল নতুন কালের নদীর বন্টায়। সেও বন্ট, ভয়ংকর। যেখানে দিয়ে যায়, সেখানকার সবই সে বদলে দিয়ে যায়।

রাণীর বাজারের নতুন সদর দেউড়ি হল স্টেশন। লাইন বাড়ছিলই। মালগাড়িতে করে মাল চালান আসতে লাগল। আর স্বেযোগ বুঝে, স্টেশনের সামনেই, রাণীর বাড়ির কাছাকাছি অধর গাঙ্গুলী তার কয়েক কাঠা জায়গায় বিনা ‘তোলা’র মিনিমাগনা বাজার খুলে দিল।

সে আর এক কাহিনী। সেখানে আর কোন দেহপোজীবিনীর যোগাযোগ নেই। পারিবারিক স্বেডংএর মধ্যে নতুন বাজারের ইতিবৃত্ত আছে লুকিয়ে।

শুধু গোপাল একবার টকর দিতে চেয়েছিল অধর গাঙ্গুলীকে। পারেনি। গোপাল ব্যাপার দেখে বিস্ময়ে বোকা বনে গিয়েছিল। যে বাজার করার বুদ্ধি প্রথম তার মাথায় আসা উচিত ছিল। সেটা গিয়ে খোঁচালে কিনা ব্রাহ্মণের মগজে।

চটকল কোম্পানী এল। রাণীর বাজারটা শুদ্ধু পাশের গ্রামটা পর্যন্ত কিনে নিল তারা। অধর গাঙ্গুলীর বাজার উঠল মাথা চাড়া দিয়ে।

রাণীর বাজারে এল আরো মেয়েমানুষ। বাস্তু পুরোহিতের ভিটেয় ছিল চাটুষোদের উপপত্নীর বাড়ি। সে নতুন লাইন তুলে দিল গণিকাদের।

আজ সেই সৌরভীবালায় নাত্নি, শিবানী। অনেকদূর, অনেকদূর এসে পৌঁছেছে সৌরভী। রাণীর ঐতিহ্য নষ্ট হয়নি তার ঘর থেকে।

শিবানী সেই আগন্তুক রাণী, রাণীর বাজারের ইতিহাস ইতিমধ্যেই যার প্রতি দৃষ্টিপাত করেছে।

কিন্তু মরণ, মরণ এখনো আসে না কেন?

সৌরভী দেখল, জানালায় মুখ বাড়ানো আকাশটায় দিনের আলো হাসছে। মরণ তার আজো হল না।

তবু আমার কালের রাখাল থামল না। রাজার আজ কোথাও যাবার নাম নেই। সকালবেলা স্টেশনের সামনেটিতে দাঁড়িয়ে বাজিয়ে চলল।

শুধু আমি এইটুকু কাল রাত্রে দেখেছিলাম আমার চিলেকোঠা থেকে ছেউটি রাজাকে বলছে, 'যদি আমার কাছেই না থাক, তবে আর আসা আসি কেন?'

রাজা হেসেছে।

রাণীর বাজারে অনেক দেখছি, কিন্তু একজনের কথা বলতে গেলে আমার দিন ফুরিয়ে যায়।

আমার এতদিনের দেখা রাণীর বাজারের, আজকের দিনটিকে তুলসী অঙ্কুর করে রাখলে চিরদিনের জন্য।

রাত পোহাতে নকড়ি এল। পদশব্দেই বুঝতে পারল তুলসী, কে এসেছে। যদিও তার ভ্রু কুঁচকে যাওয়ার কথা এই চির শত্রুর আগমনে, কিন্তু জীবনের অদৃশ্য চিত্রকর তার সুন্দর মুখে, অনুরাগ ও খুশির এক উজ্জ্বল রং-এর প্রলেপ টেনে দেয় শুধু।

পায়ের শব্দ বাজে না এ বাড়িতে। জগদীশ নিঃশব্দ পদসঞ্চারী।

তার চেহারার মত তার চলা। অপলক চোখে, একটু ঝুঁকে, নিশ্চুপ মার্জারের মত তার চলাফেরা। যখন সে গতে' থাকে, তখন তুলসী টের পায়, দুটি চোখ নিয়ত আছে তার গায়ে গায়ে, পায়ে পায়ে। কখনো অক্ষম লালসায়, কখনো তীব্র সন্দেহে। অতি ধীর তার গতি। অতি আস্তে, স্বভাব অপরাধীর মত তার গলার স্বর। জগদীশকে টের পাওয়া যায় না। গায়তীর্য তো যেখানে বসেন, সেখান থেকে আর ওঠেন না। তুলসীর পায়ে শাস্ত্রানুশাসন, নিঃশব্দ গতি মার্জারী হওয়াই তার বিধেয়।

একমাত্র নকড়ি এলেই এ বাড়ির ভিৎ শুদ্ধ কাঁপে। তুলসীর বুকের কাঁপুনিটা তো দম দেওয়া কলের পুতুলের মত। সেই যে কবে কোন বিধাতা চাৰি ঘুরিয়ে দিলে, আর তা থামেনি।

তুলসী উৎকর্ণ হয়ে রইল। যদিও, কালভদ্রেই নকড়ি গায়তীর্যের ঘরে ঢোকবার আগে, তুলসীর ঘরে উঁকি দিয়ে থাকে, তবু তুলসীর আশা মরে না। মরে না তাই, বড় আয়নাটার দিকে চোরা চোখে চেয়ে থাকে তুলসী। নিজেকেও দেখে নেওয়া হয়, নকড়ির ছায়াটাও চোখে পড়তে পারে।

নকড়ি সোজা গায়তীর্যের ঘরেই গেল।

গায়তীর্য হাঁটুর ওপর মাথা ঝুইয়ে বসেছিলেন। সূদীর্ঘ কুঞ্চিত চামড়া হাত দুখানি লুটিয়ে আছে মাটির ওপর। কোমরের কাছে এক চিলতে শ্যাকড়া। যেন জীবনের ভারে নুজ ভারবাহী একটি জীব। জরা যার দেহ থেকে মানুষিক রূপকে অপহরণ করে নিয়েছে একটু একটু করে।

নকড়ি ডাকল, 'দাছু।'

গায়তীর্য মাথা তুললেন। নকড়ির গলার স্বর শুনলেই উদীপ্ত হয়ে ওঠেন তিনি। বললেন, 'নকু?'

'হ্যাঁ'।

'কোন দুঃসংবাদ—'গায়তীর্যের ক্রুর চামড়া যেন গলে গলে পড়তে থাকে ত্রাসে।

নকড়ি হেসে বলল, 'সে সব কিছু নয় দাছু। সংবাদ সবই ভাল, কোন গুণ্ণগোল নেই। আপনাকে এইটা সই করতে হবে।'

‘সই ?’ শ্রায়তীর্থের মুখে অসহায় বিস্ময় ।

নকড়ি বলে, ‘হ্যাঁ ভয় পাবার কিছু নেই । এটাও একটা দলিল বটে । তবে, জমিজমা টাকা পয়সা সংক্রান্ত নয় ।’

‘তবে ?’

নকড়ি বলল, ‘আমরা দেখাতে চাই দাছ, দেশের লোকে যুদ্ধ চায় না, শান্তি চায় । যে চায় না, আমরা তার সই নিচ্ছি । আপনি যুদ্ধ চান না শান্তি চান ?’

শ্রায়তীর্থ একটু সোজা হয়ে বসবার চেষ্টা করলেন । বললেন, ‘কাদের সঙ্গে যুদ্ধ ? তোমাদের এই পাকিস্থান না কি, তাদের সঙ্গে ?’

‘ষাদের সঙ্গেই হোক, দেশে যুদ্ধ হবে কি না, আপনি কি চান ?’

শ্রায়তীর্থের রেখা কবলিত মুখে হাসি দেখা দিল । বললেন, ‘তোমাদের সেই দলের কাজ বুঝি ? কোথায় পাঠান হবে সইগুলি ?’

নকড়ি বলল, ‘সব দেশের প্রতিনিধিরা যেখানে মিলিত হয়, সেই রাষ্ট্রসংঘে ।’

‘কিস্তি ভাই, আমরা তো খরচের খাতায় পড়ে গিয়েছি, আমাদের চাওয়া না চাওয়ায় কি হবে ?’

‘কিস্তি জমার খাতায় যে আমাদের এনেছেন ? আমরা তো আছি এখনো ।’

শ্রায়তীর্থ চুপ করে রইলেন । ছানি পড়া চোখ দুটি তুলে ধরলেন । যেন কিছু দেখতে চান । তারপরে ডাকলেন, ‘নকু, কাছে এস ।’ নকড়ি কাছে এল । শ্রায়তীর্থ তার গায়ে হাত দিলেন । বললেন, ‘কোন যুদ্ধটার কথা বলছ ? আমাদের, না তোমাদের সময়ের ?’

‘আমাদের, আপনাদের, সব সময়েরই দাছ ।’

‘আমাদের সময়েরটা তুমি দেখনি । তখন তোমার জন্ম হয়নি । তখন হিন্দুর অ-বধ্য গাভী শাবক মেরে, সনাতন ভট্টাচার্য লক্ষ টাকা রোজগার করেছিল । সে টাকায় সে মন্দির করেছিল, তোমরা জান না । রায়বাহাদুর খেতাব পেয়েছে সে । আর চিকনপুরে, আমার বৃদ্ধা শ্বাশুড়ি অনাহারে মারা গিয়েছিলেন । চালের দর হয়েছিল দশ টাকা মন ।



আমরা সময়মত খবর পাইনি। খবর পেলে অনাহারে মরতে হত না।  
সেকথা থাক। তখনো মানুষের ভাগ্যের বিধান কিছুটা ভগবানের হাতে  
ছিল ভাই। তোমাদের সময়ের যুদ্ধটা সেটাও বদলে দিয়েছে।  
ভগবানেরই ভাগ্যটা অপরেরা পেয়েছে নিজের হাতে, নয় কি ?’

এরকম প্রশ্নের মুখে পড়ে নকড়ি অস্বস্তিবোধ করতে লাগল। কি  
জবাব দেবে, ভেবে পেল না।

ন্যায়তীর্থ বললেন, ‘না না, তুমি অগ্নরকম মনে করো না ভাই।  
পুরাণের নজীর দিচ্ছি তোমাকে আমি। দেবতাদেরও অসুরের হাতে  
বন্দী হতে হয়েছে, নয় কি ?’

‘বইয়ে পড়েছি দাছ।’

‘আজ চাক্স দেখছ। অসুরের হাতে ভগবানেরা মরছে, অ্যাঁ, কি  
বল ? তুমি তো আমাকে সেই যুদ্ধের কথা বলছ, যখন তোমার মা  
তোমাকে ছুবেলা দুটি খেতে দিতে পারেননি, একটু কেরোসিন তেল দিয়ে  
বাতি জ্বালিয়ে দিতে পারেননি তোমার কলেজের পড়া করবার জগে ?’

নকড়ি দাহুর শত ভাজ মুখের দিকে চেয়ে অবাক হয়ে বলল,  
‘হ্যাঁ দাছ।’

‘বুঝেছি। তুমি সেই যুদ্ধটার কথা বলছ, যখন আমাদের শ্রহ্লাদ  
হালদারের বউটি গলায় দড়ি দিল ন্যাংটো হওয়ার ভয়ে, আর মেয়েটি  
পালিয়ে গেল। কেমন তো ? সাহেব সেপাইরা যখন আমাদের শিব  
মন্দিরে কি কমলার মেয়েটাকে মেরে রেখে গেল সর্বনাশ করে, আর  
আমাদের পাঁচশুলি পরগণার সাত হাজার লোক না খেয়ে মরল  
যে যুদ্ধে, অ্যাঁ ?’

‘হ্যাঁ।’

‘দাও, কাগজ দাও, কলম দাও। আমার বাঁ হাতের তর্জনী বসিয়ে  
দাও নিবের ডগায়, আর নিবটা ঠেকিয়ে দাও সইয়ের জায়গায়।’

‘পারবেন সই করতে ?’

আর কথা বলতে পারলেন না ন্যায়তীর্থ, হাঁপাচ্ছেন এখন। কাঁপছেন  
থর্ থর্ করে। বললেন, ‘পারব। কিন্তু সংস্কৃতে সই করব ভাই। বলছ

যখন এটা বাইরে যাবে। শত হলেও আমাদের প্রাচীন বংশ, দেবভাষায় শাস্ত্র চর্চা করেছি, তাই—’

‘তাই করুন আপনি।’

নৈয়ায়িক সই করলেন, চণ্ডীচরণ শ্রায়তীর্থ।

অঙ্করগুলি হল অঁকা বাঁকা, কাঁপা কাঁপা, দুর্বোধ্যপ্রায়। অধ’ চন্দ্রকার লাইন। সই করে শ্রায়তীর্থ বললেন, ‘হে নারায়ণ, হে ঈশ্বর!’

নকড়ি বলল, ‘এবার চলি।’

শ্রায়তীর্থ ক্লান্ত হয়ে দেয়ালে এলিয়ে পড়েছিলেন। বললেন, ‘আর কোন কথাই আজ হল না নকু। দল করিস, যাই করিস, তোর মায়ের মনে কষ্ট দিসনে। তোর মাকে আসতে বলিস। তুলসীকে একবার পাঠিয়ে দিস।’

নকড়ি চলে গেল।

বাইরে এসে, দোতলার দালান পেরিয়ে, সিঁড়ির কাছে এসে দেখল তুলসী গালে হাত দিয়ে দাঁড়িয়ে আছে। নকড়ি বলল, ‘এখানে এমন করে দাঁড়িয়ে যে?’

তুলসী মুখ না তুলেই বলল, ‘কোথায় আর যাই তবে? তোমাদের বন্ধ ঘরের দাছু নাতির কথায় তাহলে আড়ি পাততে হয়।’

নকড়ি হেসে বলল, ‘দরজা তো আজ বন্ধ ছিল না।’

সন্ধিষ্ণু বিশ্বস্নেয়ে বলল তুলসী, ‘তাই নাকি? তা হলে নতুন ব্যাপার বলতে হবে।’

তুলসীর গায়ে জামা নেই। থাকত না বড় একটা শীতকালটুকু ছাড়া। তার সূর্যচ্ছটা উন্মুক্ত পিঠে প্রায় পিঙ্গল খোলা চুল এলিয়ে পড়ে আছে; জগদীশ নয়, শ্রায়তীর্থ নয়, একমাত্র নকড়িকে দেখলেই যেমন তেমন করে একটুখানি ঘোমটা টানার চেষ্টা করে সে। সেইরকম চেষ্টাকৃতভাবেই, বুকের কাপড়ই ঘাড়ের পাশ দিয়ে টেনে এনে মাথায় একটু ঠেকিয়ে রেখেছে। কপালে তো নয়ই, সিঁথির সামান্য সিঁদুর চিহ্নও যেন অস্পষ্ট।

নকড়ি বলল, ‘সকাল তো আটটা সবে, এখন থেকেই যদি সিঁড়িতে গালে হাত দিয়ে অপেক্ষা কর, দিন যে কাটবে না।’

প্রথমটা তুলসী বুঝতে পারেনি। ত্রা কাঁপিয়ে জিজ্ঞেস করল,  
‘অপেক্ষা ? কার অপেক্ষা ?’

নকড়ি ঠোঁট টিপে হেসে বলল, ‘জগদীশদার।’

সহসা একটি গীষ হাসিই বুঝি সশব্দে উপচে আসছিল তুলসীর  
ঠোঁটে। কিন্তু হাসিটা এল না। বলল, ‘বোঝ তো সবই। কি আর বলব।’

নকড়ি কি হাসছে ? বলল, ‘সব বুঝি, সে কথা কেমন করে বলি বউদি।’

তুলসী চোখ নামাল না। নামতে পারল না। নকড়ির চোখের দিকে  
চেয়ে বলল, ‘সত্যি বোঝ না ?’

এই চিলে কোঠা থেকে, আমারই মত নকড়িও যেন দেখল, তুলসীর  
সূর্যচ্ছটা বন্ধিম দেহে, বিশ্বোষ্ঠে, বিশাল চোখে, প্রলয়ের বাসনা দপ্‌দপ্‌  
করছে। একটু যেন অন্তমনস্কের মত তুলসীর দিকে তাকিয়ে, মাথা  
নাড়ল নকড়ি, ‘না।’

‘বুঝতে চাও না বোধ হয় ?’

হঠাৎ যেন বলিষ্ঠ নকড়িকেও কেমন অসহায় মনে হয়। হেসেই  
বলল, ‘কোন বোঝাবুঝির কথা বলছ, সেটা একটু বুঝিয়ে বল তাহলে।’

আমারই বুকের মধ্যেটা বুঝি শুধু কাঁপছিল এই চিলে কোঠায়।  
দেখলাম, তুলসী তার স্থলিত আঁচল গোছাল না। দেখলাম, নকড়ির  
কাছে নিজেকে আড়াল করে রাখার সব আবরণগুলি যেন খসে পড়ছে।  
দ্বিচারিণী নয়, শাস্ত্রের দাবী অনুযায়ী নারীর সব কারুকলা তার দেহের  
দৃষ্টি দক্ষ-চ্ছটায়। কোন চারণই যার হয়নি, দ্বিচারিণী সে হয় কেমন করে ?

তুলসী বলল, ‘সেটাও বুঝিয়ে দিতে হবে ?’

‘নইলে ?’

‘একেবারে বেহায়া চেহারাটা দেখতে চাও।’

‘এবার নকড়ি হেসে উঠল। বলল, কেটে পড়ি বউদি।’

‘না।’

‘না নয়, তোমার কাছে দাঁড়িয়ে থাকলে, পায়ের তলাটা কাঁপে।’

‘আমারও পায়ের তলা কাঁপে।’

নকড়ি জোরে হেসে বলল, ‘দুজনেই পড়ে মরব শেষটায়।’

তুলসীর ঠোঁটেও কথার অভাব নেই, ‘ধরাধরি করে থাকব।’

ততক্ষণে নকড়ি সিঁড়ির মাঝামাঝি নেমে গিয়েছে। নামতেই বলল, তার চেয়ে, 'পা দুটোকে শক্ত সোজা করা যাক বউদি, কন্টটা কম হবে। ভূমি দাতুর কাছে যাও।'

অদৃশ্য হয়ে গেল নকড়ি। ভুলসীর রক্তাভ ঠোঁটে তার দাঁত চেপে ধরল। সিঁড়ির রেলিং ধরা শক্ত মুঠি তার যেন কাঁপছে, অবশ্য হয়ে আসছে। দাঁতগুলিও যেন ঠক্ঠক্ করছে দারুণ শীতে চেপে বসবে হয়তো। বৃকের মধ্যে শুধু কয়েকটা কথা বাজছে : ছলনা শুধু ছলনা। মিথ্যুক, মিথ্যুক।

শ্রায়তীর্থের চিৎকার ভেসে আসছে, 'নাতবউ। ওরে নাতবউ। জগুর বউ ভুলসী, ভুলসী।'

এই নীচু চাপা বাড়িটায়, প্রতিধ্বনির কোন আশা নেই। নৈয়ায়িকের কর্ণস্বর বাইরে যাবার কোন সম্ভাবনা নেই।

কিন্তু শ্রায়তীর্থ কখনও থামেন না। একবার ডাকতে শুরু করলে, ছেলেমানুষের মত ঘ্যানর ঘ্যানর করতেই থাকেন। এ যে শুধুই খিদের কান্না, তা নয়। মানুষের সঙ্গ চান। একলা কতক্ষণ থাকবেন ?

তারপর একটু একটু করে দেহের অবসন্নতা কাটে ভুলসীর। ক্রোধ ও ঘৃণা তাকে গ্রাস করতে থাকে। নৈয়ায়িকের চিৎকার বাড়তে বাড়তে ঘরে ছুটে গেল ভুলসী। আতপ চালের হাঁড়িটা নিয়ে, শ্রায়তীর্থের মাথায় সে ঢেলে দিল সব চাল।

শ্রায়তীর্থ বললেন, 'কি ? কি এসব ?'

ভুলসীর মুখ বিকৃত হয়ে উঠল। বলল, 'এখনো সেন্দ্র হয়নি, ওই দিলুম, খান।'

আমি দেখলাম, যিনি একটু আগে শাস্তিপত্রে সই করেছেন তিনি ভুলসীকে না পেয়ে মূত্রত্যাগ করেছেন ওখানে বসেই।

বললেন, 'চাল না ? তাইতো, চাল খাব কি করে ?'

ভুলসী চীৎকার করে বলল, 'তবে চেষ্টাচ্ছেন কেন ? যম এসেছে আপনাকে নিতে ?'

'হে ঈশ্বর !'

ঠোঁট কুঁচকে বলল তুলসী, ‘ঈশ্বর দেখছেন, না ! নাতিকে বললেন না কেন সব করে দিয়ে যেতে ?’

বলে তুলসী নৈয়ায়িককে সম্পূর্ণ উলঙ্গ ও প্রত্নাবের মধ্যে মাখামাখি দেখে, হঠাৎ একটা ধাক্কা দিয়ে চিৎকার করে উঠল, ‘এসব কি করেছেন, অ্যাঁ ?’

ধাক্কার জোরটা বুঝি তুলসীও বুঝতে পারেনি। নৈয়ায়িক মুখ খুবড়ে পড়ে গেলেন মাটিতে। একটি শব্দ করলেন, ‘অ্যাঁ !’

তবু তুলসী দজ্জাল ছেলেকে শাসন করার মত, দু’হাতে নৈয়ায়িককে বুকে তুলে, দেয়ালে হেলান দিয়ে রেখে দিলে। ভেজা শ্যাকড়াটা খুলে নিয়ে, নতুন শুকনো শ্যাকড়া চণ্ডীচরণকে পরিয়ে, ঘর মুছতে মুছতে বলল, ‘কেন আমি এসব করব ? কেন বলতে পারেন ? একটা ছ্যাকরা গাড়ির সঙ্গে তো জুড়ে দিয়েছেন, নিজেও ফাঁকি মারছেন আমাকে। লজ্জা করে না আপনার। এই বুড়ো বয়সে—’

সভয়ে থেমে গেল তুলসী। সে দেখল, দেয়ালে হেলান দেওয়া শ্রায়তীর্থ ক্রমেই আরো ঝুঁকে পড়ে যেন এগিয়ে আসছেন তার দিকে। মাটিতে হেঁচড়ে হেঁচড়ে তাঁর একটা হাতও এগিয়ে আসছে তুলসীর পায়ের কাছে। কিন্তু মাথাটা ঝুলে গিয়েছে তাঁর, মুখ দেখা যাচ্ছে না।

তুলসীর মনে হল, হঠাৎ একটা অশরীরি সত্ত্বা যেন, প্রবেশ করছে ঘরে। সে প্রায় চিৎকার ক’রে উঠল, ‘এ কি করেছেন ?’

কোথায় একটা মট্ করে শব্দ হল। নিজের হাতের ওপরেই শ্রায়তীর্থের দেহটা ছমড়ি খেয়ে পড়ল।

শ্রায়তীর্থকে তাড়াতাড়ি ধরে চিৎ করল তুলসী।

নৈয়ায়িক চণ্ডীচরণ মারা গেলেন।

রাণীর বাজারের ইতিহাসের এক নায়কের আমি এই বিচিত্র মরণ দেখলাম। পুণ্যের প্রাচীন পাণ্ডিত্যের দৈহিক অবসান।

সৌরভীবালা পড়ে আছে এখনো জীবিত।

শ্রায়তীর্থ বুঝি তাই এই মুক্তির কৃতজ্ঞতায় হাত বাড়িয়ে দিয়েছিলেন শেষ মুহূর্তে তুলসীর পায়ের দিকে।

তবু আমার হৃৎপিণ্ডে সহসা কঠিন শিলাপাতে স্তব্ধ হয়েছিলাম ।  
আমার বুক থেকে একটি শব্দও বেরুতে পারল না মুখ দিয়ে । আমার  
কানে বাজছিল, হে ঈশ্বর, হে নারায়ণ, পরমেশ্বর মুক্তি দাও । মুক্তি দাও !’

তুলসী অপার বিস্ময়ে তাকিয়ে আছে । কি করে, কখন, কোন  
মুহুর্তে মারা গেলেন দাদাশশুর ?

মৃতদেহ ! যাঁর কাছে তুলসীর কোন প্রাপ্তির আশাই মেটেনি ।

সেই প্রথম ধাক্কার আঘাতেই এখনো ন্যায়তীর্থে’র ঠোঁটের কষে  
রক্তের দাগ লেগে রয়েছে । রক্ত ছিল শেষ মুহুর্তে’ও ।

জরা ও বাধঁকোর মৃত স্থলিত দেহপিণ্ডের পাশে, বাসনার মোহিনী-  
মূর্তি বিস্মৃত বিস্মৃত ভীত তুলসীকে, মৃত্যুপুরীর অভিশপ্ত আত্মা বলে মনে  
হল । সে ফিস্ ফিস্ করে বলল, ‘আমি মারলুম আপনাকে ?’

তাড়াতাড়ি আঁচল দিয়ে নৈয়ায়িকের ঠোঁটের রক্ত মুছে তুলসী উঠে  
দাঁড়াল । সেই মুহুর্তে তার মনে হল, তবু একটা ব্যর্থ আশার জীবিত  
জ্বালা শেষ হয়েছে তার । চোখে তার জল আশ্রুক, শোক করবে না তুলসী ।

সে তাড়াতাড়ি রান্নাঘরের জানালা খুলে চিৎকার করে ডাকল,  
‘ন’দি, ন’দি ।’

শরিকানা ভাগের, পাশের একটি ছোট জানালায় এক প্রোঁটার  
মুখ ভেসে উঠল ।

তুলসী বলল, ‘ঠাকুর্দা মারা গেলেন এখুনি, একেবারে হঠাৎ ।  
সবাইকে খবর দিন । নকু ঠাকুরপো এই যাচ্ছে । কাউকে পাঠান ।’

মুহুর্তে গোটা বাড়ির বউ ঝিয়েরা সব এল ।

যাদের না কাঁদলেই নয়, তারা কাঁদল । যদিও তারা জানত না ন্যায়তীর্থ  
বলে কোন ব্যক্তি আজও এই বাড়ির কোন ঘরে সত্যি জীবিত আছেন ।

তুলসী সবাইকে বলল, ‘এইতো নকু ঠাকুরপো যাচ্ছে ওঁ’র কাছ থেকে ।  
তারপরে আমি নোংরা পরিষ্কার করছি, হঠাৎ বসে থেকে পড়ে গেলেন ।’

জগদীশকেও খবর দেওয়া হয়েছিল কারখানায় । প্রায় আট দশ  
বছর বাদে সে ন্যায়তীর্থে’র ঘরে ঢুকল নিঃশব্দে ।

নকড়ি এল । ন্যায়তীর্থে’র কাছে যাবার আগেই, তুলসীর সঙ্গে-

চোখাচোখি হল তার ।

নকড়ি যেন এইটুকু সময়ের মধ্যেই নতুন মানুষ হয়ে ফিরে এল । তার মুখ কঠিন, গস্তীর দৃষ্টি, সন্দ্বিধ । বলল, ‘কেমন করে মারা গেলেন ?’

তুলসীর যেন কেমন ভয় করতে লাগল নকড়ির দিকে চেয়ে । বলল, ‘আপনি আপনি পড়ে গেছিলেন ।’

নকড়ি যেন মেঘের স্বরে বলল, ‘রাগ করে মারধোর করনি তো ?’

তুলসীর মুখ সাদা হয়ে গেল । পুড়ে ছাই হয়ে গেল যেন সব স্নলক্ষণ । বলল, ‘কেন ?’

‘মনের জ্বালায় । তোমাকে উনি সম্পত্তি দেন নি তাই ?’

তুলসীও যেন হঠাৎ উজ্জীবিত হয়ে উঠল একটা কঠিন হিংস্রতায় । বলল, ‘তা মারধোর করতেও পারি । কি করবে ?’

নকড়ির চোখেও আগুন । সে আগুন সিংহের । বিনা বাক্যব্যয়ে সে ন্যায়তীর্থের ঘরে গেল । দেখল । গায়ে হাত দিল । ঠোঁটের কষে দাগও দেখল রক্তের । বাঁ, হাতের মনিবন্ধের গ্রন্থি ভাঙা, তাও টের পেল ।

ন্যায়তীর্থের মেয়ে নকড়ির মা এলেন । নৈয়ায়িকের বুদ্ধ ভাইয়েরা, ভ্রাতুষ্পুত্রেরা সবাই জড়ো হল ।

রাণীর বাজারের প্রাচীনতম পণ্ডিত, রাণীর বাজারের পুণ্যের ও ধর্মের ইতিহাসের মৃতদেহ শ্মশানযাত্রা করল ।

হরিধ্বনি শুনতে পেল সৌরভীবালা—জিজ্ঞেস করল, ‘কে ?’ জবাব দিল কে একজন, ‘দ্বিজপাড়ার সেই বুড়ো পণ্ডিত, চণ্ডীচরণ চক্রবর্তী ।’

সৌরভীবালা ঠোঁট নেড়ে নেড়ে বলতে লাগল, ‘ক্ষমা কর, হে ঠাকুর, ক্ষমা কর ।’

রাত্রি ন’টার সময়, শবযাত্রী নকড়ি স্নান শেষে, বাড়ি হয়ে, আব’র এল ন্যায়তীর্থের বাড়িতে ।

অন্ধকার বাড়ি । অন্ধকার সিঁড়ি দিয়ে উঠে নকড়ি দালানে এল । কেউ নেই । একটা বাতিও নেই । ঘরেও বাতি নেই !

নকড়ি ডাকল, ‘মেজদা ।’ জগদীশকে ডাকল সে । কোন সাড়া শব্দ নেই ।

জগদীশ দাঁড়িয়েছিল দালানের শেষ প্রান্তে জানালার কাছে । সে  
সরে দাঁড়াল নিঃশব্দে । হু'চোখ তার চোখ-খাবলার মত তীব্র হয়ে উঠল ।  
তুলসীর ঘরের দরজার দাঁড়িয়ে নকড়ি ডাকল, 'ঘরে কেউ আছে ?'

'আছি ।' তুলসীর গলা ।

নকড়ি বলল, 'বাতি জ্বাল ।' গলায় তার নির্দেশের সুর ।

তুলসী টের পেয়েছিল পায়ের শব্দে কে আসছে ! তবু নীরব ছিল ।  
উঠে বাতি জ্বালল সে ।

ঘরে ঢুকল নকড়ি । চোখে তার তীক্ষ্ণ স্থির দৃষ্টি । জিজ্ঞেস করল  
'মেজদা কোথায় ?'

মুখ ফিরিয়ে জবাব দিল তুলসী, 'জানিনে ।'

নকড়ি তুলসীর কাছে গেল । এত কাছে গেল যা কোনদিন যায় নি ।  
তুলসীর ভয় হল । সে ফিরে তাকাল নকড়ির মুখের দিকে নকড়ি যেন  
অর্থহীনভাবে অথচ দৃঢ়স্বরে বলল, 'এতদিন শুধু দাদুর কাছেই আসতুম  
না, তোমাকেও দেখতে ইচ্ছা করত ।'

তুলসী চমকে উঠল । বুঝি তার গায়ের কম্পন নকড়িকে স্পর্শকরবে !

নকড়ির দুই চোখে চাপা ব্যথা । বলল, 'তোমার কাছে আসার  
পথটা চিরদিনের জন্য তুমিই বন্ধ করলে । তোমার জন্য অনেক ভাবনা  
ভেবেছি, আর না ভাববার চেষ্টা করব ।'

তুলসী হাত বাড়তে গেল নকড়ির দিকে । বলল, 'শোন ঠাকুরপো ।'

'দাঁড়াও ।' বলে নিজেই সরে দাঁড়াল নকড়ি ।

আমি আমার চিলেকোঠা থেকে দেখলুম, ন্যায়তীর্থও একটা বড় বাজী  
খেলে গিয়েছেন । তাঁর রং এর শেষ টেকাটা বার করল নকড়ি পকেট  
থেকে । স্ট্যাম্প পেপারে উইলপত্র ।

সেটা তুলসীর দিকে বাড়িয়ে দিয়ে বলল, 'ধর ।'

'কি ?'

'উইল । তোমাকে দাদু তাঁর স্বাবর অস্বাবর, রাণীর বাজারের  
টুকরো টাকরা জমি, এই বাড়ি, পাঁচশুলি পরগণার সব তোমাকে উইল  
করে দিয়ে গিয়েছেন ।'



তুলসী পড়ে যেতে গিয়ে, দু'হাতে নকড়িকে ধরল।

নকড়ি তাকে দু'হাতে খাটের কাছে সরিয়ে দিল। বলল, 'সব। শুনে নাও। মেজদা সব নষ্ট করে ফেলবে, তাই ভাণ করেছেন দাদু তার কিছু নেই, সব বিকিয়ে গেছে। তোমাকেও বললে তুমি মেজদাকে বলবে, তাই তোমাকেও বলতে বারণ ছিল।' '

তুলসী কাঁপছে ঠক ঠক করে। চোখ তার ফেটে পড়ছে, চোখ দিয়ে যে জল পড়ছে সে টেরও পায়নি।

নকড়ি বলল আবার, 'দাদু বুড়ো হয়েছিলেন, একটু বাতিকগ্রস্ত হয়ে পড়েছিলেন, তাই দরজা বন্ধ করে সংবাদ নিতেন, তাঁর উইল জমিজমা, পাঁচশুলি পরগণা, সব ঠিক আছে কি না।'

বলে, উইলখানি ছুঁড়ে দিল নকড়ি তুলসীর দিকে। নকড়ির চোখেও বুঝি জল, তবু জ্বলছে ধক ধক করে, 'মানুষ কোথায় নামে, আমি তাই দেখলুম। দাদুর মুখে আমাকে আর কোনদিন শুনতে হবে না যে, তিনি তাঁর নাত-বউয়ের সেফ্টিপিন ফোটানো টের পেয়েও বিছে কিংবা পিঁপড়ের কামড়ের ভাণ করে কেঁদেছেন। শুনতে হবে না, নায়তীর্থকে ভাতের মাড়—'

তুলসী একটা অমানুষিক চিৎকার করে, নকড়ির পায়ের ওপর কাঁপিয়ে পড়ল, 'ক্ষমা কর, ওগো ক্ষমা!'

নকড়ি নাম ধরে বলল, 'তুলসী, মানুষকে এমনি করে পিশাচ হতে দেখেছি বলেই, সত্যকে খুঁজে মরছি। তোমার উইল আমাদের ঘরে যখন পড়েছে, তখন আমার মা আমাকে এক বেলা খেতে দিয়েছে। ছেড়ে দাও, পা ছেড়ে দাও।'

তুলসীর গায়ে কাপড় নেই। নিজেরই চুলের গোছা তার মুঠি ভর্তি। পবিত্র বাসনার প্রতিমূর্তি, পাগলিনীর মূর্তি ধরেছে। চিৎকার করে বলল, 'না, না, পায়ে পড়ি, যেও না, যে-ও না।'

নকড়ি দু'হাতে তুলসীকে সরিয়ে, অন্ধকারে অদৃশ্য হল।

তুলসী চুল ছিঁড়ে, ভয়ংকরী হয়ে উঠল, আর ডাকতে লাগল, 'ঠাকুর্দা, ঠাকুর্দা গো। ঠাকুরপো...নকু ঠাকুরপো.....'

অন্ধকারের বুক থেকে জগদীশের মুখ ভেসে উঠল। চোখে তার তীব্র সম্বেদন, অন্ধম লালসা। সেই লালসা সিক্ত চোখ, তুলসীকে পেরিয়ে, উইলপত্রের দিকে পড়ল।

সহসা বাঘিনীর মত চকিত উঠল তুলসী। তার কঠিন হাতে চেপে ধরল জগদীশকে।

জগদীশ জোর করল। পারল না। তুলসীর ধাক্কায় বাইরে গিয়ে পড়ল। তুলসী দরজা বন্ধ করে দিল।

জগদীশ দরজায় করাঘাত করতে লাগল। এই নীচু চাপা অন্ধকার বাড়িটায়, সেই শব্দ একটা শাপদ থাবার আঁচড়ানোর মত শব্দ করতে লাগল।

তুলসী অচৈতন্য হয়ে পড়ল।

জীবন কি বিচিত্র।

রাণীর বাজার আমাদের অনেক দেখাল। অনেক শুরু বাকি রয়ে গেল। একজনের কথা বলতে গেলে, আমার দিনভোর হয়ে যায়। একজনকে দেখতে গেল, আর একজন বাদ পড়ে যায়। তবু প্রতিদিনের কোনটুকুই বাদ দেব না আমি। ফাঁকি দেব না।

রাণীর বাজারের চিলেকোঠার এই দরজা ধরে আমি দাঁড়িয়ে রইলাম। যেদিন আমার সব দেখা হবে, সেদিন সকলের জন্ম খুলে দেব এই দরজা।

শুধু যার অন্তহীন চোখের জল ভিতরেই শুকিয়ে গেল, বাষ্প হয়ে স্রের বংকারে ছড়িয়ে রইল রাণীর বাজারের আকাশে, সে আমার নির্বিকার কালের রাখাল আর তার বাঁশী।

